

Tawureta Munsa

Isirayila xa konti tife

Masenyi nde yi kitaabui xa fe ra

Annabi Munsa xa kitaabui naani nde kui, Isirayila jama xa taruxui nde masenxi naa naxan tide gbo danxaniyatɔe birin be. Alatala nu bara Isirayila ramini Misira konyiya kui sigafe ra Kanaan boxi ma, a dennaxe laayidixi e benbae be. Na sige kui a nu lanma e xa gbengberenyi igiri. E to Sinayi geya li, Alatala naxa mini jama ma alako e xa gaaxu a ya ra, e man xa a xa seriye kolon.

Kɔnɔ na dangi xanbi, Isirayila naxa tagan na jere ma, e fa e xɔnɔ xui rate Ala ma. Ala nu fe birin nabama alako e xa a kolon a na meenife e ma biyaasi kui, kɔnɔ e mu wasa na ra. E to makɔre Kanaan boxi ra, Ala naxa mixie sugandi e ya ma naxee siga naa rabende. Nee xa dentege naxa a niya Isirayila xa kontɔfili a jaaxi ra, e fa tondi sigade na boxi suxude.

Na kui Alatala naxa nate tongo na mixie xili ma, naxee minixi Misira boxi ma, a e sese mu nu nɔma Kanaan boxi masɔɔde fa, fo e xa die. Isirayila jama naxa je tongo naani raba gbengberenyi ma, alako forie birin xa faxa, e xa die xa mɔ na biyaasi kui.

A rapɔnyi, e naxa makɔre Kanaan naaninyi ra. Mowabakae mu tin e xa so, kɔnɔ Ala naxa a masen a fiixe ra a sese mu nɔma niyade a xa a xa jama Isirayila rabepin. Hali e to bara nu yunubi sɔɔ, Ala e jaxankataxi naxan ma fe ra, a mu danyi sa a xa hinne ma e be.

Seriye nan na ki danxaniyatɔe birin be. Yunubi mu fan, a Ala raxɔnɔma. Won na gbilen Ala xa seriye fɔxɔ ra, won xa a kolon na mu findima fe fanyi ra won be. Kɔnɔ Ala yuge na ki naxe, hali a yunubitɔe jaxankata a xa yunubie xa fe ra, a man kate birin nabama alako a xa tin a xa hinne ra naxan nɔma findide kisi ra a be abadan. Ala tinxin, a xa kiiti mu kanama. Kɔnɔ a xa xanunteya gbo dangi fe birin na. A wama ibunadama birin xa lu a xa jama ya ma, e fa so ariyanna. Ala xa na raba won birin be. Amina.

Tawureta Munsa

Isirayila xa konti tife

Isirayila xemee konti tife

¹ Isirayilakae xa mini Misira je firin nde, kike firin nde, xi singe, Alatala naxa a masen Munsa be Sinayi gbengberenyi ma horomolingira kui, ² «Wo xa Isirayila xeme birin konti a xabile nun a denbaya ki ma, ³ naxee simaya bara je moxonen li, naxee noma findide Isirayila soorie ra. I nun Haruna, wo xa e itaxun soori gaali ki ma. ⁴ Bonsoe xunyie xa wo mali na wali kui. ⁵ E xilie nan ya:

Ruben bonsoe ya ma, Sedeyuri xa di xeme Elisuru.

⁶ Simeyon bonsoe ya ma, Surisadayi xa di xeme Selumiyeli.

⁷ Yuda bonsoe ya ma, Aminadabo xa di xeme Naxason.

⁸ Isakari bonsoe ya ma, Suwara xa di xeme Netaneeli.

⁹ Sabulon bonsoe ya ma, Xelon xa di xeme Eliyabi.

¹⁰ Yusufu xa di xeme Efirami bonsoe ya ma, Amixudi xa di xeme Elisama.
Yusufu xa di xeme Manasi bonsoe ya ma, Pedasuru xa di xeme Gamaliyeli.

¹¹ Bunyamin bonsoe ya ma, Gideyoni xa di xeme Abidan.

¹² Dana bonsoe ya ma, Amisadayi xa di xeme Axiyeseri.

¹³ Aseri bonsoe ya ma, Okiran xa di xeme Pagiyeli.

¹⁴ Gadi bonsoe ya ma, Duweli xa di xeme Eliyasafa.

¹⁵ Nafatali bonsoe ya ma, Enan xa di xeme Axira.»

¹⁶ Na bonsoe xunyie nan xilixi, e xa findi Isirayila soori mangee ra. ¹⁷ E naxa kafu Munsa nun Haruna ma, ¹⁸ e xa Isirayila pama malan, na kike firin nde, xi singe. Xeme birin naxee simaya nu bara je moxonen li, e naxa e tengge e xabile nun e denbaya ki ma, ¹⁹ alɔ Alatala a yamari ki naxe. Munsa naxa e tengge Sinayi gbengberenyi ma.

²⁰ E naxa Isirayila xa di singe Ruben bonsoe birin tengge e xabile nun e denbaya ki ma. E naxa xemee xili sebe, naxee simaya nu bara je moxonen li, naxee nu noma sooripa rabade. ²¹ Na xasabi lan ne xeme wulu tongo naani nun senni, xeme keme suuli (46,500) nan ma.

²² E naxa Simeyon bonsoe birin tengge e xabile nun e denbaya ki ma. E naxa xemee xili sebe, naxee simaya nu bara je moxonen li, naxee nu noma sooripa rabade. ²³ Na xasabi lan ne xeme wulu tongo suuli nun solomanaani, xeme keme saxan (59,300) nan ma.

²⁴ E naxa Gadi bɔnsɔɛ birin tɛngɛ e xabile nun e denbaya ki ma. E naxa xɛmɛɛ xili seɓɛ, naxee simaya nu bara jɛ mɔxɔɗɛn li, naxee nu nɔma sɔɔrija rabade. ²⁵ Na xasabi lan nɛ xɛmɛ wulu tongo naani nun suuli, xɛmɛ kɛmɛ senni tongo suuli (45,650) nan ma.

²⁶ E naxa Yuda bɔnsɔɛ birin tɛngɛ e xabile nun e denbaya ki ma. E naxa xɛmɛɛ xili seɓɛ, naxee simaya nu bara jɛ mɔxɔɗɛn li, naxee nu nɔma sɔɔrija rabade. ²⁷ Na xasabi lan nɛ xɛmɛ wulu tongo solofere nun naani, xɛmɛ kɛmɛ senni (74,600) nan ma.

²⁸ E naxa Isakari bɔnsɔɛ birin tɛngɛ e xabile nun e denbaya ki ma. E naxa xɛmɛɛ xili seɓɛ, naxee simaya nu bara jɛ mɔxɔɗɛn li, naxee nu nɔma sɔɔrija rabade. ²⁹ Na xasabi lan nɛ xɛmɛ wulu tongo suuli nun naani, xɛmɛ kɛmɛ naani (54,400) nan ma.

³⁰ E naxa Simeyɔn bɔnsɔɛ birin tɛngɛ e xabile nun e denbaya ki ma. E naxa xɛmɛɛ xili seɓɛ, naxee simaya nu bara jɛ mɔxɔɗɛn li, naxee nu nɔma sɔɔrija rabade. ³¹ Na xasabi lan nɛ xɛmɛ wulu tongo suuli nun solofere, xɛmɛ kɛmɛ naani (57,400) nan ma.

³² E naxa Yusufu xa di xɛmɛ Efirami bɔnsɔɛ birin tɛngɛ e xabile nun e denbaya ki ma. E naxa xɛmɛɛ xili seɓɛ, naxee simaya nu bara jɛ mɔxɔɗɛn li, naxee nu nɔma sɔɔrija rabade. ³³ Na xasabi lan nɛ xɛmɛ wulu tongo naani, xɛmɛ kɛmɛ suuli (40,500) nan ma.

³⁴ E naxa Yusufu xa di xɛmɛ Manasi bɔnsɔɛ birin tɛngɛ e xabile nun e denbaya ki ma. E naxa xɛmɛɛ xili seɓɛ, naxee simaya nu bara jɛ mɔxɔɗɛn li, naxee nu nɔma sɔɔrija rabade. ³⁵ Na xasabi lan nɛ xɛmɛ wulu tongo saxan nun firin, xɛmɛ kɛmɛ firin (32,200) nan ma.

³⁶ E naxa Bunyamin bɔnsɔɛ birin tɛngɛ e xabile nun e denbaya ki ma. E naxa xɛmɛɛ xili seɓɛ, naxee simaya nu bara jɛ mɔxɔɗɛn li, naxee nu nɔma sɔɔrija rabade. ³⁷ Na xasabi lan nɛ xɛmɛ wulu tongo saxan nun suuli, xɛmɛ kɛmɛ naani (40,500) nan ma.

³⁸ E naxa Dana bɔnsɔɛ birin tɛngɛ e xabile nun e denbaya ki ma. E naxa xɛmɛɛ xili seɓɛ, naxee simaya nu bara jɛ mɔxɔɗɛn li, naxee nu nɔma sɔɔrija rabade. ³⁹ Na xasabi lan nɛ xɛmɛ wulu tongo senni nun firin, xɛmɛ kɛmɛ solofere (62,700) nan ma.

⁴⁰ E naxa Aseri bɔnsɔɛ birin tɛngɛ e xabile nun e denbaya ki ma. E naxa xɛmɛɛ xili seɓɛ, naxee simaya nu bara jɛ mɔxɔɗɛn li, naxee nu nɔma sɔɔrija rabade. ⁴¹ Na xasabi lan nɛ xɛmɛ wulu naani nun keren, xɛmɛ kɛmɛ suuli (41,500) nan ma.

⁴² E naxa Nafatali bɔnsɔɛ birin tɛngɛ e xabile nun e denbaya ki ma. E naxa xɛmɛɛ xili seɓɛ, naxee simaya nu bara jɛ mɔxɔɗɛn li, naxee nu nɔma sɔɔrija rabade. ⁴³ Na xasabi lan nɛ xɛmɛ wulu tongo suuli nun saxan, xɛmɛ kɛmɛ naani (53,400) nan ma.

⁴⁴ Isirayila bɔnsɔɛ xunyi fu nun firinyi nan kafu Munsa nun Haruna ma na tɛngɛ

tife ra. ⁴⁵ Isirayila xeme naxee nu bara ne moxopen li, naxee nu noma sooripa rabade, ⁴⁶ nee nu lanxi xeme wulu keme senni nun saxan, xeme keme suuli nun tongo suuli (603,550) nan ma.

⁴⁷ Kono Lewi bonsoe mu nu na na konti ya ma, ⁴⁸ barima Alatala nu bara a masen Munsa be, ⁴⁹ «I naxa Lewikae tenge Isirayilakae ya ma. ⁵⁰ I xa horomolingira nun a xa se birin taxu e ra. N ma saate tonxuma na a ra. E xa a maxanin, e xa meeni a ma, e xa yonkin a rabilinyi ra. ⁵¹ Wo na keli sigade, e xa a ragoro. Wo na yire neene li, e xa a ti. Xa mixi gbete a maso a ra naxan mu findi Lewi bonsoe ra, na kanyi lan ne a xa faxe. ⁵² Isirayilaka birin xa yonkin e yamarixi dennaxe, e bonsoe xa tonxuma bun ma, a nun e xa soorie. ⁵³ Lewi bonsoe xa yonkin horomolingira rabilinyi ma, xa na mu a ra n xonoma ne Isirayila pama ma. Lewikae xa e pengi sa horomolingira xon ma.»

⁵⁴ Isirayilakae naxa Alatala xa yaamari birin suxu, a naxan soxi Munsa yi ra.

2

Bonsoe dexo ki

¹ Alatala naxa a masen Munsa nun Haruna be, ² «Isirayilaka birin yonkinma e xabile xa tonxuma nan bun ma. E birin ya rafindima e booree nan ma, horomolingira fa lu e tagi.»

³ Yuda bonsoe nan yonkinma sogetede mabiri e xa tonxuma bun ma. Aminadabo xa di Naxason nan e xa yarerati ra. ⁴ A xa soorie xasabi lan mixi wulu tongo solofere nun naani, mixi keme senni (74,600) nan ma. ⁵ Isakari bonsoe nan yonkinma Yuda bonsoe seeti ma e xa tonxuma bun ma. Suwara xa di Netaneeli nan e xa yarerati ra. ⁶ A xa soorie xasabi lan mixi wulu tongo suuli nun naani, mixi keme naani (54,400) nan ma. ⁷ Sabulon bonsoe nan yonkinma Yuda bonsoe seeti ma e xa tonxuma bun ma. Xelon xa di Eliyabi nan e xa yarerati ra. ⁸ A xa soorie xasabi lan mixi wulu tongo suuli nun solofere, mixi keme naani (57,400) nan ma. ⁹ Gali naxan yonkin Yuda bonsoe mabiri, e xasabi lan mixi wulu keme wulu tongo solomasaxan nun senni, mixi keme naani (186,400) nan ma. E tan nan tima yare ra.

¹⁰ Ruben bonsoe nan yonkinma sogetede mabiri e xa tonxuma bun ma. Sedeyuri xa di Elisuru nan e xa yarerati ra. ¹¹ A xa soorie xasabi lan mixi wulu tongo naani nun senni, mixi keme suuli (46,500) nan ma. ¹² Simeyon bonsoe nan yonkinma Ruben bonsoe seeti ma e xa tonxuma bun ma. Surisadayi xa di Selumiyeli nan e xa yarerati ra. ¹³ A xa

sɔɔrie xasabi lan mixi wulu tongo suuli nun solomanaani, mixi keme suuli (59,500) nan ma. ¹⁴ Gadi bɔnsɔɛ nan yonkinma Ruben bɔnsɔɛ seeti ma e xa tɔnxuma bun ma. Duweli xa di Eliyasafa nan e xa yarerati ra. ¹⁵ A xa sɔɔrie xasabi lan mixi wulu tongo naani nun suuli, mixi keme senni nun tongo suuli (45,650) nan ma. ¹⁶ Gali naxan yonkin Ruben bɔnsɔɛ mabiri, e xasabi lan mixi wulu keme wulu tongo suuli nun keren, mixi keme naani nun tongo suuli (151,450) nan ma. E tan nan sigama a firin nde.

¹⁷ Lewi bɔnsɔɛ naxan yonkinma e tagi, a birama e fɔxɔ ra hɔrɔmɔlingira xaninfe ra. Bɔnsɔɛ birin jɛrema e safe ki nan ma e xa tɔnxuma bun ma.

¹⁸ Efirami bɔnsɔɛ nan yonkinma sogegorode mabiri e xa tɔnxuma bun ma. Amixudi xa di Elisama nan e xa yarerati ra. ¹⁹ A xa sɔɔrie xasabi lan mixi wulu tongo naani, mixi keme suuli (40,500) nan ma. ²⁰ Manasi bɔnsɔɛ nan yonkinma Efirami bɔnsɔɛ seeti ma e xa tɔnxuma bun ma. Pedasuru xa di Gamaliyeli nan e xa yarerati ra. ²¹ A xa sɔɔrie xasabi lan mixi wulu tongo saxan nun firin, mixi keme firin (32,200) nan ma. ²² Bunyamin bɔnsɔɛ nan yonkinma Efirami bɔnsɔɛ seeti ma e xa tɔnxuma bun ma. Gideyoni xa di Abidan nan e xa yarerati ra. ²³ A xa sɔɔrie xasabi lan mixi wulu tongo saxan nun suuli, mixi keme naani (35,400) nan ma. ²⁴ Gali naxan yonkin Efirami bɔnsɔɛ mabiri, e xasabi lan mixi wulu keme wulu solomasaxan, mixi keme (108,100) nan ma. E tan nan sigama a saxan nde.

²⁵ Dana bɔnsɔɛ nan yonkinma yirefanyi mabiri e xa tɔnxuma bun ma. Amisadayi xa di Axiyeseri nan e xa yarerati ra. ²⁶ A xa sɔɔrie xasabi lan mixi wulu tongo senni nun firin, mixi keme solofere (62,700) nan ma. ²⁷ Aseri bɔnsɔɛ nan yonkinma Dana bɔnsɔɛ seeti ma e xa tɔnxuma bun ma. Okiran xa di Pagiyele nan e xa yarerati ra. ²⁸ A xa sɔɔrie xasabi lan mixi wulu tongo naani nun keren, mixi keme suuli (41,500) nan ma. ²⁹ Nafatali bɔnsɔɛ nan yonkinma Dana bɔnsɔɛ seeti ma e xa tɔnxuma bun ma. Enan xa di Axira nan e xa yarerati ra. ³⁰ A xa sɔɔrie xasabi lan mixi wulu tongo suuli nun saxan, mixi keme naani (53,400) nan ma. ³¹ Gali naxan yonkin Dana bɔnsɔɛ mabiri, e xasabi lan mixi wulu keme wulu tongo suuli nun solofere, mixi keme senni (157,600) nan ma. E tan nan sigama a dɔnxɔɛ ra e xa tɔnxumae bun ma.

³² Isirayilaka naxee tenge e xabile ki ma nun e sɔɔri gali ki ma, e xasabi lan mixi wulu keme senni nun saxan, mixi keme suuli nun tongo suuli (603,550) nan ma. ³³ Lewi bɔnsɔɛ tan mu tenge Isirayilakae xun ma, alɔ Alatala a masen ki naxe Munsa be.

³⁴ Isirayilakae naxa bira Alatala xa yaamari birin fɔxɔ ra, alɔ a Munsa yamari a ra

ki naxe. E nu yonkinma e xa tɔnxuma nan bun ma, e man nu jɛrɛma e xabilɛ nun e denbaya ki nan ma.

3

Sɛrɛxɛdubɛɛ

¹ Haruna nun Munsa xa taruxui nan ya, Alatala to wɔyen Munsa bɛ Turusinina geya ma. ² Haruna xa di xɛmɛɛ xilie nan yi ki: a xa di xɛmɛ singe nu xili nɛ Nadabo, a xunyaɛ, Abihu, Eleyasari, nun Itamari. ³ Nee nan sugandixi e xa findi sɛrɛxɛdubɛɛ ra. ⁴ Kɔnɔ Nadabo nun Abihu naxa faxa Alatala ya i e to sɛrɛxɛ gan tɛ ra naxan mu lanxi. E mu di yo sɔtɔ, kɔnɔ Eleyasari nun Itamari naxa lu sɛrɛxɛdubɛɛra kui e baba Haruna xa yaamari bun ma.

⁵ Alatala naxa a masen Munsa bɛ, ⁶ «I xa Lewi bɔnsɔɛ masen Haruna bɛ, e xa a mali a xa sɛrɛxɛdubɛ wali kui. ⁷ E xa Haruna nun Isirayila pama mali hɔrɔmɔlingira wali. ⁸ E xa e jɔxɔ sa hɔrɔmɔlingira xunmasee xɔn na, e man xa hɔrɔmɔlingira wali raba Isirayilakae bɛ. ⁹ Na kui i Lewi bɔnsɔɛ sama Haruna nun a xa di xɛmɛɛ nan sago. E sugandixi Isirayilakae ya ma Haruna malife ra. ¹⁰ I xa Haruna nun a xa die nan tun ti sɛrɛxɛdubɛ wali rabafe ra. Xa mixi gbete sa a maso hɔrɔmɔlingira ra, na kanyi xa faxa.»

¹¹ Alatala naxa a masen Munsa bɛ, ¹² «N bara Lewi bɔnsɔɛ sugandi Isirayilakae tagi Isirayila ginɛɛ xa di singe birin jɔxɔɛ ra. Na bɔnsɔɛ findixi n gbe nan na, ¹³ barima n gbe nan na di xɛmɛ singe birin na. N to di xɛmɛ singe birin faxa Misira bɔxi ma, n naxa Isirayila di xɛmɛ singe birin sugandi n yete bɛ, a findi mixi ra, a findi xuruse ra. N tan nan na Alatala ra.»

Lewi bɔnsɔɛ tɛngɛfɛ

¹⁴ Alatala naxa a masen Munsa bɛ Sinayi gbengberenyi ma, ¹⁵ «Lewi bɔnsɔɛ tɛngɛ a denbaya nun a xabile ki ma. Xɛmɛ birin tɛngɛma nɛ naxan ma simaya bara kike keren li.» ¹⁶ Munsa naxa e tɛngɛ alɔ Alatala a yamari ki naxe.

¹⁷ Lewi xa di xɛmɛɛ xilie nan yi ki:

Gerison, Kehati, nun Merari.

¹⁸ Gerison xa di xɛmɛɛ xilie nan yi ki a xabile ki ma:

Libini nun Simeyi.

¹⁹ Kehati xa di xɛmɛɛ a xabile ki ma:

Amarama, Yisehari, Xebiron nun Yusiyeli.

²⁰ Merari xa di xemee a xabile ki ma:

Maxali nun Musi.

Lewi xabile nan na ki e denbaya ki ma.

²¹ Gerison bɔnsɔe nu na Libini Simeyi xabile nan na. ²² Naxee xa simaya nu bara kike keren li, e xasabi lan mixi wulu solofere keme suuli nan ma. ²³ Gerison xabile nu yonkinma hɔrɔmɔlingira nan xanbi ra sogegorode mabiri ra. ²⁴ E xunyi nu na Layeli xa di xeme Eliyasafa nan na. ²⁵ Gerison xa mixie nu e ɲɔxɔe saxi hɔrɔmɔlingira nan xɔn ma, nun mafelenyi naxan felenma a xun ma, a nun a sode de ra, ²⁶ a nun kɔlime naxee nu sama hɔrɔmɔlingira nun sɛrɛxɛbade rabilinyi ma, a nun na tɛtɛ sode de ra, a nun luutie e na maxirima naxee ra.

²⁷ Kehati xa mixie nan yi ki: Amarama xabile, Yisehari xabile, Xebiron xabile, nun Yusiyeli xabile. Na xabilɛe nan minixi e benba Kehati ma. ²⁸ E xa di xeme naxee simaya nu bara kike keren li, e xasabi lan mixi wulu solomasaxan keme senni nan ma. Kehati xa mixie nan nu meenima hɔrɔmɔlingira ma. ²⁹ E tan nu yonkinma hɔrɔmɔlingira yirefanyi mabiri nɛ. ³⁰ Yusiyeli xa di xeme Elisafan nan nu na e xunyi ra. ³¹ Hɔrɔmɔlingira saate kankira, teebili, lanpuie, sɛrɛxɛbadee, yirabase naxee rawalima yire seniyɛnxi kui, nun dugi yarasa naxan na hɔrɔmɔlingira kui, e nu taxuxi e tan nan na. ³² Lewi bɔnsɔe birin xunyi nu na Haruna xa di xeme Eleyasari nan na. A tan nan nu Lewi bɔnsɔe mixie xun ma, naxee meenima hɔrɔmɔlingira ma.

³³ Merari xa mixie nan yi ki: Maxali xabile nun Musi xabile. ³⁴ E xa di xeme naxee simaya nu bara kike keren li, e xasabi lan mixi wulu senni keme firin nan ma. ³⁵ Abixayili xa di xeme Suriyeli nan nu na Merari xabilɛe xunyi ra. E nu yonkinma hɔrɔmɔlingira kɔɔla mabiri nɛ. ³⁶ Hɔrɔmɔlingira xebenyie, a wuri kuyee, a kɔntiribae, a sanbunyie, a xa yirabase, nun a rawalisee nu taxuxi e tan nan na. ³⁷ E man nu e ɲɔxɔ sama kɔntiribae xɔn ma naxee nu hɔrɔmɔlingira tɛtɛ rabilinxi, a nun e sanbunyie, e xa kɔridie, nun e xa luutie.

³⁸ Munsa, Haruna, nun a xa di xemee nu yonkinma hɔrɔmɔlingira sode de nan na sogetede mabiri. E tan nan nu e ɲɔxɔ sama hɔrɔmɔlingira xɔn ma Isirayilaka birin xili ra. Xa mixi gbete sa a maso hɔrɔmɔlingira ra, na kanyi xa faxa. ³⁹ Lewi bɔnsɔe di xeme naxee simaya nu bara kike keren li, e xasabi nu lan mixi wulu mɔxɔɲɛn nun firin nan ma. Munsa nun Haruna nu bara e tenge e xabile ki ma alɔ Alatala e yamari ki naxe.

⁴⁰ Alatala naxa a masen Munsa bɛ, «Di xeme singe birin tenge Isirayilakae ya ma,

naxee simaya bara kike keren li, i xa e xilie seɓe. ⁴¹ Lewi bɔnsɔe xa findi Isirayila di xeme singe birin jɔxɔe ra. Lewi bɔnsɔe xa goore xa findi Isirayilakae xa xurusee di singee jɔxɔe ra. N tan nan na Alatala ra.» ⁴² Munsa naxa Isirayila di xeme singe birin tenge alɔ Alatala a yamari ki naxe. ⁴³ Isirayila di xeme singe birin naxee simaya bara kike keren li, e xasabi lan mixi wulu mɔxɔŋen nun firin keme firin tongo solofere nun saxan nan ma.

⁴⁴ Alatala naxa a masen Munsa be, ⁴⁵ «Lewi bɔnsɔe xa findi Isirayila di xeme singe birin jɔxɔe ra. Lewi bɔnsɔe xa goore xa findi Isirayilakae xa xurusee di singee jɔxɔe ra. N tan nan na Alatala ra. ⁴⁶ Na Isirayila di xeme singe mixi keme firin tongo solofere nun saxan naxee xasabi dangi Lewi bɔnsɔe konti ra, ⁴⁷ i xa kankan xun sara gbeti giramu tongo suuli nun solofere ra naxan mooli rawalima horomolingira kui. ⁴⁸ I xa na gbeti so Haruna nun a xa di xeme yi ra, di singee xunsare ra naxee xasabi nu dangi Lewi bɔnsɔe xasabi ra.» ⁴⁹ Munsa naxa na gbeti suxu naxan fixi di singee xunsare xa fe ra, naxee xasabi nu dangi Lewi bɔnsɔe xasabi ra. ⁵⁰ A naxa na gbeti kilo fu nun suuli nun a tagi rasuxu Isirayila di singee yi ra. Gbeti nan a ra naxan nu rawalima horomolingira kui. ⁵¹ Munsa naxa na xunsare gbeti so Haruna nun a xa di xeme yi ra alɔ Alatala a yamari ki naxe.

4

Kehati xa mixie

¹ Alatala naxa a masen Munsa be, ² «Kehati xa die tenge Lewi bɔnsɔe ya ma a xabile nun a denbaya ki ma, ³ naxee xa simaya bara je tongo saxan li han a je tongo suuli, naxee fama horomolingira wali rabade. ⁴ Kehati xa die lanma e xa meeni se seniyenxie ma naxee na horomolingira kui. ⁵ Isirayilakae na keli sigade, Haruna nun a xa di xeme xa dugi yarasa ragoro, e saate kankira makoto a ra. ⁶ Na dangi xanbi e xa foye yexe kiri sa na fari, a nun gare dugi. A donxɔe ra e xa wuri kuyee raso kankira tongosee ra.»

⁷ «E na gare dugi gbete itala teebili ma, e xa piletie, tonbilie, nun kundie sa na fari. Taami naxan bama serexe ra, na fan sama ne na teebili fari. ⁸ E dugi gbeeli nan sama na birin xun ma, e fa foye yexe kiri itala na fari. Na dangi xanbi e xa wuri kuyee raso teebili xa tongosee ra.»

⁹ «E xa gare dugi dusu lanpui doxɔse, lanpuie, a yirabasee, xube sasee, nun ture

kundie xun ma. ¹⁰ E xa na birin mafilin foye yexe kiri nan kui, e fa a sa xaninse fari. ¹¹ E xa gare dugi itala serexebade xema daaxi fari, e fa a makoto foye yexe kiri ra, e wuri kuyee raso a tongosee ra. ¹² Na horomolingira xunmase birin makotoma gare dugi ra, e e mafilin foye yexe kiri kui, e fa na sa xaninse fari. ¹³ E xa xube ba serexebade wure gbeeli daaxi kui, e fa dugi gbeeli dusu a xun ma. ¹⁴ E na a yirabasee sa a fari, alo surayi gansee, suxumee, pelie, nun pooti xungbee, e xa na birin mafilin foye yexe kiri ra, e fa wuri kuyee raso a tongose ra. ¹⁵ Haruna nun a xa di xemee na ge na xunmase seniyenxie nun a yirabasee makotode, Kehati xa die lanma e xa na birin xanin biyaasi kui. Kono e mu lanma e xa din na se seniyenxie ra xa na mu e faxama ne. Kehati bonsoe xa wali nan na ki. ¹⁶ Haruna serexedube xa di xeme Eleyasari nan a joxo sama lanpui ture, surayi, sansi serexe, nun ture seniyenxi xun ma. Horomolingira xunmase seniyenxie nun a yirabase birin taxuxi a tan nan na.»

¹⁷ Alatala naxa a masen Munsa be, ¹⁸ «Wo naxa lu Kehati bonsoe xabilee xa ba Lewi bonsoe ya ma. ¹⁹ Haruna nun a xa di xemee xa e mati horomolingira kui, e fa e xa wali masen kankan be alako e naxa e makore se seniyenxie ra, e fa faxa. ²⁰ E mu lan e xa e ya masa se seniyenxie ra, hali dondoronti, xa na mu e faxama ne.»

Gerison xa mixie

²¹ Alatala naxa a masen Munsa be, ²² «Gerison bonsoe tenge a xabile nun a denbaya ki ma, ²³ naxee xa simaya bara je tongo saxan li han a je tongo suuli, naxee fama horomolingira wali rabade. ²⁴ Gerison xabile xa wali nan yi ki. ²⁵ E horomolingira mafelenyi nan xaninma, a nun mafelenyi naxan yailanxi foye yexe kiri ra, a nun mafelenyi naxan gbakuxi horomolingira sode de ra. ²⁶ E xa tete mafelenyi fan xanin naxee horomolingira nun serexebade rabilinma, a nun naxan gbakuxi tete sode de ra, a nun tete luutie. E xa e joxo sa na se mooli birin xon ma. ²⁷ Gerison xabile walima Haruna nun a xa di xemee xa yaamari bun ma, a findi kotee xaninfe ra, a findi wali gbete rabafe ra. Nee nan a falama e be e lan e xa naxan naba, a nun e lan e xa naxan xanin. ²⁸ Gerison bonsoe xa wali nan na ki horomolingira xa fe ra. E na wali rabama Haruna serexedube xa di xeme Itamari xa yaamari nan bun ma.»

Merari xa mixie

²⁹ «I xa Merari bonsoe fan tenge a xabile nun a denbaya ki ma, ³⁰ naxee xa simaya bara je tongo saxan li han a je tongo suuli, naxee fama horomolingira wali rabade. ³¹ See

nan yi ki e tan lan e xa naxee maxanin hōrōmōlingira see ra: a xebenyie, a wuri kuyee, a kontiribae, nun e sanbunye. ³² E xa tete fan xanin, a nun a kontiribae, e sanbunye, e sōrōnsee, e xa luutie, e xa yirabasee, nun e xa walise birin. Wo see masen kankan be, a lanma a xa naxee xanin. ³³ Merari bōnsōe xa wali birin nan na ki hōrōmōlingira xa fe ra. E walima Haruna serexedube xa di xeme Itamari xa yaamari bun ma.»

Walikēe tēngēfe Lewi bōnsōe ya ma

³⁴ Munsa, Haruna, nun pama kuntigie naxa Kehati xa mixie tēngē e xabile nun e xa denbaya ki ma, ³⁵ xeme naxee xa simaya bara je tongo saxan li han je tongo suuli, naxee fama hōrōmōlingira wali rabade. ³⁶ E xasabi lan mixi wulu firin, keme solofere, tongo suuli nan ma. ³⁷ Xeme nan na ki Kehati xabilee ya ma naxee hōrōmōlingira wali rabama. Munsa nun Haruna bara e tēngē alō Alatala Munsa yamarixi ki naxe.

³⁸ E naxa Gerison xa mixie tēngē e xabile nun e xa denbaya ki ma, ³⁹ xeme naxee xa simaya bara je tongo saxan li han je tongo suuli, naxee fama hōrōmōlingira wali rabade. ⁴⁰ E xasabi lan mixi wulu firin, keme senni, tongo saxan nan ma. ⁴¹ Xeme nan na ki Gerison xabilee ya ma naxee hōrōmōlingira wali rabama. Munsa nun Haruna bara e tēngē alō Alatala Munsa yamarixi ki naxe.

⁴² E naxa Merari xa mixie tēngē e xabile nun e xa denbaya ki ma, ⁴³ xeme naxee xa simaya bara je tongo saxan li han je tongo suuli, naxee fama hōrōmōlingira wali rabade. ⁴⁴ E xasabi lan mixi wulu saxan keme firin nan ma. ⁴⁵ Xeme nan na ki Merari xabilee ya ma naxee hōrōmōlingira wali rabama. Munsa nun Haruna bara e tēngē alō Alatala Munsa yamarixi ki naxe.

⁴⁶ Munsa, Haruna, nun Isirayila kuntigie, e Lewi bōnsōe mixi naxee tēngexi e xabile nun e xa denbaya ki ma, ⁴⁷ xeme naxee xa simaya bara je tongo saxan li han je tongo suuli, naxee fama hōrōmōlingira wali rabade. ⁴⁸ E xasabi lan mixi wulu solomasaxan, keme suuli, tongo solomasaxan nan ma. ⁴⁹ Xeme nun e xa walie nan na ki Lewi naxee tēngexi Munsa nun Haruna saabui ra alō Alatala Munsa yamarixi ki naxe.

5

Mixi seniyyentaree, haake tongoe, nun yenelae

¹ Alatala naxa a masen Munsa be, ² «Isirayilakae yamari e xa kune kanyi nun kōrōsila kanyi birin namini e yonkinde, a nun mixi naxee dinxi fure nde ra, e fa findi

seniyentaree ra. ³ A findi xeme ra, a findi gine ra, wo e ramini wo ya ma, e xa sa lu e xati ma alako e naxa seniyentarepa raso wo ya ma, n sabatixi dennaxe.» ⁴ Isirayilakae naxa a raba alo Alatala a yamari ki naxe, e naxa na mixie ramini e ya ma. Alatala a yamari ki naxe Munsa be, e naxa a raba na ki.

⁵ Alatala naxa a masen Munsa be, ⁶ «A fala Isirayilakae be, a findi xeme ra, a findi gine ra, naxan yo na haake nde raba a boore ra, haake naxan findima Alatala xui matandife ra, na fe doxoxi a xun ma. ⁷ A lan ne a xa a ti na haake ra, a xa na fe yailan a nun na kanyi tagi, a man fa na fe kanaxi doxo suuli nde sa na fari. ⁸ Xa a sa li a haake rabaxi naxan na, a bara faxes, a xa mixi yo mu na naxan noma na fe yailanxi rasuxude, na findima Alatala nan gbe ra, a so serexedube yi ra. Fe kane man fa yexee kontonyi keren ba a xa yunubi xafari ra, a a so serexedube yi ra. ⁹ Isirayilakae na serexe ba, e a fi serexedube ma, na serexe findima na serexedube nan gbe ra. ¹⁰ Naxan birin serexe bama, a naxan bama, a gbe nan na ki, konko a naxan fima serexedube ma, serexedube gbe nan na ki.»

¹¹ Alatala naxa a masen Munsa be, ¹² «A fala Isirayilakae be, e yi nan nabama xa gine nde sa yene raba. ¹³ Xa e nun xeme gbete bara e sa gundo ra, gine xa mori mu na kolon, seede mu na, mixi mu a suxu a kui, ¹⁴ konko a xa mori bara a xa gine toone folo, xa a xa gine seniyenxi, xa na mu a mu seniyenxi, ¹⁵ a xa a xa gine xanin serexedube yire, a mengi kilo saxan ba a be serexe ra ture nun surayi mu na naxan xun, barima toone serexe nan a ra naxan bama a kolonfe ra xa yunubi rabaxi.»

¹⁶ «Serexedube xa na gine ti Alatala ya i, ¹⁷ a fa xube mako boxi ma horomolingira kui, a a masunbu ye seniyenxi ra feje kui. ¹⁸ Gine na ti Alatala ya i, serexedube xa a xunsexe fulun, a fa toone serexe sa gine belexe maratuse ra. Serexedube tan xa na ye tongo naxan findima danka ra, a a lintan gine ya i.»

¹⁹ «Serexedube gine rakalima ne, a a fala, «Xa a sa li i tan nun xeme gbete mu kafuxi, i mu i xa mori yanfa, i mu seniyentarepa soto futi kui, i xa ratanga danke ma yi ye fama naxan na. ²⁰ Konko xa a sa li, i bara i xa mori yanfa wo xa futi kui, i nun xeme gbete bara kafu seniyentarepa kui, ²¹ Alatala xa a ragiri i furi xa kana. Na kui i ngaxakerenyie i dankama ne, e i konbi. ²² Yi ye naxan fama danke ra, a xa i furi mafuntu, a i xore maba.» Gine xa a ratin a falafe ra, «Amina, amina.»»

²³ «Serexedube na ge na danke sebede kiri ma, a xa na kiri xa na ye seniyenxi ra, ²⁴ a fa a fi gine ma, a xa a min. Na ye naxan noma findide danke ra, a soma a fate i. ²⁵

Serexedube tōne serexe rasuxuma ne gine yi ra, a a dentegē Alatala bē serexebade yire.²⁶ Serexedube xa mēngi suxui ya keren gan serexebade fari, a findi serexe tōnxuma ra. A na gē na ra, a xa na ye fi gine ma, a xa a min.²⁷ A na na ye min, xa a sa li na gine bara findi seniyentare ra, a bara a xa mōri yanfa, na ye naxan findima danke ra, a soma ne a fate i, a a tōro ki fanyi ra. A furi funtuma ne, a xore mabama ne, a ngaxakerenyie fama ne a dankade.»

²⁸ «Kōno xa a sa li a mu seniyentarepa yo rabaxi, tōnege bama ne a xun ma, a man noma di baride.²⁹ Tōne seriye nan na ki naxan nawalima xa gine findima seniyentare ra, a a xa mōri yanfa futi kui,³⁰ xa na mu a ra, tōne xaxili na so xeme furi, a fa siike a xa gine ma. A a xa gine xaninma Alatala ya i, serexedube fa na seriye rabatu a xa fe ra.³¹ Na kui yunubi mu na na xeme ma, kōno gine tan a xa yunubi sare sōtoma ne.»

6

Mixi xa seriye naxan a yete safe Alatala sago

¹ Alatala naxa a masen Munsa bē,² «A fala Isirayilakae bē, xa xeme nde, xa na mu gine nde sa laayidi tongo Alatala bē, a xa lu a sago, na nan na ki a xa findi Nasari ra,³ na kanyi mu lan a xa weni nun beere min. A naxa sese min naxan kelixi weni bogi ma, xa na mu beere ma. A naxa weni bogi bunda don, a naxa a xare don.⁴ A temui naxan birin nabama a xa Nasariya kui, a naxa sese don naxan keli weni bili ma, keli a bogi ma a sa dōxo a xori ra.»

⁵ «A xa Nasariya kui, a mu lanma a xunyi xa bi. A xa lu seniyenyi kui, a xunsexe xa nu kuya ra tun.⁶ Na waxati bun ma, a mu lan a xa a maso fure ra,⁷ hali a findi a baba ra, a nga, a taara, xa na mu a ra a xunya fure ra. A na Alatala nan sago tun, alo a xunsexe kepa a masenxi ki naxe.⁸ A temui naxan birin nabama a xa Nasariya kui, a luma seniyenyi nan kui Alatala bē.»

⁹ «Xa mixi nde sa faxa a fe ma a terenna ki ma, a xunsexe bara findi se seniyentare ra. Na temui a xa seniyen lōxun keren bun ma, a man fa a xunyi bi na xi solofere lōxoē.

¹⁰ A xi solomasaxan lōxoē, a fogotara firin nan xaninma serexedube xon ma hōromolingira sode de ra, xa na mu ganbe firin.¹¹ Serexedube xoni keren nan bama yunubi xafari serexe ra, boore findima a gan daaxi nan na, alako a xa yunubi xa xafari, barima a dinfe fure ra, na findima yunubi nan na. Na lōxoē a man xa a xunyi raseniyen.

¹² A na gē na ra, a man xa gbilen a xa laayidi ma. Fo a xa yexee keren ba serexe ra,

naxan je keren a ra a xa yunubi xafarife ra. Lɔxɔɛ naxee bara dangi, nee mu kontima sɔnɔn, barima a nu bara seniyentarepa sɔtɔ.»

¹³ «Mixi na ge Nasariya rabade, a xa bira yi seriye nan fɔxɔ ra. A xa siga hɔrɔmɔlingira sode de ra, ¹⁴ a xa serexe gan daaxi ba Alatala be, yexee naxan bara je keren sɔtɔ, lanyuru yo mu na naxan ma. A xa yunubi xafari serexe fan ba, yexee gine naxan bara je keren sɔtɔ, lanyuru yo mu na naxan ma. A xa serexe janigexi ba, yexee kontonyi, lanyuru yo mu na naxan ma. ¹⁵ A xa serexe ndee sa na fari, alɔ sansi xɔri dinxi serexe, weni serexe, taami lebinitare, leki yailanxi ture ra, nun leki ture masoxi naxee ma. ¹⁶ Serexedube na serexe see nan dentegema Alatala be, a fa yunubi xafari serexe ba, a nun serexe gan daaxi. ¹⁷ A xa na taami lebinitare masen Alatala be, a xa na yexee kontonyi ba janige serexe ra, a xa sansi xɔri dinxi serexe nun weni serexe sa na fari.»

¹⁸ «Na temui Nasari xa a xunsexe bi hɔrɔmɔlingira de ra, a naxan fixi Alatala ma. A xa na raso te xɔra janige serexe na bafe dennaxe. ¹⁹ Nasari na ge a xunsexe bide, serexedube yexee kontonyi belexe ganxi keren nan tongoma a belexe ra, a nun leki lebinitare firin naxee na debe kui. ²⁰ A xa e dentegɛ Alatala be e lintanfe ra. Na findi donse seniyenxi nan na serexedube be, a nun na yexee ganyanyi nun a tabe. Na dangi xanbi, Nasari nɔma weni minde sɔnɔn. ²¹ Nasari seriye nan na ki. A lanma a xa na serexee ba Alatala be alɔ a janigexi ki naxe, a nun se gbetee a nɔma naxan na. Fo a xa a xa Nasari laayidi rakamali a seriye ki ma.»

²² Alatala naxa a masen Munsa be, ²³ «A fala Haruna nun a xa die be, e xa duba Isirayilakae be yi ki ne:

²⁴ ‹Alatala xa barika sa i xa fe,
a xa i kanta.

²⁵ Alatala yatagi xa nɔrɔ i ma,
a xa hinne i ra.

²⁶ Alatala xa a ya rafindi i ma,
a xa bɔnesa fi i ma.›

²⁷ E dubama Isirayilakae be na ki ne, n fan barika sama ne e ma.»

7

Hadiya naxee fixi hɔrɔmɔlingira rabi temui

¹ Munsa to ge hɔrɔmɔlingira tide, a naxa ture seniyenxi sa a ma, a nun a xunmasee,

a xa serexebadee, nun a yirabasee, alako nee xa seniyeen Alatala be. ² Isirayila kuntigie, xabile xunyi naxee bõnsõee tenge, e naxa hadiyae ba Alatala be. ³ E naxa fa saretî makotoxi senni nun ninge fu nun firin na hõrõmõlingira sode de ra Alatala ya i. ⁴ Alatala naxa a masen Munsa be, ⁵ «Yi hadiyae rasuxu e yi ra hõrõmõlingira wali xa fe ra. E taxu Lewi bõnsõe xa mixie ra kankan xa wali bere ra.» ⁶ Munsa naxa na saretie nun ningee so Lewi xa mixie yi ra. ⁷ A naxa saretî firin nun ninge naani so Gerison xabile yi ra e xa wali bere ra. ⁸ A naxa saretî naani nun ninge solomasaxan so Merari xabile yi ra e xa wali bere ra. E nu na Haruna serexedube xa di Itamari xa yaamari bun ma. ⁹ Kõno a mu sese so Kehati xabile tan yi, barima a nu lanma e xa se seniyeenxie maxanin e tunki fari alo Alatala e yamarixi ki naxe.

¹⁰ Serexebade neene xa wali singe, ture seniyeenxi to maso a ma temui naxe, kuntigie naxa fa hadiyae ra serexebade yire. ¹¹ Alatala nu bara a masen Munsa be, «Lõxõe yo lõxõe mixi keren xa fa a xa haidya ra serexebade neene xa fe ra.» ¹² Na lõxõe singe, Aminadabo xa di Naxason kelifè Yuda bõnsõe ¹³ naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe hõrõmõlingira kui. E firin nafexi sansi xõri dinxi ra, ture masunbuxi naxan na, alako a xa findi sansi serexe ra. ¹⁴ A man naxa fa pooti keren naxan yailanxi xeema giramu keme giramu fu nun naani ra, naxan nafexi surayi ra, ¹⁵ a nun naxee bama serexe gan daaxi ra alo tuura keren, yexee kontonyi keren, nun yexee keren naxan simaya bara je keren li, ¹⁶ a nun sikote naxan findima yunubi xafari serexe ra, ¹⁷ a nun naxee bama xanunteya serexe ra alo ninge firin, yexee kontonyi suuli, nun yexee suuli naxee simaya bara je keren li. Aminadabo xa di Naxason xa hadiya nan na ki.

¹⁸ Na lõxõe firin nde, Suwara xa di Netaneeli kelifè Isakari bõnsõe ¹⁹ naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe hõrõmõlingira kui. E firin nafexi sansi xõri dinxi ra, ture masunbuxi naxan na, alako a xa findi sansi serexe ra. ²⁰ A man naxa fa pooti keren na naxan yailanxi xeema giramu keme giramu fu nun naani ra, naxan nafexi surayi ra, ²¹ a nun naxee bama serexe gan daaxi ra alo tuura keren, yexee kontonyi keren, nun yexee keren naxan xa simaya bara je keren li, ²² a nun sikote naxan findima yunubi xafari serexe ra, ²³ a nun naxee bama xanunteya serexe ra alo ninge firin, yexee kontonyi suuli, nun yexee suuli naxee simaya bara je keren li. Suwara xa di Netaneeli xa

hadiya nan na ki.

²⁴ Na lɔxɔɛ saxan nde, Xelon xa di Eliyabi kelifɛ Sabulon bɔnsɔɛ ²⁵ naxa fa yi hadiyae ra: piletɪ kɛrɛn naxan yailanxi gbɛti kilo fu nun suuli ra, a nun pɔɔti kɛrɛn naxan yailanxi gbɛti kilo kɛrɛn na alɔ se maniyama ki naxɛ hɔrɔmɔlingira kui. E firin nafexi sansi xɔri dinxi ra, ture masunbuxi naxan na, alako a xa findi sansi sɛrɛxɛ ra. ²⁶ A man naxa fa pɔɔti kɛrɛn na naxan yailanxi xɛɛma giramu kɛmɛ giramu fu nun naani ra, naxan nafexi surayi ra, ²⁷ a nun naxɛɛ bama sɛrɛxɛ gan daaxi ra alɔ tuura kɛrɛn, yɛxɛɛ kontonyi kɛrɛn, nun yɛxɛɛ kɛrɛn naxan xa simaya bara jɛ kɛrɛn li, ²⁸ a nun sikɔtɛ naxan findima yunubi xafari sɛrɛxɛ ra, ²⁹ a nun naxɛɛ bama xanunteya sɛrɛxɛ ra alɔ ninge firin, yɛxɛɛ kontonyi suuli, nun yɛxɛɛ suuli naxɛɛ xa simaya bara jɛ kɛrɛn li. Xelon xa di Eliyabi xa hadiya nan na ki.

³⁰ Na lɔxɔɛ naani nde, Sedeyuri xa di Elisuru kelifɛ Ruben bɔnsɔɛ ³¹ naxa fa yi hadiyae ra: piletɪ kɛrɛn naxan yailanxi gbɛti kilo fu nun suuli ra, a nun pɔɔti kɛrɛn naxan yailanxi gbɛti kilo kɛrɛn na alɔ se maniyama ki naxɛ hɔrɔmɔlingira kui. E firin nafexi sansi xɔri dinxi ra, ture masunbuxi naxan na, alako a xa findi sansi sɛrɛxɛ ra. ³² A man naxa fa pɔɔti kɛrɛn naxan yailanxi xɛɛma giramu kɛmɛ giramu fu nun naani ra, naxan nafexi surayi ra, ³³ a nun naxɛɛ bama sɛrɛxɛ gan daaxi ra alɔ tuura kɛrɛn, yɛxɛɛ kontonyi kɛrɛn, nun yɛxɛɛ kɛrɛn naxan xa simaya bara jɛ kɛrɛn li, ³⁴ a nun sikɔtɛ naxan findima yunubi xafari sɛrɛxɛ ra, ³⁵ a nun naxɛɛ bama xanunteya sɛrɛxɛ ra alɔ ninge firin, yɛxɛɛ kontonyi suuli, nun yɛxɛɛ suuli naxɛɛ xa simaya bara jɛ kɛrɛn li. Sedeyuri xa di Elisuru xa hadiya nan na ki.

³⁶ Na lɔxɔɛ suuli nde, Surisadayi xa di Selumiyeli kelifɛ Simeyɔn bɔnsɔɛ ³⁷ naxa fa yi hadiyae ra: piletɪ kɛrɛn naxan yailanxi gbɛti kilo fu nun suuli ra, a nun pɔɔti kɛrɛn naxan yailanxi gbɛti kilo kɛrɛn na alɔ se maniyama ki naxɛ hɔrɔmɔlingira kui. E firin nafexi sansi xɔri dinxi ra, ture masunbuxi naxan na, alako a xa findi sansi sɛrɛxɛ ra. ³⁸ A man naxa fa pɔɔti kɛrɛn na naxan yailanxi xɛɛma giramu kɛmɛ giramu fu nun naani ra, naxan nafexi surayi ra, ³⁹ a nun naxɛɛ bama sɛrɛxɛ gan daaxi ra alɔ tuura kɛrɛn, yɛxɛɛ kontonyi kɛrɛn, nun yɛxɛɛ kɛrɛn naxan xa simaya bara jɛ kɛrɛn li, ⁴⁰ a nun sikɔtɛ naxan findima yunubi xafari sɛrɛxɛ ra, ⁴¹ a nun naxɛɛ bama xanunteya sɛrɛxɛ ra alɔ ninge firin, yɛxɛɛ kontonyi suuli, nun yɛxɛɛ suuli naxɛɛ xa simaya bara jɛ kɛrɛn li. Surisadayi xa di Selumiyeli xa hadiya nan na ki.

⁴² Na lɔxɔɛ senni nde, Duweli xa di Eliyasafa fatanfe Gadi bɔnsɔɛ ra, ⁴³ a naxa fa

yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe horomolingira kui. E firin nafexi sansi xori dinxi ra, ture masunbuxi naxan na, alako a xa findi sansi serexe ra. ⁴⁴ A man naxa fa pooti keren na naxan yailanxi xeema giramu keme giramu fu nun naani ra, naxan nafexi surayi ra, ⁴⁵ a nun naxee bama serexe gan daaxi ra alo tuura keren, yexee kontonyi keren, nun yexee keren naxan xa simaya bara je keren li, ⁴⁶ a nun sikote naxan findima yunubi xafari serexe ra, ⁴⁷ a nun naxee bama xanunteya serexe ra alo ninge firin, yexee kontonyi suuli, nun yexee suuli naxee xa simaya bara je keren li. Duweli xa di Eliyasafa xa hadiya nan na ki.

⁴⁸ Na loxoe solofere nde, Amixudi xa di Elisama fatanfe Efirami bonsoe ra, ⁴⁹ a naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe horomolingira kui. E firin nafexi sansi xori dinxi ra, ture masunbuxi naxan na, alako a xa findi sansi serexe ra. ⁵⁰ A man naxa fa pooti keren naxan yailanxi xeema giramu keme giramu fu nun naani ra, naxan nafexi surayi ra, ⁵¹ a nun naxee bama serexe gan daaxi ra alo tuura keren, yexee kontonyi keren, nun yexee keren naxan xa simaya bara je keren li, ⁵² a nun sikote naxan findima yunubi xafari serexe ra, ⁵³ a nun naxee bama xanunteya serexe ra alo ninge firin, yexee kontonyi suuli, nun yexee suuli naxee xa simaya bara je keren li. Amixudi xa di Elisama xa hadiya nan na ki.

⁵⁴ Na loxoe solomasaxan nde, Pedasuru xa di Gamaliyeli fatanfe Manasi bonsoe ra, ⁵⁵ a naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe horomolingira kui. E firin nafexi sansi xori dinxi ra, ture masunbuxi naxan na, alako a xa findi sansi serexe ra. ⁵⁶ A man naxa fa pooti keren na naxan yailanxi xeema giramu keme giramu fu nun naani ra, naxan nafexi surayi ra, ⁵⁷ a nun naxee bama serexe gan daaxi ra alo tuura keren, yexee kontonyi keren, nun yexee keren naxan xa simaya bara je keren li, ⁵⁸ a nun sikote naxan findima yunubi xafari serexe ra, ⁵⁹ a nun naxee bama xanunteya serexe ra alo ninge firin, yexee kontonyi suuli, nun yexee suuli naxee xa simaya bara je keren li. Pedasuru xa di Gamaliyeli xa hadiya nan na ki.

⁶⁰ Na loxoe singe, Gideyoni xa di Abidan fatanfe Bunyamin bonsoe ra, ⁶¹ a naxa fa yi hadiyae ra: pileti keren naxan yailanxi gbeti kilo fu nun suuli ra, a nun pooti keren naxan yailanxi gbeti kilo keren na alo se maniyama ki naxe horomolingira kui. E firin

nafexi sansi x̣ori dinxi ra, ture masunbuxi naxan na, alako a xa findi sansi serexe ra. ⁶² A man naxa fa p̣ooti keren na naxan yailanxi x̣eema giramu keme giramu fu nun naani ra, naxan nafexi surayi ra, ⁶³ a nun naxee bama serexe gan daaxi ra alo tuura keren, yexee kontonyi keren, nun yexee keren naxan xa simaya bara je keren li, ⁶⁴ a nun sikote naxan findima yunubi xafari serexe ra, ⁶⁵ a nun naxee bama xanunteya serexe ra alo ninge firin, yexee kontonyi suuli, nun yexee suuli naxee xa simaya bara je keren li. Aminadabo xa di Naxason xa hadiya nan na ki.

⁶⁶ Na ḷox̣oe fu nde, Amisadayi xa di Axiyeseri fatanfe Dana ḅons̄oe ra, ⁶⁷ a naxa fa yi hadiyae ra: pileti keren naxan yailanxi gbeti kilo fu nun suuli ra, a nun p̣ooti keren naxan yailanxi gbeti kilo keren na alo se maniyama ki naxe h̄or̄om̄olingira kui. E firin nafexi sansi x̣ori dinxi ra, ture masunbuxi naxan na, alako a xa findi sansi serexe ra. ⁶⁸ A man naxa fa p̣ooti keren na naxan yailanxi x̣eema giramu keme giramu fu nun naani ra, naxan nafexi surayi ra, ⁶⁹ a nun naxee bama serexe gan daaxi ra alo tuura keren, yexee kontonyi keren, nun yexee keren naxan xa simaya bara je keren li, ⁷⁰ a nun sikote naxan findima yunubi xafari serexe ra, ⁷¹ a nun naxee bama xanunteya serexe ra alo ninge firin, yexee kontonyi suuli, nun yexee suuli naxee xa simaya bara je keren li. Amisadayi xa di Axiyeseri xa hadiya nan na ki.

⁷² Na ḷox̣oe fu nun keren nde, Okiran xa di Pagiyeli fatanfe Aseri ḅons̄oe ra, ⁷³ a naxa fa yi hadiyae ra: pileti keren naxan yailanxi gbeti kilo fu nun suuli ra, a nun p̣ooti keren naxan yailanxi gbeti kilo keren na alo se maniyama ki naxe h̄or̄om̄olingira kui. E firin nafexi sansi x̣ori dinxi ra, ture masunbuxi naxan na, alako a xa findi sansi serexe ra. ⁷⁴ A man naxa fa p̣ooti keren na naxan yailanxi x̣eema giramu keme giramu fu nun naani ra, naxan nafexi surayi ra, ⁷⁵ a nun naxee bama serexe gan daaxi ra alo tuura keren, yexee kontonyi keren, nun yexee keren naxan xa simaya bara je keren li, ⁷⁶ a nun sikote naxan findima yunubi xafari serexe ra, ⁷⁷ a nun naxee bama xanunteya serexe ra alo ninge firin, yexee kontonyi suuli, nun yexee suuli naxee xa simaya bara je keren li. Aminadabo xa di Naxason xa hadiya nan na ki.

⁷⁸ Na ḷox̣oe fu nun firin nde, Enan xa di Axira fatanfe Nafatali ḅons̄oe ra, ⁷⁹ a naxa fa yi hadiyae ra: pileti keren naxan yailanxi gbeti kilo fu nun suuli ra, a nun p̣ooti keren naxan yailanxi gbeti kilo keren na alo se maniyama ki naxe h̄or̄om̄olingira kui. E firin nafexi sansi x̣ori dinxi ra, ture masunbuxi naxan na, alako a xa findi sansi serexe ra. ⁸⁰ A man naxa fa p̣ooti keren na naxan yailanxi x̣eema giramu keme giramu fu nun naani ra,

naxan nafexi surayi ra, ⁸¹ a nun naxee bama serexe gan daaxi ra alo tuura keren, yexee kontonyi keren, nun yexee keren naxan xa simaya bara je keren li, ⁸² a nun sikote naxan findima yunubi xafari serexe ra, ⁸³ a nun naxee bama xanunteya serexe ra alo ninge firin, yexee kontonyi suuli, nun yexee suuli naxee xa simaya bara je keren li. Enan xa di Axira xa hadiya nan na ki.

⁸⁴ Isirayila kuntigie xa hadiya malanxie findixi yi nan na serexebade neene xa fe ra: pileti gbeti daaxi fu nun firin, pooti gbeti daaxi fu nun firin, nun pooti xeema daaxi fu nun firin. ⁸⁵ Pileti keren keren lanxi gbeti kilo keren nun a tagi nan ma. Pooti keren keren lanxi gbeti kilo keren nan ma. Se naxee yailanxi gbeti ra, nee lanxi kilo moxonon nun naani nan ma, alo se maniyama ki naxe horomolingira kui. ⁸⁶ Pooti xeema daaxi fu nun firin lanxi xeema giramu keme giramu fu nun naani nan ma, alo se maniyama ki naxe horomolingira kui. Na pooti fu nun firin lanxi xeema kilo keren nun a tagi nan ma. E birin nafexi surayi nan na. ⁸⁷ Serexe gan daaxi xuruse xasabi naxa lan tuura fu nun firin ma, a nun yexee kontonyi fu nun firin, nun yexee fu nun firin naxee xa simaya nu bara je keren li, a nun e xa sansi xori dinxi serexe. Yunubi xafari serexe xuruse xasabi naxa lan sikote fu nun firin ma. ⁸⁸ Xanunteya serexe xa xuruse xasabi naxa lan tuura moxonon nun naani ma, yexee kontonyi tongo senni, sikote tongo senni, nun yexee tongo senni naxee bara je keren soto. Nee nan findi hadiyae ra serexebade xa wali folo temui, ture seniyeenxi to sa a ma.

⁸⁹ Munsa to so horomolingira kui, e nun Alatala xa sumun, a naxa Alatala xui me saate kankira derakote fari, a masenyi tima a be maleke firinyie sawure tagi naxee na na kankira fari.

8

Lanpuie doxofo

¹ Alatala naxa a masen Munsa be, ² «A fala Haruna be, a xa lanpui solofere doxo alako e xa yanba e doxofo ya ra.» ³ Haruna a raba na ki ne. A naxa lanpui doxo alo Alatala a yamari ki naxe Munsa be. ⁴ Lanpuie doxofo nu rafalaxi xeema dinxi nan na, kelifa a san bunyi han a xun fuge, alo Alatala a masenxi Munsa be ki naxe.

⁵ Alatala naxa a masen Munsa be, ⁶ «Lewi bonsa ba Isirayilakae ya ma, i xa e raseniyeen. ⁷ I e raseniyeenma yi ki ne. Maraseniyeen ye makasan e ma. E xa e fate maxabe birin bi, e xa e xa dugie xa, alako e xa seniyeen. ⁸ Na xanbi, e xa tuura keren ba serexe ra,

a nun mengi naxan masunbuxi ture ra. I xa tuura gbete ba yunubi xafari serexe ra. ⁹ I xa Lewi bɔnsɔe nun Isirayilaka birin malan hɔrɔmɔlingira sode de ra. ¹⁰ Menni, Alatala ya xɔri, Isirayilakae xa e belexe sa Lewi bɔnsɔe mixie ma. ¹¹ Haruna nan fama e dentegede Alatala be e xa lu alo serexe Isirayilakae jɔxɔe ra. Na kui e noma Alatala xa wali rabade.»

¹² «Lewi bɔnsɔe mixie xa e belexe sa na tuura firinyie ma. Keren bama yunubi xafari serexe ra, boore bama serexe gan daaxi ra, alako e xa yunubie xa xafari. ¹³ Lewi bɔnsɔe na ti Haruna nun a xa die ya i, i xa e dentegɛ a serexe ki ma Alatala be. ¹⁴ A lima ne, na ki, i bara Lewi bɔnsɔe tan ba Isirayilakae ya ma, e xa findi n gbe ra.»

¹⁵ «I na ge e raseniyende serexe ki ma, Lewi bɔnsɔe fama ne sode e xa hɔrɔmɔlingira wali kui. ¹⁶ Isirayilakae na e ra naxee findixi n gbe ra Isirayila di singe birin jɔxɔe ra. ¹⁷ Isirayila di singe birin nun e xa xuruse di singe birin findixi n gbe nan na, kafi n sa Misirakae xa di singe birin faxesa temui naxe. ¹⁸ N naxa Lewi bɔnsɔe tongo Isirayila di singe birin jɔxɔe ra. ¹⁹ N bara e so Haruna nun a xa die yi ra Isirayilakae tagi, alako e xa hɔrɔmɔlingira wali raba Isirayilakae xili ra. E man xa yunubi xafari serexe ba Isirayilakae be, alako gbaloe yo naxa goro Isirayilakae ma e na makore yire seniyenxi ra temui naxe.»

²⁰ Munsa, Haruna, nun pama birin naxa na raba Lewi bɔnsɔe ra alo Alatala yamari ki naxe. ²¹ Lewi bɔnsɔe naxa e yete raseniyen, e naxa e xa dugie xa. Haruna naxa e dentegɛ Alatala be. A naxa e xa yunubi xafari serexe ba e be e xa seniyen. ²² Na to ba a ra, Lewi bɔnsɔe naxa fa e xa wali suxu hɔrɔmɔlingira xa fe ra Haruna nun a xa die xa yaamari bun ma, alo Alatala a yamari Munsa be ki naxe.

²³ Alatala naxa a masen Munsa be, ²⁴ «Lewi bɔnsɔe mixie xa simaya na je mɔxɔɔɔn nun suuli li, e noma hɔrɔmɔlingira wali suxude. ²⁵ E na je tongo suuli soto, e xa na wali lu naa. ²⁶ E noma e ngaxakerenyie malide na wali kui, kono e tan mu noma na rabade sonon. I xa na seriyee suxu Lewi bɔnsɔe xa fe ra hɔrɔmɔlingira wali rabafe ma.»

9

Saya Maleke Dangi Sali

¹ Isirayilakae to mini Misira boxi ma, e fa lu gbengberen yire je firin, na kike singe Alatala nu bara a masen Munsa be Sinayi gbengberenyi ma, ² «Isirayilakae xa Saya Maleke Dangi Sali raba ³ yi kike xi fu nun naani, soge dula temui alo a yamarixi ki

naxε.»

⁴ Munsa naxa a fala Isirayilakae be, a e xa Saya Maleke Dangi Sali raba. ⁵ E naxa na sali raba kike singe xi fu nun naani soge dula temui Sinayi gbengberenyi ma. E naxa a raba, alo Alatala a yamari ki naxε Munsa be.

⁶ Kono na loxoε, mixi ndee mu no Saya Maleke Dangi Sali raba barima e nu bara din mixi fure ra, e fa findi seniyentare ra na loxoε. Na loxoε kerenyi e naxa siga Munsa nun Haruna yire. ⁷ E a fala e be, «Muxu mu seniyen fure xa fe ra, kono munfe ra muxu mu lan muxu xa fa muxu xa hadiya ra Alatala be alo Isirayilaka birin?» ⁸ Munsa naxa e yaabi, «Wo mame ti sinden, n xa a mato Alatala naxan yamarima wo xa fe ra.» ⁹ Alatala naxa a masen Munsa be, ¹⁰ «Xa wo mu seniyen fure nde xa fe ra, xa na mu a ra wo na biyaasi kui, wo man noma Saya Maleke Dangi Sali rabade Alatala xa binye bun ma, keli wo tan ma han a sa wo bonsoε li. ¹¹ Kono e tan xa a raba kike firin nde xi fu nun naani soge dula temui. E yexee don a nun taami lebinitare nun burexe xone ra. ¹² A donxoε yo naxa lu han geesege. A xori fan mu iboma. E xa na sali raba a seriye ki ma. ¹³ Kono xa mixi seniyenxi naxan mu na biyaasi kui, a tondi Saya Maleke Dangi Sali rabade, na kanyi lanma a xa ba Alatala xa pama ya ma, barima a mu fa hadiya ra Alatala be a waxati. Na kanyi fama ne a xa yunubi sare sotoε.»

¹⁴ «Xa i xa xone nde wama Saya Maleke Dangi Sali rabafe, a xa a raba a seriye ki ma. Seriye naxan na taa kanyie ma, na seriye kerenyi nan luma na xone fan ma.»

¹⁵ Horomolingira ti loxoε, saate walaxee na dennaxe, nuxui nde naxa dusu na xun na. Keli nunmare han kuye iba, a nu na horomolingira fari, a maniyaxi te ra. ¹⁶ Temui birin a nu na na ki ne, nuxui nu na horomolingira fari yanyi ra, a fa yanba alo te koε ra. ¹⁷ Nuxui nefe keli horomolingira xun ma, Isirayilakae fan bara keli, e jere folo han a goro, e fa yonkin menni. ¹⁸ Na kui Isirayilakae nu jerema Alatala xa yaamari nan ma, e man nu yonkinma Alatala xa yaamari nan ma. Fanni nuxui na horomolingira xun ma, e fan yonkinma menni ne. ¹⁹ Xa nuxui sa bu horomolingira fari a gbe ra, Isirayilakae nu birama Alatala xa yaamari nan foxo ra, e lu menni. ²⁰ Temui ndee na nuxui mu buma, a keli. Isirayilakae nu luma Alatala xa yaamari nan bun ma, e fan keli, e yonkin nuxui yire. ²¹ Temui ndee nuxui bara lu yire xi keren, keli koε ra han kuye iba, a fa siga. A nefe keli, Isirayilakae fan bara keli, e bira a foxo ra. ²² Xa nuxui lu horomolingira xun ma xi firin, xa na mu kike keren, xa na mu je keren, Isirayilakae mu nu kelima e yonkinde, fo na nuxui na keli horomolingira xun ma temui naxe. ²³ E nu yonkinma Alatala xa yaamari

nan ma, e nu kelima Alatala xa yaamari nan ma. E nu birama Alatala xa yaamari nan fɔxɔ ra, a naxan fixi Munsa saabui ra.

10

Sara firin gbeti daaxi

¹ Alatala naxa a masen Munsa be, ² «I xa sara firin yailan gbeti bɔnbɔxi ra. E rawalima jama xilife ra malanyi. E man rawalima jama kelife ra biyaasi temui. ³ E firin na fe temui keren, jama birin xa malan i yire hɔrɔmɔlingira de ra. ⁴ Xa sara keren na fe, Isirayila yareratie nun kuntigie gbansan xa malan i yire.»

⁵ «Wo kelima biyaaside temui naxe, sarae xa fe keren. Na kui naxee dɔxɔxi sogetede, e xa siga. ⁶ Sarae na fe firin, naxee dɔxɔxi yirefanyi ma, nee fan xa siga. Sara xui a masenma jama siga temui bara a li. ⁷ Sara xui kepa gbete a masenma jama malan temui bara a li.»

⁸ «Haruna bɔnsɔe sɛrɛxɛdubee nan na sarae fema. Seriyɛ nan na ra wo tan nun wo bɔnsɔee be abadan. ⁹ Wo na wo yaxuie gere wo xa bɔxi ma temui naxe, wo xa na sarae fe. Alatala jɔxɔ sama ne wo xɔn, a wo ratanga wo yaxuie ma. ¹⁰ Wo xa sali lɔxɔe xungbee nun wo xa kike neene sali lɔxɔee, wo man xa na sarae fe wo sɛrɛxe gan daaxie nun xanunteya sɛrɛxee bama temui naxe. Na nan a niyama, n nan n jɔxɔ sama wo xɔn ma. N tan nan na wo Marigi Alatala ra.»

Isirayilakae tife kira xɔn ma

¹¹ Ne firin nde kike firin nde xi mɔxɔɲen lɔxɔe, nuxui naxan nu dɔxɔxi hɔrɔmɔlingira xun ma, Ala xa seede nu na dennaxe, a naxa pere folo. ¹² Na kui Isirayilakae naxa keli Sinayi gbengberenyi ma, e bira na nuxui fɔxɔ ra han a sa ti Paran gbengberenyi xun ma. ¹³ Alatala naxa e yamari Annabi Munsa saabui ra, e xa na biyaasi singe folo.

¹⁴ Yuda bɔnsɔe naxa ti yare, e xa tɔnxuma tixi e ya ra. E xunyi nu na Aminadabo xa di xeme Naxason nan na. ¹⁵ Suwara xa di xeme Netaneeli nu na Isakari bɔnsɔe xunyi ra. ¹⁶ Xelon xa di xeme Eliyabi nu na Sabulon bɔnsɔe xunyi ra. ¹⁷ Hɔrɔmɔlingira to mafagati, Gerison xa di xeme nun Merari xa di xeme naxa a xanin.

¹⁸ Ruben bɔnsɔe naxa bira e fɔxɔ ra, e xa tɔnxuma tixi e ya ra. Sedeyuri xa di xeme Elisuru nu na e xunyi ra. ¹⁹ Simeyɔn bɔnsɔe naxa bira e fɔxɔ ra. Surisadayi xa di xeme nan nu na e xunyi ra. ²⁰ Gadi bɔnsɔe naxa bira e fɔxɔ ra. Duweli xa di xeme

Eliyasafa nan nu na e xunyi ra. ²¹ Kehati xabile naxa bira e fɔxɔ ra hɔrɔmɔlingira se seniyeɲɛ ra. Booree tan lan nɛ e xa hɔrɔmɔlingira ti beenu Kehati xabile xa so. ²² Efirami bɔnsɔɛ naxa bira e fɔxɔ ra, e xa tɔnxuma tixi e ya ra. Amixudi xa di xeme Elisama nan nu na e xunyi ra. ²³ Manasi bɔnsɔɛ naxa bira e fɔxɔ ra. Pedasuru xa di xeme Gamaliyeli nan nu na e xunyi ra. ²⁴ Gideyoni xa di xeme Abidan nu na Bunyamin bɔnsɔɛ xunyi ra. ²⁵ Dana bɔnsɔɛ naxa jɛrɛ e birin xanbi ra, e xa tɔnxuma tixi e ya ra. Amisadayi xa di xeme Axiyeseri nan nu na e xunyi ra. ²⁶ Okiran xa di xeme Pagiyele nan nu na Aseri bɔnsɔɛ xunyi ra. ²⁷ Enan xa di xeme Axira nan nu na Nafatali bɔnsɔɛ xunyi ra. ²⁸ Isirayilakae nu jɛrema na ki nɛ e gali ki ma.

Kelife Sinayi geya

²⁹ Munsa naxa a fala a bitanyi Reyuweli Madiyanka xa di xeme Xobabo bɛ, «Muxu na sigafe Alatala dennaxan laayidixi muxu bɛ. I fan xa fa. Na findima sɔɔneya ra i bɛ, barima Alatala bara laayidi tongo a fe fanyie rabama nɛ Isirayila bɛ.» ³⁰ Xobabo naxa a yaabi, «Ade, n xa gbilen n xɔnyi n ma mixie tagi.» ³¹ Munsa naxa a maxandi, «Yandi, i naxa keli muxu xun ma. I tan nan yi gbengberenyi birin kolon muxu nɔma yonkinde dennaxe. I findima muxu rapɛrema nan na. ³² Xa i muxu matima, muxu i kima nɛ heeri ra Alatala naxan fama fide muxu ma.»

³³ E naxa keli Alatala xa geya bun ma, e xi saxan jɛrɛ raba. Alatala xa saate kankira nu tixi e ya ra na xi saxan bun ma yonkinde fenfe ra. ³⁴ E to nu kelima e yonkinde, Alatala xa nuxui nu tixi e xun ma fɛɛpenyi kui. ³⁵ E to nu saate kankira rakelima temui naxe, Munsa nu a falama, «Alatala, i xa keli, i xa i yaxuie rayensen. Naxee i xɔnxi, nee fan xa e gi i ya ra.» ³⁶ E to nu saate kankira ragoroma temui naxe, Munsa nu a falama, «Alatala, i xa i magoro Isirayila jama wuyaxi tagi.»

11

Isirayilakae mawafe

¹ Lɔxɔɛ nde, jama naxa e mawa e xa tɔrɛ xa fe ra Alatala ya i. Alatala naxa xɔnɔ na fe ma, a fa tɛ rasin jama tagi, a yire nde gan yonkinde sɛeti ma. ² Nama to gbelegbele Munsa bɛ, a naxa Alatala maxandi. Na kui tɛ naxa xuben. ³ E naxa na yire xili sa Tabera, na nan na ki «Tɛ mankanɛ», barima Alatala nu bara tɛ rasin e tagi.

⁴ Mixi kobi ndee to wa donse mɔoli gbete xɔn ma, Isirayilakae man naxa e mawa, a falafe ra, «Muxu wama sube nan xɔn! ⁵ Muxu muxu ratuma na donse fanyi ma muxu

naxan soto Misira boxi ma kabiri xanbi, alo yexe, kaakunboosi, basiketi, yebe, nun yebe maniyε. ⁶ Kono yakosi donse xoli mu na muxu ma, barima «mana» donse nan tun na be.»

⁷ Na «mana» nu luxi ne alo funden xori fiixe. ⁸ Nama nu minima a matongode, e fa a din geme ra, xa na mu, mulunyi kui. E nu leki yailanma a ra. A nu luxi alo ture nu na a ma. ⁹ Mana nu goroma xini goro temui.

¹⁰ Munsa naxa jama wa xui rame. Mixi birin nu e mawama e xonyi. Alatala naxa xono ki fanyi ra. Munsa naxa kontofili. ¹¹ A naxa Alatala maxarin, «N Marigi, munfe ra i bara yi kontofili lu i xa konyi ma? N munse rabaxi naxan a niyama i xa yi jama xa kote dexo n xun ma? N tan nan nu wama a xon? ¹² N tan nan e barixi? Munfe ra i bara e sa n belexe, n xa e xanin boxi ma i naxan laayidixi e benbae be, alo dinge a xa di xaninma ki naxe? ¹³ N sube sotoma minden yi jama birin be? E e mawama e wama sube xon. ¹⁴ N keren mu noma yi jama birin xa kote ra, a binya n be. ¹⁵ Faxε nan fisa na kote be. Xa n ma fe rafa n i ma, i naxa n xun nakana.»

¹⁶ Alatala naxa a masen Munsa be, «Isirayila fori tongo solofere malan n be, i naxee kolon taa yareratε nun kuntigie ra. E xa e malan hɔrɔmɔlingira de ra i seeti ma. ¹⁷ N fama gorode i yire, won xa woyen. N Xaxili Seniyenxi naxan fixi i ma, n na nde bama i ma, n xa na sa e fan ma, alako i keren naxa yi jama xa kote xanin sonon. Wo nun na kuntigie nan a xaninma fa.»

¹⁸ «A fala jama be, «Wo xa wo yete raseniyen, barima tina wo sube donma ne. Alatala bara wo wa xui me, a falafe ra, “Muxu wama sube nan xon ma. Lufe Misira nan fisa.” Alatala fama sube fide wo ma wo naxan donma. ¹⁹ Kono wo mu a donma xe xi keren, xa na mu xi firin, xa na mu xi suuli, xa na mu xi fu, xa na mu xi mɔxɔjen. ²⁰ Wo a donma ne han kike keren, han a mini wo jɔε kui, han a rapaaxu wo ma, barima wo bara Alatala rabepin, naxan na wo ya ma. Wo bara wo mawa a falafe ra, “Munfe ra muxu minixi Misira?”»»

²¹ Munsa naxa a masen Alatala be, «I a falama i sube fima yi jama ma kike keren bun ma? N na xeme wulu keme senni nan ya ma. ²² Xuruse gɔɔre mu noma e ralide sube ra. Hali yexe naxee na baa ma, e mu noma e ralide.» ²³ Alatala naxa a yaabi, «N senbe xurun na rabade? I fama a kolonde xa n ma woyenyi findixi nondi nan na.»

²⁴ Munsa naxa siga Alatala xa masenyi dentegede jama be. A naxa jama forie mixi tongo solofere malan Ala xa hɔrɔmɔlingira rabilinyi. ²⁵ Alatala naxa goro nuxui kui,

a masen yi ti Munsa be. A naxa a yete Xaxili Seniyenxi nde tongo naxan nu na Munsa ma, a a sa na fori mixi tongo solofere ma. Na Xaxili Seniyenxi to goro e ma, e naxa so masen yi tife Ala xili ra, kono e mu a ikuya.

²⁶ Kono xeme firin nu na na fori tongo solofere ya ma naxee mu siga malanyi. E mu siga horomolingira yire, e naxa lu yonkinde kui. Kono Ala Xaxili Seniyenxi naxa goro e fan ma, e fa masen yi ti Ala xili ra pama tagi. ²⁷ Fonike nde naxa a gi, a sa a fala Munsa be, «Eledade nun Medadi na masen yi tife Ala xili ra pama tagi.» ²⁸ Nunu xa di xeme Yosuwe, naxan nu Munsa malima kafi a fonike temui, a naxa a fala Munsa be, «N marigi, i xa na fe rapon.» ²⁹ Munsa naxa a yaabi, «I tone tife n tan ma fe ra? A xoli n ma Alatala xa pama birin findi namiponmee ra naxee bara Ala Xaxili Seniyenxi soto!» ³⁰ Na temui, Munsa nun Isirayila kuntigie naxa gbilen pama ya ma.

³¹ Alatala naxa foye xungbe ramini kelife baa ma, naxan xoni gbegebe radin pama yonkinde rabilinyi, han kelife yonkinde tagi, a sa doko feepen keren jere ra. ³² Nama naxa feepen na xonie matongo ra, han na kuye iba. E man naxa feepen xonie matongo ra, han kankan naxa paani ya fu soto, litiri keme saxan tongo suuli sama paani naxan kui. E naxa e rafen e xa yonkinde rabilinyi. ³³ Kono beenu Isirayilakae xa ge na sube donde, Alatala naxa kono e ma, a e jaxankata a xoxoxe ra. ³⁴ E naxa na yire xili sa Kibiroti Hataawa, na nan na ki «milante gaburi», barima milante gali nan nagata menni. ³⁵ Nama naxa keli Kibiroti Hataawa, e sa yonkin Xaseroti.

12

Mariyama nun Haruna Munsa xili kanafe

¹ Munsa to nu bara Kusi gine doko, Mariyama nun Haruna naxa Munsa mafala, ² a falafe ra, «Alatala woyenma Munsa gbansan saabui ra? A mu woyenma muxu fan saabui ra?» Alatala naxa na masen yi me. ³ Munsa nu findixi yete magoroe nan na dangife mixi birin na.

⁴ Alatala naxa Munsa, Haruna, nun Mariyama xili keren na, a e birin xa siga horomolingira. E to siga naa, ⁵ Alatala naxa goro nuxui kui horomolingira de ra. A naxa Haruna nun Mariyama xili. E firin naxa e maso a ra. ⁶ Alatala naxa a masen e be, «Wo tuli mati n ma masen yi ra. N namiponme xema wo ya ma temui naxe, n nan n yete masenma na kanyi be laamatunyi nan kui. N woyen a ra xiye ra. ⁷ Kono n ma konyi Munsa tan gbe mu na na ki xe. A tan findixi mixi dugutegexi nan na n ma wali birin kui.

⁸ N na n ma masenyi makenenma a be, n mu taali woyenyi rawalima muxu tagi. N nan n yete masenma a be, a fa n niini igbema. Munfe ra wo mu gaaxu n ma konyi Munsa mafalafe ra?»

⁹ Alatala naxa xono e ma, a fa keli e xun ma. ¹⁰ Nuxui to keli horomolingira xun ma, Mariyama fate naxa rafiixe kune ra keren na. Haruna to a to, kune na Mariyama fate birin ma, ¹¹ a naxa Munsa mayandi, «Yandi, n marigi, i naxa muxu raton muxu xa yunubi xa fe ra, muxu naxan nabaxi muxu xa xaxilitareja kui. ¹² Mariyama naxa lu alo di naxan faxaxi a nga furi, naxan fate seeti boroxi beenu a bari temui.» ¹³ Munsa naxa a xui rate Alatala ma, «N Marigi, n bara i maxandi, a rayalan!» ¹⁴ Alatala naxa a yaabi, «Xa a baba deye boxun a ya tagi, a mu yaagima xe han loxun keren? I xa a ramini jama ya ma. A na ge loxun keren nabade jama yonkinde fari ma, wo noma a rasode wo ya ma.» ¹⁵ Na kui, e naxa a ramini jama ya ma, a xi solofere raba yonkinde fari ma. Nama mu keli e yonkinde han Mariyama naxa ragbilen e ya ma. ¹⁶ Na to ba a ra, jama naxa keli Xaseroti, e naxa sa yonkin Paran gbengberenyi ma.

13

Kanaan boxi rabenfe

¹ Alatala naxa a masen Munsa be, ² «I xa yarerati keren keren sugandi bonsoe birin ya ma, i xa e xee Kanaan boxi ma, e xa sa na boxi raben, n naxan fima Isirayilakae ma.» ³ Munsa naxa na mixie xee kelifa Paran gbengberenyi ma, alo Alatala a yamarixi ki naxe. Na mixi birin findi Isirayila kuntigie nan na. ⁴ E xilie nan yi ki:

Kelifa Ruben bonsoe ma, Sakuru xa di xeme Samuwa.

⁵ Kelifa Simeyon bonsoe ma, Xori xa di xeme Safati.

⁶ Kelifa Yuda bonsoe ma, Yefune xa di xeme Kalebi.

⁷ Kelifa Isakari bonsoe ma, Yusufu xa di xeme Yigali.

⁸ Kelifa Efirami bonsoe ma, Nunu xa di xeme Hoseya.

⁹ Kelifa Bunyamin bonsoe ma, Rafu xa di xeme Paliti.

¹⁰ Kelifa Sabulon bonsoe ma, Sodi xa di xeme Gadiyeli.

¹¹ Kelifa Yusufu xa di, Manasi bonsoe ma, Susi xa di xeme Gadi.

¹² Kelifa Dana bonsoe ma, Gemali xa di xeme Amiyeli.

¹³ Kelifa Aseri bonsoe ma, Mikayeli xa di xeme Seturu.

¹⁴ Kelifa Nafatali bonsoe ma, Fofisi xa di xeme Naxabi.

¹⁵ Kelife Gadi bɔnsɔɛ ma, Maki xa di xɛmɛ Geyuweli.

¹⁶ Xɛmɛ xilie nan na ki Munsa naxee xɛɛ Kanaan bɔxi rabende. Munsa naxa Nunu xa di xɛmɛ Hoseya xili sa Yosuwe.

¹⁷ Munsa to e xɛɛ Kanaan bɔxi rabende, a naxa a fala e bɛ, «Wo xa mini Negewi gbengberenyi biri, han wo geyae yire li. ¹⁸ Wo xa na bɔxi raben, wo xa a kolon xa mennikae senbɛ gbo, xa e senbɛ mu gbo, xa e wuya, xa e mu wuya. ¹⁹ Wo xa a mato xa na bɔxi fan. Wo xa a kolon xa tete na na taae rabilinyi ma. ²⁰ Wo xa a mato xa na bɔxi fan sansi bɛ, xa wurie gbo naa. Wo kata wo xa fa na sansi bogi ndee ra.» Weni bilie bogi singe temui nan nu a ra.

²¹ E naxa sa na bɔxi raben, kelife Sini gbengberenyi ma, han Rexobo, Xamata mabiri. ²² E naxa dangi Negewi gbengberenyi ra, e sa Xebiron li, Anaki xa die Aximan, Sesayi, nun Talamayi nu sabatixi dennaxe. Xebiron taa nu tixi jɛ solofere beenu Sowan taa xa ti Misira. ²³ E to Esekoli geya li, e naxa weni bili salonyi nde rasege, a tɔnsɔɛ nu na naxan ma. Mixi firin naxa na xanin wuri kuye ra. E naxa xɔrɛ bogi nde fan tongo, a nun bogise nde naxan xili girenadi, naxan maniye kɔɔbɛ ra. ²⁴ E naxa na yire xili sa Esekoli, na nan na ki «Tɔnsɔɛ yire», na weni bogi tɔnsɔɛ xa fe ra, e naxan baxi.

²⁵ E to xi tongo naani raba naa na bɔxi rabende, e naxa gbilen ²⁶ Munsa, Haruna, nun Isirayila pama yire. E nu na Kadesi, Paran gbengberenyi ma. Menni e naxa dentɛge sa, e na bɔxi sansi bogie masen e bɛ. ²⁷ E naxa a fala Munsa bɛ, «Muxu so nɛ bɔxi ma, i muxu xɛɛ dennaxe. Bɔxi nan a ra, kumi nun xije xeleva dennaxe. Na bogise ndee nan ya. ²⁸ Kɔnɔ pama naxan sabatixi na bɔxi ma, e senbɛ gbo. Tete dɔxɔxi taa birin na. Taa xungbe nan e ra. Muxu Anaki bɔnsɔɛ yati toxi nɛ naa. ²⁹ Amalekikae sabatixi Negewi gbengberenyi nan ma. Xitikae, Yebusukae, nun Amorikae, nee nan sabatixi geya yire. Kanaankae tan sabatixi baa de nan na, a nun Yuruden xure de ra.»

³⁰ Kalebi naxa pama masabari Munsa ya xɔri, a falafe ra, «Won xɛɛ! Won xa yi bɔxi findi won gbe ra. Won nɔma na rabade.» ³¹ Kɔnɔ boore naxee siga bɔxi rabende, nee naxa a fala, «Won mu nɔma sigade na pama gereɗe. E senbɛ gbo won bɛ!» ³² Na kui e naxa fe jaaxi fala na bɔxi xa fe ra Isirayila pama bɛ. E naxa a fala, «Muxu bɔxi naxan nabenxi, bɔxi nan a ra naxan mixi faxama. Mixi gbangbalanyie sabatixi naa. ³³ Muxu anabiyoroɗe to nɛ naxan fatanxi Anaki bɔnsɔɛ ra. Muxu nu luxi nɛ alɔ katoe e mabiri. E tan yo, muxu tan yo, e birin a to nɛ na ki nɛ.»

Isirayilakae Ala matandife

¹ Nama naxa wa xui ramini kɔɛ ra. ² Isirayilaka birin nu fa wɔyɛn na Munsa nun Haruna ma, e nu a fala, «A nu fisa muxu xa faxa Misira, xa na mu a ra yi gbengberen yire. ³ Munfe ra Alatala muxu rasofe yi bɔxi ma, muxu xa faxa santidegema ra, muxu xa die nun muxu xa ginɛe xa suxu gere kui. A mu fisa muxu xa gbilen Misira?» ⁴ E naxa a fala e booree bɛ, «Won mange keren ti won xun na, won xa gbilen Misira.»

⁵ Munsa nun Haruna naxa e yatagi rafelen bɔxi ma Isirayilaka birin ya xɔri. ⁶ Nunu xa di xeme Yosuwe nun Yefune xa di xeme Kalebi naxa e xa donma ibɔɔ sunnunyi kui. Na mixi firin nu na na xɛɛrae ya ma, naxee siga Kanaan bɔxi rabende. ⁷ E naxa fa yi masenyi ti jama bɛ, «Muxu bɔxi naxan matoxi, bɔxi fanyi fanyi nan a ra. ⁸ Xijɛ nun kumi yire nan a ra. Xa Alatala na won bɛ, a won nasoma nɛ naa, a na bɔxi fi won ma. ⁹ Yandi, wo naxa Alatala matandi. Wo naxa gaaxu na bɔxi mixie ya ra. Won nɔma nɛ e ra. E sanke yo mu na sɔnɔn, barima Alatala na won tan nan bɛ. Wo naxa gaaxu e ya ra.»

¹⁰ Nama nu wama e magɔnɔfe, kɔnɔ Alatala xa nɔrɛ naxa mini hɔrɔmɔlingira Isirayilaka birin ya xɔri. ¹¹ Alatala naxa a masen Munsa bɛ, «Yi jama bama n maberefe mun temui? Munfe ra e siikema hali n kaabanakoe rabama e tagi? ¹² N xa wuganyi radin e ma, n nee faxa. Na temui n bɔnsɔɛ xungbe senbema nde rakelima nɛ i saabui ra, naxan dangi e tan na.»

¹³ Munsa naxa Alatala yaabi, «Misirakae bara a kolon, a i yi jama ramini e xa bɔxi ra i senbɛ nan na. ¹⁴ E bara bekae a rakolon. Nee bara a mɛ, a i tan Alatala na i xa jama fɔxɔ ra, a i minima e ma, a i nuxui sama e xun ma, a i jɛrema e ya ra nuxui kui yanyi ra, nun tɛ kui kɔɛ ra. ¹⁵ Xa i fa yi jama birin faxa kerenyi ra, bɔnsɔɛ naxee i xa fe mexi, e a falama nɛ, ¹⁶ «Alatala senbɛ yo mu nu nɔma yi jama rasode bɔxi ma, a naxan laayidixi e bɛ. Na nan a ra, a e birin sɔntɔ gbengberenyi ma.» »

¹⁷ «I xa i senbɛ masen e bɛ, alɔ i tan yati a yitaxi ki naxɛ, a falafe ra, ¹⁸ «N mu xɔnɔma mafuren mafuren. N ma diɛ nun fanyi gbo. N mixie xa yunubie nun fe jaaxie xafarima. Kɔnɔ n mixi kobi nun mixi fanyi tagi rasama. N benbae xa yunubi sare dɔxɔma e xa die xun ma han bɔnsɔɛ saxan, xa na mu naani.» ¹⁹ Yandi, n bara i maxandi, diɛ i xa jama xa yunubi ma i xa hinne xa fe ra, alɔ i a rabaxi kabi e mini Misira temui naxɛ.»

²⁰ Alatala naxa a yaabi, «N bara diɛ i xa maxandi xa fe ra. ²¹ Kɔnɔ, n bara n kali,

nɔndi nan a ra aɔ n to na na, aɔ n ma nɔrɛ naxan bɔxi rafema, ²² xeme naxan birin n ma nɔrɛ nun n ma kaabanakoe toxi, n naxee raba Misira nun gbengberenyi ma, naxee murutaxi n ma han sanya fu tuli xɔrɔxɔɛ ra, ²³ nee sese mu bɔxi toma, n naxan laayidixi e benbae be. Naxan birin murutaxi n ma, e sese mu na toma. ²⁴ Kɔnɔ n ma konyi di Kalebi to bira xaxili gbete fɔxɔ ra, a fa n nabatu, n a tan nasoma ne na bɔxi ma, a naxan nabenxi. A bɔnsɔɛ ke sɔtɔma ne naa. ²⁵ Amalekikae nun Kanaankae to sabati gulunba kui, tina wo xa wo mafindi, wo xa gbilen gbengberenyi ma Xulunyumi Baa mabiri.»

²⁶ Alatala naxa a masen Munsa nun Haruna be, ²⁷ «Yi jama kobi n matandima han mun temui? N bara Isirayilakae xui me, e naxan falama n kanke ma. ²⁸ A fala e be, «N bara n kali, nɔndi nan a ra, aɔ n to na na, n a rabama ne wo be aɔ n a mexi wo de i ki naxe. ²⁹ Wo tan matandilae, naxan birin kontixi Isirayila jama ya ma, naxee xa simaya bara dangi je mɔxɔɲen na, wo faxama ne yi gbengberenyi ma. ³⁰ Wo mu soma bɔxi ma n naxan laayidi wo be, fo Yefune xa di xeme Kalebi nun Nunu xa di xeme Yosuwe. ³¹ Wo xa die, wo naxee ma a e birin faxama gere nan kui, n nee tan nasoma ne na bɔxi kui, wo meexi naxan na. ³² Wo faxama gbengberenyi nan ma, wo furee luma na. ³³ Wo xa die findima jeretie nan na je tongo naani bun ma yi gbengberenyi ma. E wo xa yunubi sare xaninma han wo birin faxa gbengberenyi ma. ³⁴ Wo xi xasabi naxan naba na bɔxi rabende, wo na je xasabi rabama gbengberenyi ma wo xa yunubi xa fe ra. Wo to xi tongo naani raba na bɔxi rabende, wo fama ne je tongo naani rabade gbengberenyi ma, alako wo xa a kolon n na yunubi xɔnxi ki naxe. ³⁵ N tan Alatala, n bara ge woyende. N bara na nate tongo yi jama kobi xa fe ra, naxan ti n kanke. E birin faxama ne gbengberenyi ma.» »

³⁶ Munsa xa xerae to gbilen kelifa na bɔxi rabende, e naxa fe xɔrɔxɔɛ fala na bɔxi xa fe ra han Isirayila jama naxa ti Munsa kanke. ³⁷ Na kui, Alatala naxa e faxa keren na. ³⁸ Na xerae ya ma, Yefune xa di xeme Kalebi nun Nunu xa di xeme Yosuwe nan gbansan mu faxa.

³⁹ Munsa to na masenyi ti Isirayila jama be, e naxa sunnun ki fanyi. ⁴⁰ E naxa keli subaxe, e xa te geya longori. E naxe, «Muxu xa te yire, Alatala dennaxe masenxi muxu be. Muxu bara yunubi raba.» ⁴¹ Munsa naxa e maxɔrin, «Wo Alatala xa yaamari nan matandife? Wo mu geenima na kui. ⁴² Wo naxa te de, barima Alatala mu na wo ya ma sɔnɔn. Wo naxa a niya wo yaxuie xa nɔ wo ra. ⁴³ Amalekikae nun Kanaankae na wo ya ra, e wo sɔntɔma ne e xa santidegemae ra. Wo to bara wo kobe so Alatala ra, a mu na wo

foxo ra.»

⁴⁴ Kono Isirayila jama mu e tuli mati Munsa ra. E naxa te geya yire, kono Alatala xa saate kankira nun Munsa mu keli jama xa yonkinde. ⁴⁵ Amalekikae nun Kanaankae naxee nu sabatixi na geya yire, e naxa goro Isirayilakae xili ma, e fa e bonbo, e e masege han Horoma.

15

Hadiya naxan sama serexee fari

¹ Alatala naxa a masen Munsa be, ² «A fala Isirayilakae be, <Wo na so boxi ma, n dennaxan fixi wo ma sabatide ra, ³ xa wo wama xuruse bafe serexe ra naxan nafan Ala ma, alo serexe gan daaxi, laayidi serexe, serexe janigexi, xa na mu a ra sali serexe, ⁴ wo xa sansi xori dinxi serexe sa na fari, naxan findima sansi xori dinxi luxutaxi kilo saxan masunbuxi ture litiri keren nun a tagi ra, ⁵ a nun weni litiri keren nun a tagi. Na sama serexe gan daaxi nun serexe janigexi xun ma naxan findima yexee ra. ⁶ Xa a sa findi yexee kontonyi nan na, wo xa sansi xori dinxi serexe sa na fari, naxan findima sansi xori dinxi luxutaxi kilo senni masunbuxi ture litiri firin na, ⁷ a nun weni litiri firin. Na ganxi rafan Ala ma.»»

⁸ «Xa wo wama ninge bafe serexe ra naxan nafan Ala ma, alo serexe gan daaxi, laayidi serexe, xanunteya serexe, ⁹ wo xa sansi xori dinxi serexe sa na fari, naxan findima sansi xori dinxi luxutaxi kilo solomanaani naxan masunbuxi ture litiri saxan na, ¹⁰ a nun weni litiri saxan. Na ganxi rafan Ala ma.»

¹¹ «Na nan nabama ninge, yexee kontonyie, yexeee, nun sie birin be wo naxan bama serexe ra. ¹² Wo xa na raba xuruse birin be. ¹³ Isirayilaka birin xa a raba na ki ne e xa serexe birin be, e naxan bama te ra Alatala be. ¹⁴ Xope naxee na wo ya ma, e fan xa a raba na ki e serexe gan daaxi bama temui naxe. Na rafan Ala ma. ¹⁵ Seriyen keren nan luma jama birin be, Isirayilakae ba, xope ba. Keli wo tan ma, han wo xa die, nun nee fan xa die naxee fama, wo tan yo, xope yo, wo birin xa Alatala xa seriyen suxu na ki ne. ¹⁶ Isirayilakae ba, xope ba, wo birin na seriyen keren nun yaamari keren bun ma.»

¹⁷ Alatala naxa a masen Munsa be, ¹⁸ «A fala Isirayilakae be, <Wo na so boxi ma, n wo rasofe dennaxe, ¹⁹ wo fa na boxi daxamui soto, wo xa nde ba serexe ra n be. ²⁰ Wo na taami singe yailan sansi xori neene ra, wo xa nde ba serexe ra n be, alo wo sansi xori neene nde bama xe xaba temui lonyi yire. ²¹ Wo xa na taami singe ba Alatala be je yo

ƶε.››

Yunubi ƶanigetare

²² «Xa a sa li wo tantanxi ne Alatala xa yaamarie suxufe kui, a naxee masenxi Munsa be, ²³ kelifa na masen temui, han wo xa die xa mamadie temui, ²⁴ xa wo mu na raba wo ƶanige ra, wo a raba kolontareya kui, ƶama xa tuura ba serexe gan daaxi ra, naxan nafa Alatala ma. Wo xa sansi xori dinxi serexe nun weni serexe sa na fari a raba ki ma, a nun sikote naxan findima yunubi xafari serexe ra. ²⁵ Serexedube yunubi xafari maxandima ne Isirayilaka birin be. Alatala dipema ne e ma. Yunubi nan a ra, e mu naxan ƶanigexi. E man bara serexe gan daaxi ba Alatala be, a nun e xa yunubi xafari serexe. ²⁶ Na yunubi xafarima ne Isirayilaka birin nun e xa xope be, barima tantanyi na nu a ra.»

²⁷ «Xa mixi keren nan yunubi raba ƶanigetareƶa kui, a xa si gine keren ba yunubi xafari serexe ra, naxan bara ƶe keren soto. ²⁸ Serexedube yunubi xafari maxandima ne na mixi be naxan yunubi raba ƶanigetareƶa kui Alatala ya xori. Na na ƶon, a xa yunubi bara xafari. ²⁹ Na seriye kerenyi na Isirayilakae nun e xa xope be, yunubi rabafe ƶanigetareƶa xa fe ra. ³⁰ Kono xa mixi nde sa Alatala matandi a ƶanige ra, a findi Isirayilaka ra, a findi xope ra, na kanyi kerima ne ƶama tagi. ³¹ A bara Alatala xa masenyi mabere, a bara Alatala xa seriye matandi. Na kanyi kerima ne ƶama tagi, barima na yunubi kote dodoxi a xun ma.»

Malabu loxo kanafe

³² Isirayilakae to nu na gbengberenyi ma, e naxa mixi nde li malabui loxo a yege fenfe. ³³ E naxa a xanin Munsa nun Haruna xon ƶama ya xori. ³⁴ E naxa a suxu, kono e mu a ƶaxankata, barima nate mu nu tongoxi a xa fe ra sinden. ³⁵ Alatala naxa a masen Munsa be, «Yi xeme lan ne a xa faxe. ƶama birin xa a magono han a faxe yonkinde fari ma.» ³⁶ ƶama birin naxa a ramini e yonkinde fari ma, e a magono han a faxe, alo Alatala a yamari Munsa be ki naxe.

Sosee xa seriye

³⁷ Alatala naxa a masen Munsa be, ³⁸ «A fala Isirayilakae be, e tan nun e xa die xa mamadie e xa e xa sosee san bunyi rafutufutu, e gese gere daaxi xiri a de i. ³⁹ Na san bunyi rafutufutuxi findima tonxuma ra wo be, alako wo xa ratu Alatala xa yaamarie ma, wo man xa e rabatu. Wo naxa bira wo yete waxonfee foxo ra, naxee wo ratantanma. ⁴⁰ Na nan a niyama, wo ratuma n ma yaamarie ma, wo man e rabatu. Na kui, wo bara findi

n ma mixie ra. ⁴¹ N tan nan Alatala ra, wo Marigi Ala, naxan wo ramini Misira bɔxi ra, alako n xa findi wo Marigi Ala ra. N tan nan Alatala ra, wo Marigi Ala.»

16

Kora Munsa matandife

¹ Lewi bɔnsɔɛ mixi nde, naxan xili Kora, Yisehari xa di xemɛ, Kehati xa mamadi, a nun Datan nun Abirami, Eliyabi xa di xemɛ, a nun Peleta xa di xemɛ Oni, naxan fatanxi Ruben bɔnsɔɛ ra, ² nee naxa ti Munsa kanke. Isirayilaka mixi kemɛ firin mixi tongo suuli nu na e xanbi ra. Kuntigi belebelee nu na e ya ma. ³ E naxa e malan Munsa nun Haruna xili ma, e fa a fala e bɛ, «Wo xa mangɛya bara ɲɔn! Isirayila pama birin seniyen, Alatala man na muxu tagi. Munfe ra wo tan gbansan wo yete itema Alatala xa pama xun ma?»

⁴ Munsa to na mɛ, a naxa a yatagi rafelen bɔxi ma. ⁵ A naxa a fala Kora nun a xa mixie bɛ, «Tina geesege, Alatala fama a masende won bɛ, a xa mixi seniyenxi na naxan na. A tinma na kanyi xa makɔrɛ a ra, a naxan sugandima. ⁶ Kora, i nun i xa mixie, wo xa surayi gansee tongo. ⁷ Tina wo tɛ sa e kui, wo surayi gan Alatala bɛ. Alatala na naxan sugandi, na nan seniyen. Lewi bɔnsɔɛ, yakɔsi wo bara a radangi a i.»

⁸ Munsa man naxa a fala Kora bɛ, «Lewi bɔnsɔɛ xa die, wo wo tuli mati. ⁹ Isirayila Marigi Ala wo sugandixi nɛ Isirayila pama ya ma a xa hɔrɔmɔlingira wali xa fɛ ra. Wo tan tima pama ya ra e sali temui. Na mu wo wasa? ¹⁰ A tinma wo tan Lewi bɔnsɔɛ xa makɔrɛ a ra, kɔnɔ wo wama sɛrɛxɛdubɛ wali fan nan nabafe. ¹¹ Na kui i tan nun i xa mixie, wo bara lan wo boore ma wo xa Alatala matandi. Munfe ra wo na tife Haruna kanke?»

¹² Munsa naxa mixi xɛɛ Eliyabi xa di xemɛ Datan nun Abirami xilide, kɔnɔ e naxa tondi, a fa a fala, «Muxu tan mu sigama. ¹³ Munfe ra i bara muxu ramini bɔxi ma, kumi nun xijɛ xeleva dennaxe, alako muxu xa faxa yi gbengberenyi ma? I man wama i yete findife muxu xa mange ra? ¹⁴ I mu muxu rasoxi bɔxi kui kumi nun xijɛ xeleva dennaxe. I mu xɛɛ nun weni bilie xa fixi muxu ma kɛ ra. I ɲɔxɔ a ma, a i nun dɔnxuie nan a ra? Muxu mu sigama!» ¹⁵ Munsa naxa xɔnɔ ki fanyi ra, a a fala Alatala bɛ, «I naxa e xa sɛrɛxɛ suxu. N mu sese tongoxi e yi ra, hali sofale keren. N mu fɛ ɲaaxi yo rabaxi e ra.»

¹⁶ Munsa naxa a fala Kora bɛ, «I tan nun i xa mixie, tina wo nun Haruna xa ti be

Alatala ya i. ¹⁷ Wo birin xa wo xa surayi gansee tongo, wo xa surayi sa a ma, wo wo yete masen Alatala be. Na lanma surayi ganse keme firin tongo suuli ma. I tan nun Haruna, wo fan xa wo xa surayi ganse suxu wo yi ra.» ¹⁸ E birin naxa te dɔɔ e xa surayi gansee kui, e naxa surayi sa a ma, e fa ti hɔrɔmɔlingira de ra. Munsa nun Haruna fan nu na naa. ¹⁹ Kora to jama birin malan Munsa nun Haruna xili ma hɔrɔmɔlingira de ra, Alatala xa nɔre naxa mini jama birin ma.

²⁰ Alatala naxa a masen Munsa nun Haruna be, ²¹ «Wo mini yi mixie ya ma. N xa e sɔntɔ keren na!» ²² Munsa nun Haruna naxa e yatagi rafelen bɔxi ma, e fa a fala, «Alatala, Daali birin Mange, a lanma i xa xɔnɔ jama birin ma, mixi keren xa yunubi xa fe ra?» ²³ Alatala naxa Munsa yaabi, ²⁴ «A fala jama birin be, e xa e makuya Kora, Datan, nun Abirami xɔnyi ra.»

²⁵ Munsa nun Isirayila kuntigie naxa siga Abirami nun Datan yire. ²⁶ A naxa a fala jama be, «Wo wo makuya yi yunubitɔee xa lingirae ra. Wo naxa din e xa see ra, alako wo naxa fa faxe e xa yunubie xa fe ra.» ²⁷ Nama naxa a masiga Kora, Datan, nun Abirami xa lingirae ra. Datan nun Abirami naxa mini e xɔnyi, e ti naade ra, e nun e xa ginɛe, nun e xa die.

²⁸ Munsa naxa a fala, «Wo a kolonma a Alatala nan n tixi yi wali birin na, n tan mu a ra. ²⁹ Xa yi mixie mu faxe kaabanakoe ra, Alatala mu n xɛxi. ³⁰ Kɔnɔ xa Alatala sa kaabanako raba, a bɔxi rabi, e goro e jipe ra a kui, e tan nun e ke birin, na nan a masenma wo be, a e bara Alatala mabere.»

³¹ Munsa to ge na falade, bɔxi naxa rabi e sanyi bun ma, ³² a e gerun, Kora nun a xa mixie, e xa lingirae, a nun e xa harige birin. ³³ E naxa goro aligiyama e jipe ra, e tan nun e sɔtɔse birin. Bɔxi naxa e makoto, e naxa lɔe jama tagi. ³⁴ Isirayilaka naxan birin nu na e seeti ma naxa e gi e gbelegbele xui ma, e nu fa a fala, «Bɔxi naxa muxu fan gerun de!» ³⁵ Alatala naxa te radin na mixi keme firin mixi tongo suuli ma, naxee surayi gan hɔrɔmɔlingira de ra.

17

Nama raseniyenfe

¹ Alatala naxa a masen Munsa be, ² «A fala Haruna serɛxɛdube xa di xeme Eleyasari be, a xa surayi gansee matongo te xɔra, a xa e te wolee rawoli yire makuye. Na surayi gansee bara findi se seniyenxie ra Ala be. ³ Wo xa na surayi gansee matongo,

yunubitɔɛ naxee rawalixi e fa faxes, wo e bɔnbɔ han e findi kebela ra, wo e sa serexebade ma. Se seniyenxi na a ra barima a nu bara masen Alatala be. Na kui a findi tɔnxuma ra Isirayilakae be.» ⁴ Eleyasari serexedube naxa na mixie xa surayi ganse wure gbeeli daaxie matongo, na mixi faxaxie naxee rawalixi, a e bɔnbɔ han e findi kebela ra, a e sa serexebade ma. ⁵ Na bara findi tɔnxuma ra Isirayilakae be, alako e xa ratu a ma a mu lan mixi yo xa surayi gan serexe ra bafe Haruna xa die, xa na mu a ra a fan luma ne alo Kora nun a xa mixie, alo Alatala a masenxi Munsa be ki naxe.

⁶ Na kuye iba, Isirayila pama naxa wɔyen folo Munsa nun Haruna ma, a e tan nan Alatala xa pama faxaxi. ⁷ E nu e malanfe temui naxe Munsa nun Haruna xili ma, e naxa a to nuxui naxa dusu hɔrɔmɔlingira xun ma, Alatala xa nɔre fa mini e ma.

⁸ Munsa nun Haruna naxa siga hɔrɔmɔlingira de ra. ⁹ Alatala naxa a masen Munsa be, ¹⁰ «Wo mini yi mixie ya ma, n xa e sɔnto kerenyi ra.» Munsa nun Haruna naxa e yatagi rafelen bɔxi ma, ¹¹ Munsa fa a fala Haruna be, «I xa te wole tongo serexebade yire, i a sa i xa surayi ganse kui a nun surayi nde. Na xanin mafuren mafuren pama mabiri, i sa yunubi xafari maxandi e be. Alatala bara a xa xone fulun yi pama xili ma, sɔntɔe jan bara folo.»

¹² Haruna naxa surayi ganse tongo alo Munsa a fala a be ki naxe, a a gi pama yire, sɔntɔe nu bara folo dennaxe. A naxa surayi ba serexe ra, a fa yunubi xafari maxandi pama be. ¹³ A naxa ti mixi faxaxie nun mixi pijee tagi. Mixi faxafe naxa dan. ¹⁴ Mixi wulu fu nun naani mixi keme solofere nan faxes, bafe Kora xa mixie ra, naxee singe faxes. ¹⁵ Mixi faxafe to dan, Haruna naxa gbilen Munsa yire hɔrɔmɔlingira de ra.

Haruna xa yisuxuwuri

¹⁶ Alatala naxa a masen Munsa be, ¹⁷ «A fala Isirayilakae be, bɔnsɔe xunyi birin xa yisuxuwuri keren so i yi ra, na lanma yisuxuwuri fu nun firin nan ma. I xa bɔnsɔe birin xili sebe a xa yisuxuwuri ma. ¹⁸ I xa Haruna xili sebe Lewi bɔnsɔe xa yisuxuwuri ma. Bɔnsɔe xunyi birin xa yisuxuwuri xa lu naa. ¹⁹ I na yisuxuwurie sama hɔrɔmɔlingira nan kui, saate kankira ya tode ra, n luma n yete masen na wo be dennaxe. ²⁰ N mixi naxan sugandixi, na kanyi xa yisuxuwuri butunma ne. Na kui, n bara a niya Isirayilakae naxa wɔyen wo ma sɔnɔn.»

²¹ Munsa naxa dentege sa Isirayilakae be. Isirayila bɔnsɔe xunyi birin naxa fa e xa yisuxuwuri ra. Na naxa lan yisuxuwuri fu nun firin ma. Haruna gbe nu na e ya ma. ²²

Munsa naxa na yisuxuwurie sa Alatala ya i, hōrōmōlingira kui, saate kankira na dēnnaxē. ²³ Na kuye iba, a to so hōrōmōlingira kui, a naxa a to Haruna xa yisuxuwuri, naxan sa Lewi bōnsōe xili ra, bara butun, a fuga, a tamare bogi gbeeli ramini. ²⁴ Munsa naxa yisuxuwuri birin namini, a e masen Isirayila jama bē. Bōnsōe xunyi birin to e to, e naxa e gbe tongo.

²⁵ Alatala naxa a masen Munsa bē, «I man xa Haruna xa yisuxuwuri ragbilen saate kankira yire, a xa ragata tōnxuma ra matandilae bē. Na kui e mu wōyenma n ma, e mu faxa.» ²⁶ Munsa naxa Alatala xa yaamari rabatu, alō a masen a bē ki naxē. ²⁷ Isirayilakae naxa a fala Munsa bē, «A mato, muxu birin jōnma nē halaki kui. ²⁸ Naxan yo a maso Alatala xa hōrōmōlingira ra, na kanyi faxama nē. Muxu birin xa sōnto?»

18

Serexedubēe nun Lewi bōnsōe xa fe

¹ Alatala naxa a masen Haruna bē, «I tan, i xa die, nun Lewi bōnsōe birin, wo tan nan yunubi sōtōma xa fe jaaxi sa raba hōrōmōlingira xa fe ra. Haruna i tan nun i xa die, wo tan nan yunubi sōtōma xa fe jaaxi sa raba serexedubēpa xa fe ra. ² I xa Lewi bōnsōe mixi birin maso i ra, alako e xa i tan nun i xa die mali wo xa wali ra hōrōmōlingira kui. ³ E i malima hōrōmōlingira wali kui, kōnō e naxa makōre yirabase seniyeñxie nun serexebade ra, alako wo naxa faxa, e tan nun i tan. ⁴ E birama nē i fōxō ra i xa hōrōmōlingira wali birin kui. Mixi gbete yo naxa sunbu wo ra. ⁵ Wo tan gbansan xa seniyeñ lingira nun serexebade wali raba, alako Alatala naxa fa a xa xōne ramini Isirayilakae ma sōnōn. ⁶ N tan nan wo ngaxakerenyi Lewi bōnsōe tongoxi Isirayilakae ya ma n yete bē. N bara e sa wo sagoe, e xa wo mali hōrōmōlingira wali raba ra. ⁷ I tan nun i xa die, wo jōxō sama nē wo xa serexedube wali xōn ma serexebade nun yire seniyeñxi fisamante, naxan na dugi gbakuxi xanbi ra. N tan nan na wali fixi wo ma. Mixi gbete na a maso na ra, a faxama nē.»

⁸ Alatala naxa a fala Haruna bē, «N bara Isirayilakae xa hadiya seniyeñxi birin fi i tan nun i xa die ma, barima wo tan nan sugandixi serexedubēe ra abadan. ⁹ See nan yi ki naxee findima i gbe ra se seniyeñxie tagi, te mu naxee ganxi: Isirayilakae xa serexē, e xa sansi xōri dinxi serexēe, e xa yunubi xafari serexēe, nun e xa haake serexēe. Na serexē seniyeñxie findima i tan nun i xa die nan gbe ra. ¹⁰ Wo nee donma nē alō se seniyeñxie. Xeme birin nōma e donde wo xa denbaya kui. Se seniyeñxie nan e ra wo bē.»

¹¹ «Se naxee baxi Isirayilakae xa hadiya seniyeñxe ra, n nee fan fima i ma, naxee lintanma n ya i a masenfe ra n gbe na a ra. N na fima i tan, i xa di xeme, nun i xa di ginnee ma. I xa mixi birin naxee seniyeñxi noma na donde. ¹² N man bara daxamui singee fi i ma, Isirayilakae naxee bama n na hadiya ra alo ture, weni, nun sansi xorie dinxi. ¹³ Daxamui singee e fama naxan birin na n be, na birin findima i gbe nan na. I xa mixi birin naxee seniyeñxi noma na donde.»

¹⁴ «Se naxan birin haramuxi mixie be Isirayila boxi ma, a fa findi n gbe ra, n bara na fi i ma. ¹⁵ Di singe birin naxee fima Alatala ma, a findi mixi ra, a findi xuruse ra, na birin i tan nan gbe a ra. Kono ibunadama xa di xeme singe nun sube haramuxi xa di xeme singe, e tan xun sarama ne. ¹⁶ E na kike keren soto, e xun xa sara gbeti kole suuli, naxan kole keren lanma giramu fu ma.»

¹⁷ «Kono i naxa ningee, yexeee, nun sie xa di singee xun sara, barima e tan seniyeñxi. E wuli xa kasan serexebade ma, e ture xa ba serexe ra. E xa gan te ra Alatala be. Na rafan a ma. ¹⁸ E ganyanyi nun e yirefanyi tabe findima i gbe nan na, barima Isirayilakae a fixi n tan ma. ¹⁹ N bara nee fi i tan nun i xa die ma abadan, Isirayilaka naxan birin bama e xa serexe seniyeñxe xun ma Alatala be. Saate nan a ra naxan mu kanama abadan, i tan nun i bonsoe birin be Alatala ya i.»

²⁰ Alatala naxa a masen Haruna be, «I mu ke sotoma Isirayila boxi ma alo boore. N tan nan findima i ke ra Isirayilakae tagi. I hayi mu na sese gbete ra.»

²¹ «N Isirayila xa farile fima Lewi bonsoe ma sare ra e xa horomolingira wali xa fe ra. ²² Isirayilakae naxa e maso horomolingira ra sonon, alako e naxa fa yunubi soto na kui e faxama naxan ma. ²³ Lewi bonsoe nan horomolingira xa wali rabama. Xa yunubi yo sa mini na wali kui, e tan nan a kote tongoma. Na findima seriye nan na wo be abadan. Lewi bonsoe mu fama ke sotide Isirayilakae tagi. ²⁴ N bara Isirayilakae xa farile fi Lewi bonsoe ma ke ra. Na nan a toxi, n na a falaxi e xa fe ra, ke mu na e tan be Isirayilakae tagi.»

²⁵ Alatala naxa a masen Munsa be, ²⁶ «A fala Lewi bonsoe be, «Isirayilakae na fa e xa farile ra, n naxan fima wo ma, wo xa na farile xa farile ba n tan be. ²⁷ Na kui wo fan a rabama ne alo wo ngaxakerenyi naxee farile bama e xa sansi xori ra lonyi yire, xa na mu a ra e xa weni ra e a bunduma temui naxe. ²⁸ Wo xa wo xa farile ba n be Isirayilakae xa farile ra, wo fa a so Haruna serexedube yi ra. ²⁹ Wo xa farile ba n be hadiya ra wo naxan birin sotoma. Wo daxamui singee wo naxee sotoma, wo xa n gbe ba na ra.» ³⁰ I man xa a

fala e be, <Wo na ge daxamui fisamante bade n be, wo xa na farile ba sansi xori nun weni ra Lewi bɔnsɔe be.³¹ Wo tan nun wo xa denbayae noma na donde wo wama a xon dennaxe. Wo xa hɔrɔmɔlingira wali sare nan na ki.³² Daxamui singee bafe mu findima yunubi ra wo be. Wo mu Isirayilakae xa hadiya seniye xie maberema na kui, wo man mu faxama na xa fe ra.> »

19

Maraseniye ye

¹ Alatala naxa a masen Munsa nun Haruna be, ² «Ala xa seriye nan ya. Isirayilakae xa fa ninge gine gbeeli ra, naxan mu mabenxi, lanyuru mu na naxan ma, a nun naxan mu saari bendunxi sinden. ³ I xa na so Eleyasari serexedube yi ra, a kon fa raxaba a ya xori yonkinde fari ma. ⁴ Eleyasari xa a wuli nde kasan a belexesole ra hɔrɔmɔlingira sode mabiri sanmaya solofere. ⁵ E xa na ninge gundi birin gan a ya xori, a kiri, a sube, a wuli, nun a jape. ⁶ Na ninge na ganfe temui naxe, serexedube xa sediri wuri nde, hisopi, nun gese gbeeli woli te xɔra.»

⁷ «Na dangi xanbi, serexedube xa a fate nun a xa sosee maxa, a fa so yonkin yire, konɔ a mu seniye xie han nunmare. ⁸ Naxan bara ninge gan, na fan xa a fate nun a xa sosee maxa, konɔ a mu seniye xie han nunmare. ⁹ Mixi seniye xie nde xa na ninge ganxi xube makɔ, a sa e sa yire seniye xie yonkinde fari ma. A ragatama menni ne Isirayila pama be alako e xa maraseniye ye yailan a ra. Yunubi xafari serexe nan a ra. ¹⁰ Naxan bara na ninge ganxi xube makɔ, na fan xa a fate nun a xa dugie xa, konɔ a mu seniye xie han nunmare. Na seriye mu kanama abadan Isirayilakae nun e xɔpee be.»

¹¹ «Naxan na din mixi faxaxi ra, na kanyi findima seniye tare ra xi solofere bun ma. ¹² A xa a yete raseniye yi maraseniye ye ra a xi saxan nde nun a xi solofere nde ma. Xa a mu a raba na xi saxan nde nun na xi solofere nde ma, a mu seniye ma. ¹³ Xa naxan yo din mixi faxaxi fure ra, a fa lu a mu a yete raseniye, na kanyi xa seniye tare ja dangima ne Alatala xa hɔrɔmɔlingira ma. Na kanyi xa kerɩ Isirayilakae ya ma. Maraseniye ye to mu kasanxi a ma, a mu seniye xie.»

¹⁴ «Seriye nan ya: Xa mixi faxa kiri banxi nde kui, mixi yo naxan na naa, xa na mu a ra a soma naa, na kanyi findima mixi seniye tare ra xi solofere bun ma. ¹⁵ Sesase rabixi birin findima seniye tare ra. ¹⁶ Mixi naxan din mixi faxaxi ra wula i, naxan bara faxa a jaaxi ra, xa na mu a faxa a yete ma, na kanyi findima seniye tare ra xi solofere

bun ma. Naxan din mixi faxaxi xorie ra, xa na mu a gaburi ra, na fan mu seniyeñxi xi solofere bun ma.»

¹⁷ «A lanma na mixi mooli xa seniyeñ ye ra, naxan masunbuxi na ninge ganxi xube ra. Na ye xa tongo dulonyi yire, xa na mu a ra xure yire. ¹⁸ Xeme seniyeñxi nde xa hisopi wuri salonyi tongo, a a rasin na ye xun ma, a a kasan na kiri banxi ma, a kui se birin ma, nun mixie ma naxee nu na a kui. E man xa na raba mixi ra naxan dinxi mixi fure ra, naxan faxes a paaxi ra, xa na mu a ra naxan faxes a yete ma, a nun mixi naxan dinxi mixi xorie ra, xa na mu gaburi ra. ¹⁹ Mixi seniyeñxi xa na ye kasan mixi seniyeñtare ra a xi saxan nde nun a xi solofere nde. A na ge na ra, a xa a yete nun a xa sosee maxa ye ra, a fa findi mixi seniyeñxi ra na xi solofere nunmare ra.»

²⁰ «Mixi naxan tondi a yete raseniyeñde, na kanyi xa kerijama ya ma, barima a xa seniyeñtarepa dangima ne Alatala xa hoñmolingira ma. A to mu kasanxi maraseniyeñ ye ra, a mu seniyeñxi. ²¹ Yaamari nan na ki Isirayilakae be naxan mu kanama abadan.»

«Maraseniyeñ ye kasanma naxan ma, na kanyi xa a xa dugie xa. A mu seniyeñma fo nunmare. ²² Mixi seniyeñtare dinma se naxan na, na se bara findi se seniyeñtare ra. Mixi naxan dinma na se ra, na fan findima mixi seniyeñtare ra han nunmare.»

20

Meriba ye

¹ Kike singe, Isirayila jama birin naxa so Sini gbengberenyi ma, e yonkin Kadesi. Mariyama naxa faxes menni, e fa a ragata gaburi kui.

² Ye to mu nu na jama yi ra, e naxa e malan Munsa nun Haruna xili ma. ³ E naxa sonxo Munsa ra, e nu a fala, «A nu fisa muxu fan xa faxes Alatala muxu ngaxakerenyie faxes temui naxe. ⁴ Munfe ra wo Alatala xa jama rafaxi yi gbengberenyi ma, muxu nun muxu xa xurusee xa faxes? ⁵ Munfe ra wo muxu ramixi Misira boxi ra fafe ra yi yire paaxi, xore bili, weni bili, girenadi wuri bili mu na dennaxe. Hali ye min daaxi mu sotoma be.»

⁶ Munsa nun Haruna naxa keli jama ya ma, e e felen hoñmolingira sode de ra. Alatala xa noñe naxa mini e ma. ⁷ Alatala naxa a masen Munsa be, ⁸ «I xa yisuxuwuri tongo. I tan nun i taara Haruna, wo xa Isirayilaka birin malan, wo wayen fanye ra e ya xori, alako a xa ye ramini. Wo ye ramini na Isirayila jama be alako e tan nun e xa xurusee xa ye min.» ⁹ Munsa naxa a xa yisuxuwuri tongo naxan nu na hoñmolingira kui,

alo Alatala a yamari a be ki naxe. ¹⁰ Munsa nun Haruna naxa jama malan na fanye ya ra, e fa a fala e be, «Wo tuli mati, wo tan matandilae. Muxu xa ye ramini wo be yi fanye kui?» ¹¹ Munsa naxa a belexe ite, a fanye bonbo sanya firin a xa yisuxuwuri ra. Ye naxa gbusan fanye ra, jama nun xuruse birin naxa e min.

¹² Kono Alatala naxa a masen Munsa nun Haruna be, «Wo to mu laxi n na, Isirayila jama ya xori, wo xa binye ti n tan Seniyentoe ma, wo tan mu fama yi jama rasode na boxi ma n dennaxe fixi e ma.» ¹³ E menni nan xili Meriba ye, barima Isirayilakae sonxo Alatala ma menni, a fa a xa seniyenyi masen e be.

Edon mange tondife Isirayila xa dangi

¹⁴ Munsa naxa xerae xee Edon mange ma keli Kadesi, a falafe ra a be, «I ngaxakerenyi Isirayilakae xui nan ya! I a kolon muxu tcoroxi ki naxe. ¹⁵ Muxu benbae goro ne Misira, muxu naxa je wuyaxi raba menni. Kono Misirakae naxa muxu nun muxu benbae jaxankata. ¹⁶ Muxu naxa Alatala maxandi, a fa muxu xui rame. A naxa a xa maleke xee muxu raminide Misira. Yakosi muxu na be Kadesi naxan na wo xa naaninyi ra. ¹⁷ A lu muxu xa dangi wo xa boxi tagi. Muxu mu wo xa xee nun wo xa weni bilie kanama. Muxu mu ye bama wo xa kolonyie kui. Muxu mu sigama koola ma, muxu mu sigama yirefanyi ma. Muxu tima wo xa kira xungbe kerenyi nan xon, han muxu dangima wo xa boxi ra temui naxe.» ¹⁸ Edon mange naxa a yaabi, «Wo mu dangima muxu xa boxi ra fefe ma, xa na mu muxu wo gerema santidegema nan na.»

¹⁹ Isirayilakae man naxa a fala a be, «Muxu tan dangima ne kira xon. Xa muxu nun muxu xa xurusee wo xa ye nde min, muxu xa a sare fi. Muxu mu i maxorinxu sese ma, muxu wama dangife tun.» ²⁰ Edon mange man naxa a yaabi, «Wo mu dangima feo!» Na kui, a naxa a xa soorie ramini a senbe ki ma Isirayilakae ya ra. ²¹ Edon mange to tondi Isirayilakae xa dangi a xa boxi ra, Isirayila naxa gbilen.

Haruna faxafe

²² Isirayila jama naxa keli Kadesi, e naxa siga Horo geya yire. ²³ Alatala naxa a fala Munsa nun Haruna be Horo geya yire, Edon xa boxi naaninyi ra, ²⁴ «Haruna fama ne a benbae lide aligiyama. A mu soma na boxi ma n dennaxe fixi Isirayilakae ma, barima wo bara n ma yaamari matandi Meriba ye xa fe ra. ²⁵ I xa Haruna nun a xa di xeme Eleyasari xanin Horo geya fari. ²⁶ Menni i xa serexedube dugie ba Haruna ma, i e ragoro a xa di xeme Eleyasari ma. Haruna laaxirama ne menni, a fa a benbae yire li.» ²⁷ Munsa

naxa a raba, alɔ Alatala a yamari ki naxe. E naxa te Horo geya fari Isirayilaka birin ya xɔri. ²⁸ Munsa naxa Haruna xa donmae ba a ma, a e ragoro a xa di xeme Eleyasari ma. Haruna naxa laaxira geya fari. Munsa nun Eleyasari naxa goro geya ra, ²⁹ e fa Isirayila jama rakolon Haruna xa fe ra. Isirayila naxa a jɔn fe raba xi tongo saxan bun ma.

21

Isirayila xa gere singe gbengberenyi ma

¹ Aradi mange Kanaanka, naxan nu sabatixi Negewi bɔxi ma, a to a mɛ, a Isirayila nu minife Atarima kira nan na, a naxa e gere, a ndee findi geelimanie ra. ² Na kui Isirayila naxa yi laayidi tongo Alatala bɛ, «Xa i yi mixie sa muxu sagoe, muxu e xa taa birin kanama nɛ.» ³ Alatala naxa tin Isirayilakae xa laayidi ra, a naxa Kanaankae sa e sagoe. Isirayilakae naxa e sɔntɔ, e e xa taae kana. Na nan a toxi e naxa menni xili sa Horoma, naxan wama a falafe «gbaloe.»

⁴ Isirayilakae naxa keli Horo geya ma Xulunyumi Baa kira xɔn ma, alako e xa Edon bɔxi mabilin. Kɔnɔ limaniya naxa ba e yi ra, ⁵ e fa a fala Alatala nun Munsa bɛ, «Munfe ra wo muxu ramini Misira bɔxi ra, alako muxu xa fa faxa gbengberenyi ma? Taami mu na be, ye mu na be, fo yi donse jaaxi naxan goroma koore ma!»

⁶ Na kui Alatala naxa a niya bɔximasee xa mini e tagi, e xa mixie xin, e mixi gbegbe faxa. ⁷ Nama naxa a fala Munsa bɛ, «Muxu bara yunubi raba wɔyenfe ra i tan nun Alatala ma. I xa Alatala maxandi muxu bɛ, a xa yi bɔximasee makuya muxu ra.» Munsa naxa tin na ra, a Alatala maxandi jama bɛ. ⁸ Alatala naxa a yaabi, «Bɔximase misaali rafala wure gbeeli ra, a gbaku wuri kuye ra. Mixi xinxɪ naxan a ya tima na ra, a mu faxama.» ⁹ Munsa naxa bɔximase yailan wure gbeeli ra, a a gbaku wuri kuye ra. Na temui mixi bɔximasee naxee xinxɪ, e nu nɔma e ya tide na ra, e kisi.

¹⁰ Isirayilakae naxa siga, e sa yonkin Oboti. ¹¹ E naxa keli menni, e siga Iye Abarimi gbengberenyi ma naxan ya rafindixi Mowaba bɔxi ma, sogetede mabiri. ¹² E to keli menni, e naxa siga Serede gulunba yire. ¹³ E to keli menni, e naxa siga Arinon de ra, xure naxan na Amori bɔxi ma. Arinon nan na naaninyi ra Mowabakae nun Amorikae tagi. ¹⁴ Na nan a ra, a sebɛxi sebeli nde kui, Alatala xa geree xa fe na naxan kui,

«Wahebi nun a xa folee na Sufa bɔxi ma,

¹⁵ Arinon folee gexi han Ari,

a findi Mowaba naaninyi nan na.»

¹⁶ E to keli, e naxa siga Beeri, Alatala a masen Munsa be dennaxe, «Nama malan, n xa e ki ye ra.» ¹⁷ Isirayilakae yi suuki ba na waxati ne:

«Ye xa te kolonyi ra!

Wo xa beeti ba a xa fe ra!

¹⁸ Mangee nun kuntigie bara a ge,
mange tonxuma kanyie.»

¹⁹ E to keli gbengberenyi ma, e naxa siga Matana. E to keli Matana, e naxa siga Naxaliyeli. E to keli Naxaliyeli, e naxa siga Bamoti. ²⁰ E to keli Bamoti, e naxa siga Mowaba gulunba yire, Pisiga geya na dennaxe. Gbengberen yire birin toma ne na geya fari.

²¹ Isirayilakae naxa xerae xee Amorikae xa mange Sixon yire a falafe ra, ²²
«Muxu wama girife i xa boxi nan na. Muxu mu xe yire nun weni bogi yire lima. Muxu mu wo xa kolon ye minma. Muxu luma mange xa kira gbansan nan xon ma, han muxu i xa boxi igiri.»

²³ Sixon mu tin e xa dangi a xa boxi ma. A naxa a xa soorie malan, e naxa mini Isirayilakae xili ra gbengberenyi ma, e fa e gere Yahasi. ²⁴ Isirayilakae naxa geeni. E naxa e xa boxi birin tongo keli Arinon xure ma han Yaboko xure, han Amonikae xa boxi naaninyi ra. E mu no dangide na ra barima Amonikae senbe nu gbo. ²⁵ Kono Isirayilakae naxa Amorikae xa taae birin suxu, e fa sabati nee kui. E naxa Xesibon fan suxu, a nun a xa rabilinyi. ²⁶ Xesibon nan nu na Amorikae xa mange Sixon xa mangataa ra. A nu bara na taa ba Mowaba mange nde yi, a nun a xa boxi birin han Arinon xure.

²⁷ Na nan a ra, beetibae a falama,
«Wo fa Xesibon!

Sixon xa taa xa ti,
a man xa senbe soto!

²⁸ Te bara Xesibon gan,
Sixon xa taa bara kana te ra.
Mowaba boxi xa taa Ari fan bara gan,
naxan xa mixie nu noma Arinon tode.

²⁹ Naxankate na wo be Mowabakae,
wo tan Kemosi xa batulae.

A xa di xemee bara e gi.

A xa di ginnee bara findi geelimanie ra Amori mange Sixon xonyi.

³⁰ Kono muxu bara no e ra,

Xesibon bara kana han Dibon.

Muxu bara e halaki han Nofa,

han a sa Medeba li.»

³¹ Isirayila naxa sabati Amorikae xa boxi ma. ³² Munsa to ge Yaaseri taa rabende, Isirayila naxa Amorikae keri na longori birin ma. ³³ Na dangi xanbi, e naxa kira tongo sigafe ra Basan. Basan mange Ogo nun a xa soorie naxa e li Edereyi. ³⁴ Alatala naxa a masen Munsa be, «I naxa gaaxu a ya ra! N na sama ne i belexe, a nun a xa soorie nun a xa boxi birin. I xa a bonbo alo i Amori mange Sixon bonboxi ki naxe Xesibon.» ³⁵ Isirayilakae naxa Ogo, a xa die, nun a xa soori birin bonbo. Mixi keren mu no a bade e yi. E naxa a xa boxi findi e gbe ra.

22

Balaki xa xeraya

¹ Isirayilakae naxa siga e sa yonkin Mowaba fiili ma, Yuruden xure de, Yeriko ya tagi. ² Siporo xa di xeme Balaki nu bara a me Isirayilakae naxan nabaxi Amorikae ra. ³ Mowabakae nu bara gaaxu Isirayila jama belebele xa fe ra. ⁴ Na kui, e naxa a fala Madiyan kuntigie be, «Yi jama belebele fama won ma boxi birin xun nakanade, alo ningee mere xun nakanama ki naxe.» Balaki nan nu na Mowaba mange ra na temui.

⁵ A naxa xerae xee Beyori xa di xeme Belami yire, naxan nu sabatixi Petori, a bari taa xure de ra, a falafe ra, «Nama belebele nde bara keli Misira boxi ma, e fa yonkin n ma boxi seeti ma. ⁶ Yandi, i xa fa yi jama dankade, barima e senbe gbo n be. Temunde, na ki n noma ne e bonbode, n e keri yi boxi ma. N a kolon, i na duba naxan be, na bara barika. I man na naxan danka, na fan bara danka.» ⁷ Mowaba kuntigie nun Madiyan kuntigie naxa siga se matoe sare ra Belami xon, e fa Balaki xa xeraya iba a be.

⁸ Belami naxa a fala e be, «Wo xa koe radangi be. Alatala na yaabi so n yi, n na falama ne wo be.» Na kui, Mowaba kuntigie naxa xi Belami xonyi. ⁹ Alatala naxa mini Belami ma, a a maxarin, «Nde na yi mixie ra i naxee rasenexi i xonyi yi ki?» ¹⁰ Belami naxa a yaabi, «Mowaba mange Siporo xa di xeme Balaki nan yi mixie xee, a e xa fa a fala n be, ¹¹ «Nama belebele nde bara keli Misira boxi ma, e fa sabati n ma boxi seeti ma.

I xa fa yi pama dankade, n e keru.» ¹² Alatala naxa a masen Belami be, «I naxa bira yi mixie foxo ra, i naxa na pama danka. Barakatoe pama na a ra.»

¹³ Na kuye iba Belami naxa keli, a a fala Balaki xa kuntigie be, «Wo gbilen wo xa boxi ma, barima Alatala mu tinxi n xa bira wo foxo ra.» ¹⁴ Na kui, Mowaba kuntigie naxa gbilen Balaki yire, e a fala a be, «Belami bara tondi birade muxu foxo ra.»

¹⁵ Balaki man naxa kuntigi gbete gbege xee, naxee tide dangi a singee ra. ¹⁶ E naxa siga Belami yire, e a fala a be, «Balaki xa masenyi nan ya: «N tan Siporo xa di xeme Balaki, n bara i mayandi, i naxa tondi talufe ra n yire! ¹⁷ N i sare fima ne a fanyi ra. I wama naxan yo xon, n na fima i ma. Yandi i xa yi pama danka n be.» ¹⁸ Kono Belami naxa Balaki xa xerae yaabi, «Hali Balaki a xa banxi rafe gbete nun xema ra, a a so n yi ra, n mu noma fefe rabade n Marigi Alatala mu n yamari naxan na. ¹⁹ Wo naxan nabama, wo fan xa lu be han tina geesege. N man xa Alatala xa masenyi rame.» ²⁰ Alatala naxa mini Belami ma ke ra, a a masen a be, «Yi mixie to bara fa i xilide, i xa bira e foxo ra, kono n na naxan fala i be, i na nan nabama.»

²¹ Na kuye iba Belami naxa baki a xa sofale fari, a bira Mowaba kuntigie foxo ra. ²² Belami sigafe naxa Alatala raxono. Alatala xa maleke naxa siga kira ibolonde Balami ya ra. A nu dodoxi a xa sofale fari, a xa walike firinyie nu na a foxo ra. ²³ Balami xa sofale to Alatala xa maleke to kira tagi, santidegema suxuxi a yi, a ramixi a te i, a naxa keli kira xun ma, a so xe ra. Belami naxa sofale bonbo, alako a xa a xun ti kira ra.

²⁴ Alatala xa maleke man naxa sa ti e xa kira di xon ma weni bilie tete firinyie tagi. ²⁵ Sofale to Alatala xa maleke to, a naxa a raxeten tete ra, a Belami sanyi xeten tete ra a paaxi ra. Belami naxa gbilen a bonbo ra. ²⁶ Alatala xa maleke man naxa a sa ti yire raxetenxi a fanyi ra. Dangide yo mu nu na. ²⁷ Sofale to Alatala xa maleke to, a naxa a sa Belami bun ma. Belami naxa xono a ma, a a bonbo a xa yisuxuwuri ra.

²⁸ Na kui, Alatala naxa sofale de ramini, a a niya a xa a fala Belami be, «A saxan nde nan yi ki i n bonboma. N munse rabaxi i ra?» ²⁹ Belami naxa a yaabi, «I n matandixi ne. Xa santidegema na n yi ra nu, n i faxama ne keren na.» ³⁰ Sofale naxa a fala Belami be, «N tan xa mu i xa sofale ra, i tema naxan fari temui birin? N darixi yi mooli raba ra?» Belami naxa a yaabi, «Ade.»

³¹ Na temui Alatala naxa Belami ya rabi maleke tofe ra, a tixi kira tagi, a xa santidegema baxi a te i, a suxuxi a belexe. Belami naxa a felen, a suyidi keren na. ³² Maleke naxa a maxarin, «Munfe ra i bara i xa sofale bonbo sanya saxan? N faxi ne n xa

kira ibolon i ya ra, barima i na kira naxan xɔn yi ki, murutela xa kira na a ra. ³³ I xa sofale bara i ratanga n ma sanya saxan. Xa a tan mu a ra, n bara i faxa nu, kɔnɔ n mu a tan faxama.» ³⁴ Belami naxa a fala a bɛ, «N bara yunubi raba! N mu nu a kolonxi, i tixi n ya ra. Kɔnɔ yakɔsi, xa yi biyaasi mu i kenexi, n xa gbilen n xɔnyi.» ³⁵ Alatala xa malekɛ naxa a masen, «Ade, i xa bira yi mixie fɔxɔ ra, kɔnɔ n na masenyi naxan masen i bɛ, i na nan falama.» Na kui, Belami nun Balaki xa xɛɛrae naxa siga.

³⁶ Balaki to a mɛ a Belami na fafɛ, a naxa siga a ralandɛ taa ndɛ ma Arinon xurɛ dɛ ra, Mowaba xa naaninyi yirɛ. ³⁷ A naxa Belami maxɔrin, «Munfɛ ra i mu nu wama fafɛ n ma xɛɛra singɛɛ ra? I jɔxɔ a ma n mu nɔma i sare fide?» ³⁸ Belami naxa Balaki yaabi, «N bara fa i xɔn, kɔnɔ n mu nɔma wɔyɛndɛ na ki tun. Alatala masenyi naxan sama n dɛ i, n na nan tun falama.» ³⁹ Belami nun Balaki naxa siga, ɛ so Kiriyaɗi Xusoti. ⁴⁰ Balaki naxa ningɛɛ nun yɛxɛɛɛ ba sɛrɛxɛ ra, a ndɛ so Belami yi ra a nun kuntigi naxɛɛ nu na a fɔxɔ ra. ⁴¹ Na kuyɛ ibɛ, Balaki naxa Belami xanin Bamoti Baali gɛya fari. Menni a naxa Isirayila jama sɛɛti ndɛ to.

23

Belami dubafɛ Isirayila jama bɛ

¹ Belami naxa a fala Balaki bɛ, «I xa sɛrɛxɛbadɛ solofɛrɛ yaɪlan bɛ. I man xa fa tuura solofɛrɛ nun yɛxɛɛ kontɔnyi solofɛrɛ ra.» ² Belami naxan maxɔrin, Balaki naxa a birin naba. E naxa tuura kɛrɛn nun yɛxɛɛ kontɔnyi kɛrɛn ba sɛrɛxɛ ra na sɛrɛxɛbadɛ kɛrɛn kɛrɛn ma. ³ Belami naxa a fala Balaki bɛ, «I xa lu bɛ sɛrɛxɛ fɛ ma, n tan xa n makuya donɗorɔnti. Tɛmundɛ Alatala fama minidɛ n ma. A naxan yo masen n bɛ, n a falama i bɛ.» Belami to tɛ gɛya ndɛ fari, ⁴ Alatala naxa mini a ma. Belami naxa a fala a bɛ, «N bara sɛrɛxɛbadɛ solofɛrɛ yaɪlan, n yɛxɛɛ kontɔnyi kɛrɛn nun tuura kɛrɛn nan baxi a birin kɛrɛn kɛrɛn fari.» ⁵ Alatala naxa masenyi fi Belami ma a naxan masenma. A naxa a yita a bɛ, «Siga Balaki yirɛ, i xa yi masenyi ti a bɛ.»

⁶ Belami naxa gbilen Balaki yirɛ, a a li a tixi a xa sɛrɛxɛ fɛ ma, a tan nun Mowaba kuntigie. ⁷ Belami naxa a xa masenyi ti yi ki,

«Balaki nan faxi n na kɛlifɛ Siriya.

Mowaba mangɛ nan n xilixi, kɛlifɛ sogetɛdɛ gɛyɛ kɔn na.

«Fa, Yaxuba bɔnsɔɛ danka n bɛ!

I xa xɔnɛ radin Isirayila ma!»

⁸ N noma mixi dankade di,

Alatala mu naxan dankaxi?

N noma xonode mixi ma di,

Ala mu xonoxi naxan ma?

⁹ N e toma kelifa geya kon na,

keli yire itexi.

Nama nan a ra,

naxan luma a xati ma,

naxan tagi rasama e nun si gbete ra.

¹⁰ Nde noma Yaxuba bonsa kontide,

konti naxan dangima meyen yi konti ra?

E nu Isirayila pama itaxun dode naani ra,

nde noma a seeti keren yati kontide?

Ala xa n mali n xa aligiyama li tinxinyi kui.

Ala xa n mali n xa maniya e ra n ma saya kui.»

¹¹ Balaki naxa a fala Belami be, «I munse rabaxi n na yi ki? N i rafaxi ne n yaxuie dankade, kon i tan na dubafe e be.» ¹² Belami naxa a yaabi, «Alatala na masenyi naxan sa n de i, n mu lan n xa na fala?»

¹³ Balaki man naxa a fala a be, «Won xa siga yire gbete, i noma e tode dennaxe. I seeti keren gbansan toma be, i mu e birin toma. Menni i noma e birin tode, i fa e danka.»

¹⁴ A naxa Belami xanin Sofimi, Pisiga geya fari. A naxa serexebade solofere yailan menni, a tuura keren nun yexe kontonyi keren ba serexe ra na serexebade keren keren ma fari. ¹⁵ Belami naxa a fala Balaki be, «I xa lu be i xa serexe fe ma, n tan xa n makuya dondoronti, n nun Alatala xa lu yire keren.»

¹⁶ Alatala naxa mini Belami ma, a masenyi nde fi a ma, a fa a fala a be, «Siga Balaki yire, i xa yi masenyi ti a be.» ¹⁷ Belami naxa gbilen Balaki yire, a a li a tixi a xa serexe fe ma, a tan nun Mowaba kuntigie. Balaki naxa a maxarin, «Alatala munse masenxi?» ¹⁸ Belami naxa yi masenyi ti a be,

«Balaki, keli.

Siporo xa di xeme, i tuli mati.

¹⁹ Ala mixi mu a ra, a mu wule falama.

Adamadi mu a ra, a xa a xaxili masara.

A mu a xui masarama.

A mu neemuma a xa saate ma.

A mu laayidi kanama.

²⁰ Ala bara n yamari n xa duba yi pama be.

Alatala bara baraka sa e ma.

N mu noma na masarade.

²¹ Tõore mu luma Yaxuba bõnsõe ya ma.

Setarepa mu toma Isirayila.

E Marigi Alatala na e foxo ra.

Mange xui mema ne e tagi.

²² Alatala e ramixi Misira boxi ra,

senbe na e yi ra alo sexe ninge.

²³ Karamoxo wali mu noma Yaxuba bõnsõe tõorde.

Sematoe mu noma sese rabade Isirayila xili ma.

A fama falade Yaxuba nun Isirayila xa fe ra,

Ala xa wali mato!

²⁴ Yi pama kelima alo yete ginema,

e tima alo yete xemema,

naxan mu a sama fo a xa sube don,

a naxan faxes,

fo a xa a wuli min.»

²⁵ Balaki naxa a fala Belami be, «Xa i mu wama e dankafe, hali i mu duba e be.»

²⁶ Belami naxa a yaabi, «N mu a fala i be, Alatala na naxan yo masen n be, n na nan falama?»

²⁷ Balaki naxa a fala Belami be, «Awa, won xa siga yire gbete. Temunde Alatala tinma i xa yi pama dankan be menni.» ²⁸ Balaki naxa Belami xanin Peyori geya fari, gbengberenyi toma dennaxe. ²⁹ Belami naxa a fala Balaki be, «Serexebade solofere ti be, i man xa fa tuura solofere nun yexee kontonyi solofere ra.» ³⁰ Belami naxan maxarin, Balaki naxa a birin naba. A naxa tuura keren nun yexee kontonyi keren ba serexe ra na serexebade keren keren ma fari.

Belami dubafe Isirayila be

¹ Belami to a to a Alatala nu wama baraka safe Isirayila xa fe ma, a mu karamoxo wali raba alo a darixi a raba ra ki naxe. A naxa a ya rafindi gbengberenyi ma. ² A to Isirayila jama to, e yonkinxi e bonsoe ki ma, Ala Xaxili naxa goro a ma, ³ a fa yi masenyi ti:

«N yi nan masenma,
n tan Beyori xa di xeme Belami,
naxan xa se igbema a fanyi ra,
⁴ naxan Ala xui ramema,
naxan Ala Xili Xungbe Kanyi xa laamatunyi toma,
naxan fahaamui sotoma suyidi kui.

⁵ Yaxuba, i xa kiri banxie rayabu,
Isirayila, i xa lingirae tofan.

⁶ E gulunba rafema,
e luma alo laakoe naxan na xure de ra,
alo wuri bilie Ala naxee sixi ye yire.

⁷ Ye mu jonma Isirayila jama yi ra,
tune goroma e xa sansie ma a fanyi ra.
E xa mange senbe gbo Agaga be,
Isirayila xa mangeya xili fanyi sotoma ne.

⁸ Ala naxa e ramini Misira boxi ma,
e senbe gbo alo sexe ninge.
E e yaxuie xun nakanama ne,
naxee e xori girama,
e e faxama xalie ra.

⁹ E e malabuma ne alo yete,
nde suusama e rakelide?
Barika xa lu mixi be naxan na duba wo be,
danka xa lu mixi be naxan na wo danka!»

¹⁰ Na kui Balaki naxa xono Belami ma a jaaxi ra. A naxa a fala, «N i xili ne i xa n yaxuie danka, kono a sanya saxan nde nan yi ki, i na dubafe e be! ¹¹ Keli be keren na!

Siga i xɔnyi! N nu bara laayidi tongo i be wali sare xa fe ra, kɔnɔ Alatala mu tinxi i xa a sɔtɔ!»¹² Belami naxa a yaabi, «N mu a fala i xa xɛɛrae be,¹³ <Hali Balaki a xa banxi nan nafe gbeti nun xɛema ra n be, n mu nɔma sese rabade Alatala mu n yamari naxan na. Alatala naxan masenma n be, n nɔma gbilende na fɔxɔ ra?»¹⁴ Awa, yakɔsi, n na gbilenfe n xɔnyi, kɔnɔ i xa a kolon yi jama naxan nabama wo ra.»

¹⁵ Na temui Belami naxa yi masenyi ti a be:

«Beyori xa di xeme Belami xa masenyi nan ya,
naxan see igbema a fanyi ra,

¹⁶ naxan Ala xui ramema,
naxan Ala Xili Xungbe Kanyi xa laamatunyi toma,
naxan fahaamui sɔtɔma Ala Xili Xungbe saabui ra.

¹⁷ N fe toxi naxan fama rabade yare.

N fe toxi naxan makuya yakɔsi ra.

Tunbui nde fama tede kelifɛ Yaxuba xa mixie ma.

Mange tɔnxuma nde fama kelide Isirayila ya ma.

A Mowaba xunnakanama nɛ,
a Seti xa die xa fe jɔnma nɛ.

¹⁸ Edon xa fe goroma nɛ,
Seyiri xa fe goroma nɛ,
kɔnɔ Isirayila senbe sɔtɔma nɛ.

¹⁹ Mange nde kelima Yaxuba xa mixie ya ma,
naxan bekae sɔntɔma.»

²⁰ Belami to Amalekikae to, a naxa yi masenyi ti:

«Amaleki si fisamante na nu a ra,
kɔnɔ a rapɔnyi, a bɔnɔma nɛ!»

²¹ Belami to Kenikae to, a naxa yi masenyi ti:

«Wo sabatide mabanbanxi,
wo tɛɛ saxi fanye nan fari,

²² kɔnɔ Asuri fama nɛ wo xun nakanade,
a wo findi geelimanie ra.»

²³ Na temui a naxa a xa masenyi xun dusu:

«Nde nɔma kiside Ala xa jaxankate ma?

²⁴ Kunkuie fama ne kelifa Kitimi,
e noma ne Asuri nun Xeberi ra,
kono a ranonyi, e fan xun nakanama ne.»

²⁵ Na dangi xanbi, Belami naxa keli, a gbilen a xonyi. Balaki fan naxa keli naa.

25

Isirayilakae xa kuye batui

¹ Isirayilakae to nu yonkinxi Sitimi, e naxa so yene rabafe Mowaba ginee ra. ² Na ginee naxa Isirayila xeme xili e xa lan e xa serexee ma, naxee nu bama e xa kuyee be. ³ Isirayilakae to Peyori xa Baali kuye batu folo, Alatala naxa xono e ma. ⁴ Alatala naxa a fala Munsa be, a a xa jama yarerati birin gbaku wuri kon na a ya i, a e ya rafindi soge ma, alako a xa xone xa gbilen Isirayila foxo ra. ⁵ Munsa naxa Isirayila kiitisae yamari, «Wo xa mixi birin faxes, naxan bara Peyori xa Baali kuye batu!»

⁶ A fefe na fala, Isirayilaka nde naxa fa Madiyanka gine nde ra a ngaxakerenyie ya i. Munsa nun Isirayila jama naxee nu na wafe horomolingira sode de ra, naxa na gine nun na xeme to. ⁷ Haruna xa mamadi, Eleyasari xa di xeme Finexasi serexedube to na gine nun na xeme to, a naxa keli, a tanbe tongo, ⁸ a bira na xeme foxo ra kiri banxi kui, a sa a tan nun na gine soxo a xa tanbe ra e furi kui keren na. Na temui Alatala xa xone naxa dan. ⁹ Mixi wulu moxonen nun naani nan faxes na gbaloe kui.

¹⁰ Alatala naxa a masen Munsa be, ¹¹ «Haruna serexedube xa mamadi, Eleyasari xa di xeme Finexasi, bara n ma xone ba Isirayilakae ma. N ma xanunteya n ma jama be nu na a bope kui, a fa a niya a xa na raba. N tan mu Isirayila birin sonto n ma xanunteya xa fe ra. ¹² A fala Finexasi be, n bara bope saate xiri a tan nun n tan tagi. ¹³ Na saate luma n tan nun a bonsoe tagi, e fa findi serexedube ra abadan, barima n ma xanunteya nu na a bope kui, a man fa a niya Isirayilakae xa yunubi xa xafari.»

¹⁴ Isirayilaka naxan faxes e nun na Madiyan gine ra, a nu xili Simiri, Salu xa di xeme. Simeyon bonsoe xunyi nde nan nu a ra. ¹⁵ Na gine Madiyanka tan nu xili Kosibi, Suuru xa di gine. Madiyan xabile ndee xunyi nan nu a baba ra. ¹⁶ Alatala naxa a masen Munsa be, ¹⁷ «Wo xa Madiyankae gere alo yaxuie! ¹⁸ E findixi wo be yaxuie nan na Peyori kuye xa fe ra, nun e maagine Kosibi xa fe ra. Kosibi findixi e xa yarerati nde xa di gine ra, ¹⁹ naxan faxes Peyori kuye xa fe kui.»

Isirayilakae kontife firin nde

¹ Na gbaloe to dangi, Alatala naxa a fala Munsa nun Haruna serexedube xa di xeme Eleyasari be, ² «Wo xa Isirayila pama birin xili sebe, keli a je moxonen ma han na xanbi, a denbaya ki ma, naxan birin noma sooripa rabade.» ³ Munsa nun Eleyasari serexedube naxa a fala Isirayilakae be Mowaba boxi ma Yuruden xure seeti ma Yeriko ya i, ⁴ «Isirayilaka birin xa konti, keli mixi ma naxan bara je moxonen soto han na xanbi, alo Alatala a yamari Munsa nun Isirayilakae be ki naxe.» Isirayila bonsoe naxee mini Misira boxi ra, nee nan yi ki.

⁵ A folo Isirayila xa di singe Ruben nan ma, a xa die nan yi ki: Xanoki, Palu, ⁶ Xesiron, Karimi, nun e xabilee. ⁷ Ruben bonsoe xabilee nan na ki. Nee xasabi lan mixi wulu tongo naani nun saxan keme solofere tongo saxan nan ma.

⁸ Palu xa di xeme Eliyabi ⁹ nan nu na Nemuweli, Datan, nun Abirami baba ra, naxee keli Munsa nun Haruna xili Isirayila kuntigie ya ma. E nun Kora nun a foxirabiree to keli Alatala xili ma, ¹⁰ boxi rabi ne, a fa e birin gerun. Na loxe Alatala mixi keme firin mixi tongo suuli gan ne te ra, e xa findi misaali ra pama be. ¹¹ Kono Kora xa die tan mu faxa na fe kui.

¹² Simeyon xa die nan yi ki e xabile ki ma: Nemuweli, Yamin, Yakimi, ¹³ Sera, Sawulu, a nun e xabilee. ¹⁴ Simeyon bonsoe xabilee nan na ki. Nee xasabi lan mixi wulu moxonen nun firin, mixi keme firin nan ma.

¹⁵ Gadi xa die nan yi ki e xabile ki ma: Sefon, Xagi, Suni, ¹⁶ Oseni, Eri, ¹⁷ Arodi, Areli, nun e xabilee. ¹⁸ Gadi bonsoe xabilee nan na ki. E xasabi lan mixi wulu tongo naani, mixi keme suuli nan ma.

¹⁹ Yuda xa die nan yi ki: Eru nun Onan. Kono e tan faxa Kanaan boxi ma. ²⁰ Yuda xa die nan yi ki e xabile ki ma: Selaha, Peresi, Sera, nun e xabilee. ²¹ Peresi xa die nan yi ki: Xesiron, Xamuli, nun e xabilee. ²² Yuda bonsoe xabilee nan na ki. E xasabi lan mixi wulu tongo solofere nun senni, mixi keme suuli nan ma.

²³ Isakari xa die nan yi ki e xabile ki ma: Tola, Puwa, ²⁴ Yasubu, Simiron, nun e xabilee. ²⁵ Isakari bonsoe nan na ki e xabile ki ma. E xasabi lan mixi wulu tongo senni nun naani, mixi keme saxan nan ma.

²⁶ Sabulon xa die nan yi ki e xabile ki ma: Seredi, Elon, Yaxaleeli, nun e xabilee.

²⁷ Sabulon bɔnsɔɛ xabilee nan na ki. E xasabi lan mixi wulu tongo senni, mixi keme suuli nan ma.

²⁸ Yusufu xa die nan yi ki e xabile ki ma: Manasi nun Efirami. ²⁹ Manasi xa die nan yi ki: Makiri nun a xabilee. Makiri nan Galadi nun a xabilee sɔtɔ. ³⁰ Galadi xa die nan yi ki e xabile ki ma: Yeseri, Xeleki, ³¹ Asireli, Sikemi, ³² Semida, Xeferi, nun e xabilee. ³³ Xeferi xa di xeme Selofexadi tan di ginɛ nan tun sɔtɔ. Nee xilie nan yi ki: Maxala, Nowa, Xogala, Milika nun Tirisa. ³⁴ Manasi bɔnsɔɛ xabilee nan na ki. E xasabi lan mixi wulu tongo suuli nun firin, mixi keme solofere nan ma.

³⁵ Efirami xa die nan yi ki e xabile ki ma: Sutela, Bekeru, Taxani, nun e xabilee. ³⁶ Sutela xa di nan yi ki: Eran nun a xabilee. ³⁷ Efirami xa die nan na ki. E xasabi lan mixi wulu tongo saxan nun firin, mixi keme suuli nan ma. Yusufu xa mamadie nan na ki e xabile ki ma.

³⁸ Bunyamin xa die nan yi ki e xabile ki ma: Bela, Asibeli, Axirama, ³⁹ Sufami, Xufami, nun e xabilee. ⁴⁰ Bela xa die naxa findi Arade, Naaman, nun e xabilee ra. ⁴¹ Bunyamin xa die nan na ki e xabile ki ma. E xasabi naxa lan mixi wulu tongo naani nun mixi suuli keme senni ma.

⁴² Dana xa die nan yi ki e xabile ki ma. Suxami nun a xabilee. Dana bɔnsɔɛ nan na ki e xabile ki ma. ⁴³ E xasabi naxa lan mixi wulu tongo senni nun naani, mixi keme naani ma.

⁴⁴ Aseri xa die nan yi ki e xabile ki ma: Yimena, Yisiwi, Beriya, nun e xabilee. ⁴⁵ Beriya xa die nan yi ki: Xeberi, Malakiyeli, nun e xabilee. ⁴⁶ Aseri xa di ginɛ nu xili ne Sera. ⁴⁷ Aserikae nan na ki e xabile ki ma. E xasabi lan mixi wulu tongo suuli nun saxan, mixi keme naani nan ma.

⁴⁸ Nafatali xa die nan yi ki e xabile ki ma: Yaxaseeli, Guni, ⁴⁹ Yeseri, Silemi, nun e xabilee. ⁵⁰ Nafatali bɔnsɔɛ nan na ki e xabile ki ma. E xasabi lan mixi wulu tongo naani nun suuli, mixi keme naani nan ma.

⁵¹ Isirayilaka konti lanxi mixi wulu keme senni nun keren, mixi keme solofere tongo saxan nan ma.

⁵² Alatala naxa a masen Munsa be, ⁵³ «Kanaan bɔxi itaxunma na mixie nan ma e bɔnsɔɛ xasabi ma, a findi e ke ra. ⁵⁴ Bɔnsɔɛ birin ke sɔtɔma a xa mixie xasabi bere ra. Bɔnsɔɛ naxee xa mixie gbo, i nee gbe ragbo dangi booree ra, naxee xa mixi xurun. ⁵⁵ N tan nan a ragirima bɔnsɔɛ birin lan a xa ke naxan sɔtɔ e bɔnsɔɛ xasabi ma. ⁵⁶ Bɔxi

itaxunyi findima Ala xa maragiri nan na, bɔnsɔɛ xungbee nun bɔnsɔɛ xurie tagi.»

⁵⁷ Lewi bɔnsɔɛ nan yi ki naxee kɔnti e xabile ki ma: Gerison, Kehati, Merari, nun e xabilee. ⁵⁸ Lewi bɔnsɔɛ xabilee nan yi ki: Libini, Xebiron, Maxali, Musi, nun Kora. Kehati nu bara Amarama sɔtɔ. ⁵⁹ Amarama xa gine nu xili ne Yebedi, Lewi xa di gine, naxan bari Misira. A naxa Haruna, Munsa, nun e maagine Mariyama bari Amarama be. ⁶⁰ Haruna nu bara Nadabo, Abihu, Eleyasari, nun Itamari sɔtɔ di ra. ⁶¹ Nadabo nun Abihu faxa ne, e to serexe gan te ra naxan mu daxe. ⁶² Di xeme naxan kɔnti Lewi bɔnsɔɛ ya ma, keli a kike keren ma han na xanbi, a xasabi lan mixi wulu mɔxɔpen nun saxan nan ma. E xa kɔnti nu na a xati ma, barima e mu boxi sɔtɔ ke ra Isirayilakae ya ma.

⁶³ Munsa nun Eleyasari serexedube na mixie nan kɔnti Mowaba boxi ma Yuruden xure seeti ma Yeriko taa ya i, ⁶⁴ kɔnɔ Munsa nun Haruna serexedube mixi naxee kɔnti Sinayi gbengberenyi ma, na keren mu nu na Isirayilakae ya ma sɔnɔn. ⁶⁵ Alatala a fala ne, a nee birin faxama ne gbengberenyi ma. Na kui, e sese mu lu dunja, fo Yefune xa di xeme Kalebi, nun Nunu xa di xeme Yosuwe.

27

Ginee xa ke seriye

¹ Yusufu xa di xeme Manasi, na fan xa di xeme Makiri, na fan xa di xeme Galadi, na fan xa di xeme Xeferi, na fan xa di xeme Selofexadi, di gine suuli nan sɔtɔ, naxee nu xili: Maxala, Nowa, Xogala, Milika nun Tirisa. ² Na di ginee nan fa e yete kan dentege Munsa, Eleyasari serexedube, nun Isirayila yareratie be, Isirayila jama birin ya xori, hɔrɔmɔlingira sode de ra. E naxa a masen, ³ «Muxu baba mu di xeme sɔtɔ. A bara faxa gbengberenyi ma, kɔnɔ a mu nu na Kora xa mixie ya ma naxee keli Alatala xili ma. A tan faxa a yete kan xa yunubi rabaxi nan ma. ⁴ Munfe ra muxu baba xili bama a xabile xa mixie ya ma, di xeme to mu na a be? Ke nde so muxu fan yi ra, muxu baba ngaxakerenyie tagi!»

⁵ Munsa naxa e xa fe dentege Alatala be. ⁶ Alatala naxa a masen a be, ⁷ «Selofexadi xa di ginee bara nondi fala. E baba ke so e yi ra alo e baba ngaxakerenyie a sɔtɔ ki naxe. ⁸ A fala Isirayilakae be, «Xa xeme nde sa faxa di xeme xanbi, wo a ke so a xa di ginee yi ra. ⁹ Xa di gine fan mu na a be, wo a ke so a fafaxakerenyie yi ra. ¹⁰ Xa fafaxakeren yo mu na a be, wo a so a baba fafaxakerenyie yi ra. ¹¹ Xa a sa li, a baba fafaxakeren yo mu na, wo a ke so mixi yi ra, e nun naxan makore e boore ra a xabilee ya

ma.» Na xa findi yaamari nun seriye ra Isirayilakae be, alo n tan Alatala a yamarixi i be ki naxe.»

Yosuwe findife Munsa joxoe ra

¹² Alatala naxa a masen Munsa be, «Te yi Abarimi geya fari, alako i xa boxi mato n naxan fima Isirayilakae ma. ¹³ I na ge a matode, i taa masarama ne, i gbilen i benbae ma alo i taara Haruna, ¹⁴ barima wo bara n ma yaamari matandi. Isirayilakae to keli n xili ma ye xoli xa fe ra Kadesi, Sini gbengberenyi ma, wo mu seedejoxoya raba n ma seniyenyi xa fe ra.»

¹⁵ Munsa naxa a fala Alatala be, ¹⁶ «Alatala, daali birin Marigi Ala, mixi keren doxo jama xun ma, ¹⁷ naxan tima e ya ra, e mini temui nun e so temui, naxan e ramini, a e raso, alako i xa jama naxa lu alo xuruse naxee rabejinx i e yete ma, kantama yo mu e be.» ¹⁸ Alatala naxa a masen Munsa be, «I xa Nunu xa di Yosuwe sugandi, Xaxili Seniyenxi na naxan ma. I xa i belexe sa a ma. ¹⁹ I xa a ti Eleyasari serexedube nun jama birin ya xori, i fa yaamarie so a yi ra, ²⁰ i xa mangeya nde xa dangi a ma, alako Isirayila jama birin xa a xui suxu. ²¹ A tima ne Eleyasari serexedube ya i n waxonfe maxorinde geme sugandixie ra. N yaabi naxan fima, a tan nun jama birin perema na nan ma. E minima ne Eleyasari serexedube xui nan ma, e soma Yosuwe xui nan ma.» ²² Munsa naxa Alatala xa yaamari raba. A naxa Yosuwe tongo, a sa a ti Eleyasari serexedube nun Isirayila jama ya i, ²³ a a belexe sa a ma, a yaamarie so a yi ra, alo Alatala nu bara a yamari ki naxe.

28

Geesege nun nunmare serexee

¹ Alatala naxa yi masenyi ti Munsa be, ² «A fala Isirayilakae be, e xa n ma serexe ba a ba temui. Donsee nan e ra, naxee ganma, e xiri joxunme te n na.

³ «A fala e be, «Lxo xo wo xa serexe gan daaxi ba Alatala be, yexee firin, naxee bara je keren soto, lanyuru yo mu na naxee ra. ⁴ Keren xa ba geesege, boore xa ba nunmare. ⁵ Wo man xa sansi xori dinxi kilo saxan ba serexe ra naxan namulanxi oliwi ture fanyi litiri keren nun a tagi ra. ⁶ Na serexe gan daaxi mooli nu bama n be Sinayi geya ma, a xiri joxunme nu tema n na. ⁷ Weni serexe litiri keren nun a tagi bama yexee seeti ma Alatala be. Na serexe rafalama yire seniyenxi kui. ⁸ Wo xa sansi xori dinxi serexe nun weni serexe ba nunmare temui yexee seeti ma. Na birin findima serexe gan

daaxi ra naxan xiri joxunme tema n tan Alatala ra.»»

Malabu loxoɛ serexe

⁹ Malabu loxoɛ wo xa yexɛɛ firin ba malabu loxoɛ serexe ra, naxee bara jɛ keren soto, lanyuru yo mu na naxee ma. Sansi xori dinxi serexe naxan namulanxi ture kilo senni ra, nun weni serexe xa ba na yexɛɛɛ seeti ma. ¹⁰ Malabu loxoɛ serexe gan daaxie nan bama geesege nun nunmare serexɛɛ ra, a nun e xa weni serexɛɛ.

Kike xi singe serexe

¹¹ Kike xi singe birin, wo xa tuura firin ba serexe gan daaxi ra, a nun yexɛɛ kontonyi keren, a nun yexɛɛ solofere, naxee bara jɛ keren soto, lanyuru yo mu na naxee ma. ¹² Sansi xori dinxi serexe kilo solomanaani naxan namulanxi ture ra, a xa sa tuura yo tuura seeti ma. Sansi xori dinxi serexe kilo senni naxan namulanxi ture ra, a xa sa yexɛɛ kontonyi yo yexɛɛ kontonyi seeti ma. ¹³ Sansi xori dinxi serexe kilo saxan naxan namulanxi ture ra, a xa sa yexɛɛ yo yexɛɛ seeti ma. Serexe gan daaxi nan a ra naxan ganma, a xiri joxunme tema n tan Alatala ra. ¹⁴ Weni litiri saxan serexe xa ba tuura birin bɛ. Weni litiri firin serexe xa ba yexɛɛ kontonyi birin bɛ. Weni litiri keren serexe xa ba yexɛɛ birin bɛ. Na serexe mooli bama kike xi singe birin jɛ kui. ¹⁵ Wo xa sikote keren fan ba Alatala bɛ yunubi xafari serexe ra Alatala bɛ, wo geesege nun nunmare serexe bama temui naxɛ, a nun a xa weni serexe.

Saya Maleke Dangi Sali serexe

¹⁶ Kike singe xi fu nun naani nde, wo xa Saya Maleke Dangi Sali raba Alatala xa binyɛ bun ma. ¹⁷ Na kike xi fu nun suuli nde findima sali loxoɛ nan na. Wo xa taami lebinitare don xi solofere bun ma. ¹⁸ Na xi singe wo xa wo malan Ala batude. Wo naxa wali yo raba na loxoɛ. ¹⁹ Wo xa yi serexe gan daaxie ba Alatala bɛ na loxoɛ: tuura firin, yexɛɛ kontonyi keren, nun yexɛɛ solofere, naxee bara jɛ keren soto, lanyuru yo mu na naxee ma. ²⁰ Sansi xori dinxi serexe kilo solomanaani naxan namulanxi ture ra, a xa sa tuura yo tuura seeti ma. Sansi xori dinxi serexe kilo senni naxan namulanxi ture ra, a xa sa yexɛɛ kontonyi yo yexɛɛ kontonyi seeti ma. ²¹ Sansi xori dinxi serexe kilo saxan naxan namulanxi ture ra, a xa sa yexɛɛ yo yexɛɛ seeti ma. ²² Wo xa sikote keren fan ba Alatala bɛ yunubi xafari serexe ra. ²³ Wo xa na serexɛɛ sa geesege daaxie xun ma, naxee bama loxoɛ birin. ²⁴ Wo xa nee ba xi solofere bun ma. Serexe gan daaxi nan a ra naxan ganma, a xiri joxunme tema n tan Alatala ra. Nee bama nɛ loxo yo loxo, e nun boore serexe gan

daaxie, nun weni serexe. ²⁵ A xi solofere nde, wo xa wo malan Ala batude. Wo naxa wali gbetee raba na loxo.

Xe Xaba Sali serexe

²⁶ Xe Xaba Sali, wo na fa sansi bogi singee hadiya ra Alatala xon ma, wo xa wo malan n batude. Wo naxa wali yo suxu na loxo. ²⁷ Wo xa yi serexee ba: tuura firin, yexee kontonyi keren, nun yexee solofere, naxee bara je keren soto. Nee nan bama serexe gan daaxi ra, e xiri joxunme tema n tan Alatala ra. ²⁸ Sansi xori dinxi serexe kilo solomanaani naxan namulanxi ture ra, a xa sa tuura yo tuura seeti ma. Sansi xori dinxi serexe kilo senni naxan namulanxi ture ra, a xa sa yexee kontonyi yo yexee kontonyi seeti ma. ²⁹ Sansi xori dinxi serexe kilo saxan naxan namulanxi ture ra, a xa sa yexee yo yexee seeti ma. ³⁰ Wo xa sikote keren fan ba Alatala be yunubi xafari serexe ra. ³¹ Wo xa na serexee sa boore serexee xun, wo naxee bama loxo birin, e nun sansi xori nun weni naxan fan bama serexe ra. Lanyuru yo naxa lu na serexee ma.

29

Sara xa Sali serexe

¹ «Kike solofere nde xi singe, wo xa wo malan n batude. Wo naxa wali yo raba na loxo. Wo sarae fema ne na loxo. ² Wo xa tuura firin ba serexe gan daaxi ra, a nun yexee kontonyi keren, a nun yexee solofere, naxee bara je keren soto, lanyuru yo mu na naxee ma. ³ Sansi xori dinxi serexe kilo solomanaani naxan namulanxi ture ra, a xa sa tuura yo tuura seeti ma. Sansi xori dinxi serexe kilo senni naxan namulanxi ture ra, a xa sa yexee kontonyi yo yexee kontonyi seeti ma. ⁴ Sansi xori dinxi serexe kilo saxan naxan namulanxi ture ra, a xa sa yexee yo yexee seeti ma. ⁵ Wo xa sikote keren fan ba Alatala be yunubi xafari serexe ra Alatala be. ⁶ Na serexe birin sama serexe gan daaxie nan xun, wo naxee bama loxo yo loxo, a nun wo naxee bama kike yo kike a xi singe, a nun sansi xori dinxi nun weni serexe naxan sama e seeti ma. Serexee nan e ra naxee ganma, e xiri joxunme tema n tan Alatala ra.»

Yunubi xafari loxo serexe

⁷ «Na kike solofere nde, xi fu loxo, wo xa wo malan n batude, wo fan xa sunyi suxu. Wo naxa wali yo raba na loxo. ⁸ Na loxo wo xa tuura nde ba serexe gan daaxi ra, a nun yexee kontonyi keren, a nun yexee solofere, naxee bara je keren soto, lanyuru yo

mu na naxee ma. ⁹ Sansi xori dinxi serexe kilo solomanaani naxan namulanxi ture ra, a xa sa tuura seeti ma. Sansi xori dinxi serexe kilo senni naxan namulanxi ture ra, a xa sa yexee kontonyi yo yexee kontonyi seeti ma. ¹⁰ Sansi xori dinxi serexe kilo saxan naxan namulanxi ture ra, a xa sa yexee yo yexee seeti ma. ¹¹ Wo xa sikote keren fan ba n tan Alatala be yunubi xafari serexe ra, dangife na yunubi xafari serexe, nun na serexe gan daaxie wo naxee bama loxo yo loxo, a nun sansi xori dinxi nun weni serexe.»

Bage Ti Sali serexe

¹² «Kike solofere nde, xi fu nun suuli, wo xa wo malan n batude. Wo naxa wali yo raba na loxo. Wo xa sali nde raba n tan Alatala be xi solofere bun ma. ¹³ A xi singe, wo xa tuura fu nun saxan, yexee kontonyi firin, nun yexee fu nun naani ba serexe gan daaxi ra n tan Alatala be, naxee bara je keren soto, lanyuru yo mu na naxee ma. Wo na e gan, a xiri joxunme tema n tan Alatala ra. ¹⁴ Sansi xori dinxi serexe kilo solomanaani naxan namulanxi ture ra, a xa sa na tuura fu nun saxan seeti ma. Sansi xori dinxi serexe kilo senni naxan namulanxi ture ra, a xa sa na yexee kontonyi firin seeti ma. ¹⁵ Sansi xori dinxi serexe kilo saxan naxan namulanxi ture ra, a xa sa na yexee fu nun naani seeti ma. ¹⁶ Wo xa sikote keren fan ba n tan Alatala be yunubi xafari serexe ra, dangife na yunubi xafari serexe, nun na serexe gan daaxie wo naxee bama loxo yo loxo, a nun sansi xori dinxi nun weni serexe.»

¹⁷ «Sali xi firin nde, wo xa tuura fu nun firin, yexee kontonyi firin, nun yexee fu nun naani ba serexe ra, naxee bara je keren soto, lanyuru mu na naxan ma, ¹⁸ a nun e xa sansi xori dinxi nun weni serexe naxan lanma seriye ki ma. ¹⁹ Wo xa sikote keren fan ba n tan Alatala be yunubi xafari serexe ra. Wo xa na serexee sa boore serexee xun, wo naxee bama loxo birin, e nun sansi xori nun weni naxan fan bama serexe ra.»

²⁰ «Sali xi saxan nde, wo xa tuura fu nun firin, yexee kontonyi firin, nun yexee fu nun naani ba serexe ra, naxee bara je keren soto, lanyuru mu na naxan ma, ²¹ a nun e xa sansi xori dinxi nun weni serexe naxan lanma seriye ki ma. ²² Wo xa sikote keren fan ba n tan Alatala be yunubi xafari serexe ra. Wo xa na serexee sa boore serexee xun, wo naxee bama loxo birin, e nun sansi xori nun weni naxan fan bama serexe ra.»

²³ «Sali xi naani nde, wo xa tuura fu nun firin, yexee kontonyi firin, nun yexee fu nun naani ba serexe ra, naxee bara je keren soto, lanyuru mu na naxan ma, ²⁴ a nun e xa sansi xori dinxi nun weni serexe naxan lanma seriye ki ma. ²⁵ Wo xa sikote keren fan ba

n tan Alatala be yunubi xafari serexe ra. Wo xa na serexee sa boore serexee xun, wo naxee bama loxo birin, e nun sansi xori nun weni naxan fan bama serexe ra.»

²⁶ «Sali xi suuli nde, wo xa tuura fu nun firin, yexee kontonyi firin, nun yexee fu nun naani ba serexe ra, naxee bara je keren soto, lanyuru mu na naxan ma, ²⁷ a nun e xa sansi xori dinxi nun weni serexe naxan lanma seriye ki ma. ²⁸ Wo xa sikote keren fan ba n tan Alatala be yunubi xafari serexe ra. Wo xa na serexee sa boore serexee xun, wo naxee bama loxo birin, e nun sansi xori nun weni naxan fan bama serexe ra.»

²⁹ «Sali xi senni nde, wo xa tuura fu nun firin, yexee kontonyi firin, nun yexee fu nun naani ba serexe ra, naxee bara je keren soto, lanyuru mu na naxan ma, ³⁰ a nun e xa sansi xori dinxi nun weni serexe naxan lanma seriye ki ma. ³¹ Wo xa sikote keren fan ba n tan Alatala be yunubi xafari serexe ra. Wo xa na serexee sa boore serexee xun, wo naxee bama loxo birin, e nun sansi xori nun weni naxan fan bama serexe ra.»

³² «Sali xi solofere nde, wo xa tuura fu nun firin, yexee kontonyi firin, nun yexee fu nun naani ba serexe ra, naxee bara je keren soto, lanyuru mu na naxan ma, ³³ a nun e xa sansi xori dinxi nun weni serexe naxan lanma seriye ki ma. ³⁴ Wo xa sikote keren fan ba Alatala be yunubi xafari serexe ra. Wo xa na serexee sa boore serexee xun, wo naxee bama loxo birin, e nun sansi xori nun weni naxan fan bama serexe ra.»

³⁵ «Sali xi solomasaxan nde, wo xa wo malan n tan Ala batude. Wo naxa wali gbetee raba na loxo. ³⁶ Wo xa tuura fu nun firin, yexee kontonyi firin, nun yexee fu nun naani ba serexe gan daaxi ra, naxee bara je keren soto, lanyuru mu na naxan ma. E xiri joxunme tema n tan Alatala ma. ³⁷ Wo man xa sansi xori dinxi nun weni serexe ba naxan lanma seriye ki ma na tuura, na yexee kontonyi, nun na yexee xa fe ra. ³⁸ Wo xa sikote keren fan ba n tan Alatala be yunubi xafari serexe ra. Wo xa na serexee sa boore serexee xun, wo naxee bama loxo birin, e nun sansi xori nun weni naxan fan bama serexe ra.»

³⁹ «Serexee nan na ki wo lan wo xa naxee ba n tan Alatala be wo xa sali loxo, bafe wo xa laayidi serexee, wo xa serexe janigexie, wo xa serexe gan daaxie, wo xa sansi xori dinxi serexee, wo xa weni serexee, nun wo xa xanunteya serexee.»

30

Laayidi tongoxi seriye

¹ Munsa naxa Alatala xa yaamari birin fala Isirayilakae be, a naxee so a yi ra. ² Munsa naxa yi masenyi ti Isirayila bonsae kuntigie be, «Alatala xa yaamarie nan ya: ³ Xa

mixi nde sa laayidi tongo Alatala be fe nde ma, xa na mu a a kali Alatala ra fe nde ma, na kanyi lan ne a xa a xui rakamali. A naxan birin falaxi a de ra, a xa a birin naba.»

⁴ «Gine dimedi na sa laayidi tongo fe nde ma Alatala be, a na a baba xonyi temui naxe, a fa a kali, ⁵ xa baba naxa a kolon a a xa di gine bara laayidi nde tongo, a baba mu sese fala na fe kui, a xa na laayidi rakamali. ⁶ Kono xa a baba mu tin na laayidi tongoxi ra a me temui, a mu lan na gine dimedi xa a rakamali. Alatala mu a suxuma a ra a baba waxonfe xa fe ra.»

⁷ «Gine dimedi na sa laayidi tongo, xa na mu a a kali woyenyi mafuraxi ra, ⁸ xa a xa mori sa na me, a fa lu a mu sese fala na fe ra, a xa na laayidi rakamali. ⁹ Kono xa a xa mori mu tin na fe ra a me temui, a mu lan na gine dimedi xa a rakamali. Alatala mu a suxuma a ra.»

¹⁰ «Kaape gine na laayidi tongo, xa na mu, gine naxan nun a xa xeme bara fatan, a xa a xa laayidi rakamali.»

¹¹ «Gine xeme taa idoxoe na laayidi tongo, xa na mu a a kali fe nde ma, ¹² xa a xa mori fa na fe kolon, kono a mu fefe fala na fe kui, a lanma na gine xa a xa laayidi rakamali. ¹³ A xa mori na a xa laayidi me temui naxe, a noma tinde a ra, xa na mu a ra, a noma tonyi doxode a ma. Alatala mu a suxuma a ra. ¹⁴ A xa mori noma tinde, xa na mu a ra tondide a xa laayidi nun a xa kali birin na. ¹⁵ Xa a mu fefe falama na fe kui, a xa gine lanma a xa a xa laayidi rakamali. A xa dundui a niyama gine xa a xa laayidi rakamali. ¹⁶ Xa a xa mori tonyi doxoma a xa gine xa laayidi ma temui gbete, a tan yati a xa gine xa kote xaninma.»

¹⁷ «Alatala xa seriye nan na ki a naxan fixi Munsa ma, gine xa fe ra naxan na xeme taa, xa na mu a ra gine naxan na a baba xonyi.»

31

Madiyankae gerefe

¹ Alatala naxa yi masenyi ti Munsa be, ² «I xa Isirayilakae gbe joxo Madiyankae ma. I na ge na ra, i fa taa masara.» ³ Munsa naxa a fala pama be, «Xeme ndee xa geresosee tongo Madiyan xili ma wo gbe joxode Alatala xili ra. ⁴ Isirayila bonsoe birin xa mixi wulu keren keren ba geresoe ra.»

⁵ Isirayila bonsoe fu nun firin naxa mixi wulu keren keren ba geresoe ra. ⁶ Munsa naxa na soori wulu fu nun wulu firin xee gere tide. Eleyasari serexedube xa di xeme

Finexasi naxa e mati, se seniye naxa nu na a yi ra, a nun sara naxee tɔnxuma fima e boore ma gere xa fe ra. ⁷ E naxa siga gere tide Madiyan xili ma, alɔ Alatala a yamari ki naxe Munsa be. E naxa na xeme birin faxa, ⁸ a nun Madiyan mange suuli: Efi, Rekemi, Suuru, Xuru, nun Reba. E naxa Beyori xa di xeme Belami fan faxa santidegema ra. ⁹ E naxa Madiyan ginee nun e xa di birin findi konyie ra. E naxa e xa xurusee, e xa gooree, nun e harige birin tongo. ¹⁰ E naxa e xa tae nun e xa daaxae gan. ¹¹ E naxa e xa harige, e xa xurusee, nun e xa ginee suxu, ¹² e e xanin Munsa, Eleyasari, nun Isirayila pama xon ma e yonkinde Mowaba fiili ma, Yuruden xure de i, Yeriko ya tagi.

¹³ Munsa, Eleyasari serexedube, nun Isirayila pama yareratie naxa e ralan yonkinde fari ma. ¹⁴ Munsa naxa xon soori wulu xunye nun soori keme xunye ma, a a fala e be, ¹⁵ «Munfe ra wo mu yi ginee faxa? ¹⁶ E tan nan bira Belami xa marasi foxo ra, e Isirayilakae ramini Alatala xa kira xon Peyori, Alatala fa gbaloe ragoro a xa pama ma. ¹⁷ Awa, yakosi, wo xeme dime birin faxa, a nun gine naxee bara xeme fe kolon. ¹⁸ Gine dimedie tan, wo xa nee ragata wo yete be. ¹⁹ Wo tan naxee bara mixi faxa, xa na mu wo bara din fure ra, wo xa lu yonkinde fari ma xi solofere, a nun mixie wo naxee suxu gere kui. Wo xa wo yete nun wo xa mixi suxuxie raseniye a xi saxon nde nun a xi solofere nde. ²⁰ Wo xa wo xa dugie fan naseniye a nun see naxan tan birin nafalaxi kiri, si xabe, nun wuri ra.»

²¹ Eleyasari serexedube naxa a fala soorie be naxee gere tixi, «Alatala xa seriye nan ya a naxan masenxi Munsa be: ²² Xeema, gbeti, wure gbeeli, wure, yoxui, nun sunbui, ²³ se naxan birin mu ganma te ra, wo xa na radangi te xora, a xa seniye. Na dangi xanbi wo man xa a raseniye ye ra. Se naxan mu noma radangide te xora, wo xa na raseniye ye ra. ²⁴ Wo xa wo xa dugie xa a xi solofere nde. Na temui wo bara seniye, wo fa noma sode yonkinde.»

Sotose itaxunfe

²⁵ Alatala naxa a masen Munsa be, ²⁶ «I tan, Eleyasari serexedube, nun Isirayila kuntigie, wo xa yi mixi suxuxie, nun e xa xurusee konti, wo naxee sotoxi gere kui. ²⁷ I xa e itaxun soorie nun pama ra. ²⁸ Soorie gbe ya ma, i xa mixi keren tongo mixi keme suuli yo mixi keme suuli tagi, a xa findi n gbe ra. Xurusee fan na ki, keme suuli yo keme suuli, i keren nan tongoma e ya ma n be. A findi ningee ra, a findi sofalee ra, a findi xuruse lanmae ra. ²⁹ I xa nee ba soorie gbe ya ma, i e so Eleyasari serexedube yi ra

Alatala xili ra. ³⁰ Isirayila jama gbe ya ma, i xa mixi keren tongo mixi tongo suuli yo mixi tongo suuli ya ma, keme suuli yo keme suuli, i keren nan tongoma e ya ma n be. A findi ninge ra, a findi sofalee ra, a findi xuruse lanmae ra. I xa nee so Lewi bonsœ yi ra, naxee e joxo saxi n ma hõromõlingira xõn.»

³¹ Munsa nun Eleyasari serexedube naxa a raba, alo Alatala a yamari ki naxe Munsa be. ³² Naxan soto gere kui, a xasabi lan xuruse lanma wulu keme senni wulu tongo solofere nun suuli nan ma, ³³ ninge wulu tongo solofere nun firin, ³⁴ sofale wulu tongo senni nun keren, ³⁵ gine naxee mu xeme fe kolon, mixi wulu tongo saxan nun firin. ³⁶ Seeti naxan fixi soorie ma naxee gere ti, a xasabi naxa lan xuruse lanma wulu keme saxan wulu tongo saxan nun solofere keme suuli ma. ³⁷ Alatala gbe naxan ba na ra, na naxa lan xuruse lanma keme senni tongo solofere nun suuli ma. ³⁸ Ninge naxee fixi soorie ma, e xasabi naxa lan wulu tongo saxan nun senni ma. Alatala gbe naxan ba na ra, na naxa lan ninge tongo solofere nun firin ma. ³⁹ Sofale naxee fixi soorie ma, e xasabi naxa lan wulu tongo saxan keme suuli ma. Alatala gbe naxan ba na ra, na naxa lan sofale tongo senni nun keren ma. ⁴⁰ Mixi naxee fixi soorie ma, e xasabi naxa lan wulu fu nun senni ma. Alatala gbe naxan ba na ra, na naxa lan mixi tongo saxan nun firin ma. ⁴¹ Munsa naxa Alatala gbe so Eleyasari serexedube yi ra, alo Alatala a yamari ki naxe.

⁴² Isirayila jama gbe, Munsa naxan so e yi ra, naxan mu nu na soorie gbe ya ma, ⁴³ na findixi xuruse lanmae wulu keme saxan tongo saxan nun solofere keme suuli nan na, ⁴⁴ a nun ninge wulu tongo saxan nun senni, ⁴⁵ a nun sofale wulu tongo saxan keme suuli, ⁴⁶ a nun mixi wulu fu nun senni. ⁴⁷ Na kui, xurusee ba, mixie ba, tongo suuli yo tongo suuli, Munsa naxa keren keren ba a birin na, a e so Lewi bonsœ yi ra, naxee e joxo saxi Alatala xa hõromõlingira xõn, alo Alatala a yamari a be ki naxe.

Tantui hadiya

⁴⁸ Soori keme xunye nun soori wulu xunye naxa fa Munsa yire, ⁴⁹ e a fala a be, «Muxu tan i xa konyie, muxu bara soorie konti naxee nu na muxu xa yaamari bun ma. E birin na na. ⁵⁰ Na nan a toxi muxu bara fa hadiyae ra Alatala be xunsare xa fe ra. Kankan bara fa a xa sotosee ra alo belexerasoe, xurundee, tulirasoe, nun konmagore xeema daaxi.»

⁵¹ Munsa nun Eleyasari serexedube naxa na see xeema daaxi rasuxu e yi ra. ⁵² Na xeema birin, soori xunye fa naxan na Alatala be, a xasabi lan fayida xeema kilo keme

tongo solofere nan ma. ⁵³ Sɔɔrie tan nu e gbee ragataxi e yi ra. ⁵⁴ Munsa nun Eleyasari sɛrɛxɛdubɛ naxa na see birin rasuxu sɔɔri wulu xunye nun sɔɔri kɛmɛ xunye yi ra, e a xanin hɔrɔmɔlingira yire, alako na xa findi tɔnxuma ra Isirayila xa fe ra Alatala bɛ.

32

Bɔnsɔɛ saxan dɔxɔfe Yurudɛn xure sogetede

¹ Gɔɔrɛ gbegbe nan nu na Ruben bɔnsɔɛ nun Gadi bɔnsɔɛ yi ra. E to a to Yaasɛri nun Galadi bɔxi fan xurusee bɛ, ² e naxa fa Munsa, Eleyasari, nun Isirayila kuntigie yire, ³ e a fala e bɛ, «Taa naxee xili Ataroti, Dibon, Yaasɛri, Nimira, Xesibɔn, Eleyale, Sebami, Nebo, nun Beyon, nee na bɔxi ma, ⁴ Alatala naxan saxi Isirayila jama sagoe. Na longori fan xuruse kanyie bɛ alɔ muxu tan. ⁵ Xa wo bara tin a ra, be xa findi muxu tan gbe ra, hali muxu mu dangi Yurudɛn naakiri ma.»

⁶ Munsa naxa Gadi bɔnsɔɛ nun Ruben bɔnsɔɛ yaabi, «Wo ngaxakerenyie sigama nɛ geresode, wo tan xa lu be? ⁷ Munfe ra wo wama limaniya bafe wo ngaxakerenyie yi ra, alako e naxa dangi Yurudɛn naakiri ma bɔxi ma Alatala naxan fixi e ma? ⁸ Wo babae fan bara na wali mɔoli raba n to e xɛɛ Kanaan bɔxi rabende kelifɛ Kadesi Barineya. ⁹ E to gɛ Esekoli bɔxi rabende, e naxa gbilen, e fa limaniya ba Isirayilakae yi ra sofe ra bɔxi ma, Alatala naxan fixi e ma. ¹⁰ Alatala naxa xɔnɔ Isirayilakae ma na lɔxɔɛ, a fa a kali, ¹¹ «Yi mixi naxan birin kelixi Misira, naxan simaya bara dangi jɛ mɔxɔjɛn na, e mu soma bɔxi ma n nan n kali Iburahima, Isiyaga nun Yaxuba bɛ dennaxan fife ra e ma, barima e mu bira n fɔxɔ ra e janige birin na. ¹² Fo Yefune xa di xɛmɛ Kalebi Kenisika, nun Nunu xa di xɛmɛ Yosuwe, nee nan peti bira n xui fɔxɔ ra e janige birin na.» ¹³ Alatala naxa xɔnɔ Isirayilakae ma ki fanyi, a fa e rabɛpin gbengberenyi ma jɛ tongo naani bun ma, han na mixi birin faxa, naxee wali ki mu nu rafan a ma. ¹⁴ Wo tan yunubitɔɛ bɔnsɔɛɛ, wo na birafe wo benbae fɔxɔ ra Alatala raxɔnɔfe ra Isirayila xili ma. ¹⁵ Xa wo keli Ala xa kira xɔn, a man Isirayila rabɛpinma nɛ gbengberenyi ma, e halaki wo xa fe ra.»

¹⁶ E naxa siga Munsa yire, e a fala a bɛ, «Muxu wama gɔɔrɛ tife be muxu xa xurusee bɛ, a nun muxu wama yiree yailanfe be muxu xa ginɛɛ nun muxu xa die luma dennaxe. ¹⁷ Kɔnɔ muxu bara tin sɔɔrija rabade muxu ngaxakerenyi Isirayilakae bɛ han e so e sode. Muxu xa die tan luma be muxu xanbi ra nɛ taa kantaxie kui, alako bekae naxa e tɔɔrɔ. ¹⁸ Muxu mu gbilenma muxu xɔnyi be, fo Isirayilaka birin a gbe bɔxi masɔɔ. ¹⁹

Ke gbete mu luma muxu tan be sonon Yuruden naakiri ma. Muxu gbe na bebiri Yuruden sogetede.»

²⁰ Munsa naxa a fala e be, «Xa wo sa a raba alo wo a falaxi ki naxe, xa wo wo maxiri sigafe ra gere tide Alatala xili ra, ²¹ xa wo mu gbilen be Yuruden naakiri ma, han Alatala ge a yaxuie birin keride a ya ra, ²² na temui be bara findi wo xa boxi ra Alatala xili ra. Menni na lu Alatala xa yaamari bun ma, wo noma gbilende be. Na kui wo bara wo xa laayidi rakamali Isirayila nun Alatala be.»

²³ «Kono xa wo mu sa na seriye rabatu, na bara findi yunubi ra wo be, wo na sare fima ne. ²⁴ Yakosi, wo xa taae ti wo xa ginnee nun wo xa die be. Wo xa gooree yailan wo xa xurusee fan be. Kono wo naxa neemu wo xa laayidi tongoxi ma, wo xa na rakamali.» ²⁵ Gadi bonsoe nun Ruben bonsoe naxa Munsa yaabi, «Muxu fama ne i xa yaamari birin suxude. ²⁶ Muxu xa die, muxu xa ginnee, nun muxu xa xurusee birin luma be Galadi boxi ma, ²⁷ kono muxu geresosee tongoma ne, muxu fa gere tide Alatala be alo i a yitaxi ki naxe, muxu marigi.»

²⁸ Munsa naxa Eleyasari serexedube, Nunu xa di xeme Yosuwe, a nun Isirayila kuntigie yamari, ²⁹ «Xa Gadi bonsoe nun Ruben bonsoe sa dangi Yuruden naakiri ma, e siga gere tide Alatala be, han wo naxa na boxi birin masoto temui naxe, wo xa Galadi boxi so e yi ra ke ra. ³⁰ Kono xa e mu na raba, e fan xa sabati wo tagi Kanaan boxi ma!» ³¹ Gadi bonsoe nun Ruben bonsoe naxa e yaabi, «Alatala naxan birin masenxi a xa konyi die xa fe ra, muxu a birin nabama ne. ³² Muxu dangima ne Yuruden naakiri ma muxu xa geresosee ra sigafe ra Kanaan boxi ma Alatala ya tode ra, kono muxu ke tan findima boxi ra Yuruden bebiri seeti ma.»

³³ Munsa naxa Amorikae xa mange Sixon nun Basan mange Ogo xa boxi nun na rabilinyi fi Gadi bonsoe, Ruben bonsoe, nun Yusufu xa di xeme Manasi bonsoe seeti ma.

³⁴ Gadi xa die naxa gbilen Dibon ti ra, a nun Ataroti, Aroweri, ³⁵ Atiroti Sofana, Yaaseri, Yogbeha, ³⁶ Beti Nimira, nun Beti Xarani. E bara findi taa makantaxie ra, gooree gbegbe fan nu na.

³⁷ Ruben bonsoe naxa gbilen Xesibon ti ra, a nun Eleyale, Kiriyaatayimi, ³⁸ Nebo, Baali Meyoni, nun Sibima. E naxa na taa ndee xilie masara.

³⁹ Manasi xa di Makiri xa die to Galadi taa suxu, e Amorikae keru naxee nu sabatixi naa, ⁴⁰ Munsa naxa na taa so e yi ra sabatide ra. ⁴¹ Manasi xa Yayiri fan naxa taa ndee suxu, a e xili Yayiri xa taae. ⁴² Noba fan naxa Kenata taa nun a rabilinyi suxu, a

yete xili sa e xun ma.

33

Isirayila xa biyaasi kelifa Misira

¹ Nere nan ya Isirayilakae naxan naba e xunde ki ma Munsa nun Haruna xa yaamari bun ma e to keli Misira boxi. ² Munsa na birin sebe alo Alatala a yamari a be ki naxe.

³ E naxa keli Ramesesi taa Misira boxi kike singe xi fu nun suuli. Saya Maleke Dangi Sali loxe, na kuye iba Isirayilakae naxa mini Misira xoreya kui Misiraka birin ya xori. ⁴ A a lixi na temui, Misirakae nu na e xa di singee ragatafe, Alatala naxee faxa e ya ma a xa xone kui e xa kuyee xa fe ra.

⁵ Isirayilakae naxa keli Ramesesi, e sa yonkin Sukoti.

⁶ E to keli menni, e naxa siga Etama gbengberenyi de ra.

⁷ E to keli Etama, e naxa gbilen Pi Haxiroti mabiri,
Baali Sefon ya tagi, e sa yonkin Migidoli ya ra.

⁸ E to keli menni, e naxa baa igiri,
e siga gbengberenyi ma.

E naxa xi saxan jere raba Etama gbengberenyi ma,
e sa yonkin Mara.

⁹ E to keli menni, e naxa siga Elimi,
e dulonyi fu nun firin nun tugi tongo solofere li dennaxe.

¹⁰ E to keli menni, e naxa siga Xulunyumi Baa seeti ma.

¹¹ E to keli menni, e naxa siga Sini gbengberenyi ma.

¹² E to keli menni, e naxa sa yonkin Dofika.

¹³ E to keli menni, e naxa siga Alusu.

¹⁴ E to keli menni, e naxa siga Refidimi,
kono e mu ye to naa.

¹⁵ E to keli menni, e naxa siga Sinayi gbengberenyi ma.

¹⁶ E to keli menni, e naxa siga Kibiroti Hataawa.

¹⁷ E to keli menni, e naxa siga Xaseroti.

¹⁸ E to keli menni, e naxa siga Ritima.

¹⁹ E to keli menni, e naxa siga Rimon Peresi.

- ²⁰ E to keli menni, e naxa siga Libina.
²¹ E to keli menni, e naxa siga Risa.
²² E to keli menni, e naxa siga Kehelata.
²³ E to keli menni, e naxa siga Seeferi geya ma.
²⁴ E to keli menni, e naxa siga Xarada.
²⁵ E to keli menni, e naxa siga Makeloti.
²⁶ E to keli menni, e naxa siga Taxati.
²⁷ E to keli menni, e naxa siga Tera.
²⁸ E to keli menni, e naxa siga Mitika.
²⁹ E to keli menni, e naxa siga Xasamona.
³⁰ E to keli menni, e naxa siga Mosera.
³¹ E to keli menni, e naxa siga Beneyaakan.
³² E to keli menni, e naxa siga Xori Gidigada.
³³ E to keli menni, e naxa siga Yotobata.
³⁴ E to keli menni, e naxa siga Abarona.
³⁵ E to keli menni, e naxa siga Esiyon Geberi.
³⁶ E to keli menni, e naxa siga Kadesi Sini gbengberenyi ma.
³⁷ E to keli menni ne, e naxa siga Horo geya ma,
Edon boxi naaninyi fe ma.

³⁸ Isirayilakae xa mini Misira je tongo naani kike suuli nde xi singe, Alatala naxa Haruna yamari a xa te Horo geya fari, a xa laaxira menni. ³⁹ Haruna nu bara je keme moxoɲen nun saxan soto, a faxa temui Horo geya fari.

⁴⁰ Aradi mange, naxan sabatixi Negewi gbengberenyi Kanaan boxi ma, a naxa a kolon Isirayilakae bara fa.

- ⁴¹ Isirayilakae to keli Horo geya yire,
e naxa sa yonkin Salamona.
⁴² E to keli menni, e naxa siga Punon.
⁴³ E to keli menni, e naxa siga Oboti.
⁴⁴ E to keli menni, e naxa siga Iye Abarimi,
Mowaba boxi naaninyi ra.
⁴⁵ E to keli menni, e naxa siga Dibon Gadi.
⁴⁶ E to keli menni, e naxa siga Alamon Dibilatayima.

⁴⁷ E to keli menni, e naxa siga Abarimi geyae yire,
Nebo geya yatagi.

⁴⁸ E to keli menni, e naxa siga Mowaba fiili ma,
Yuruden xure de ra, Yeriko taa yatagi.

⁴⁹ E naxa yonkin Yuruden xure de ra,
Beti Yesimoti nun Abeli Sitimi longori Mowaba fiili ma.

Kanaan boxi itaxunfe

⁵⁰ Alatala naxa a masen Munsa be Mowaba fiili ma, Yuruden xure de ra, Yeriko taa yatagi, ⁵¹ «A fala Isirayilakae be, «Wo na Yuruden xure giri temui naxe sofe ra Kanaan boxi ma, ⁵² wo mennikae birin faxe. Wo xa e xa kuye birin kana, naxee masolixi gemε ra, naxee yailanxi wure raxunuxi ra. Wo xa e xa batudee fan kana. ⁵³ Wo xa na boxi suxu, wo fa sabati naa. N bara na boxi fi wo ma. ⁵⁴ Na boxi itaxunma wo ma Alatala xa maragiri kepa nan ma a xabile ki ma. Naxee bonsœ xa mixie na wuya, e xa boxi belebele sœtœ. Naxee bonsœ xa mixie mu wuya, e xa boxi xa xurun. Alatala a ragirima kankan naxan sœtœma a bonsœ ki ma. ⁵⁵ Kœnœ xa wo mu mennikae faxe, e fama maniyade jooge ra naxan mixi ya tœœrœma, xa na mu a ra tunbee naxee mixi fari masœœma. E findima ne wo yaxuie ra wo xœnyi. ⁵⁶ Na temui, n e xa yunubi sare dœœœma wo tan nan ma.» »

34

Isirayila boxi naaninyie

¹ Alatala naxa a masen Munsa be, ² «A masen Isirayilakae be, «Wo na siga Kanaan boxi ma, n naxan fixi wo ma ke ra, a naaninyie nan yi ki: ³ Yire fanyi mabiri, wo xa boxi naaninyi sa fœlœma Sini gbengberenyi nan ma, Edon boxi mabiri. Na naaninyi sa fœlœma Fœœœ Baa nan ma sogetede mabiri, ⁴ a sa a kœnkœrœn Tali Tede yirefanyi mabiri, a a xun sa Sini, a dangi Kadesi Barineya yirefanyi mabiri, a siga Xasari Adari mabiri, a sa Asimon li. ⁵ A sa keli Asimon, a a kœnkœrœn han Misira dabonyi kui, a fa sa mini Baa Xungbe ma.» »

⁶ «A sogegorode naaninyi findima Baa Xungbe nan na.»

⁷ «A kœœla naaninyi sa fœlœma Baa Xungbe nan ma, han a fa dœœœ Horo geya ra. ⁸ Kelife ra Horo geya ma, wo xa naaninyi sigama na ki ne han Xamata sode de ra, a sa dœœœ Sedade ra. ⁹ A na keli menni, a sigama Sifiron mabiri ne han a sa mini Xasari Enan

ma. Wo xa bɔxi naaninyi nan na ki kɔɔla mabiri.»

¹⁰ «A sogetede, wo xa naaninyi sa kelima Xasari Enan nan ma, a siga han Seefami.

¹¹ A keli menni, a siga Ribila, Ayin sogetede biri, a man siga, a sa din tentenyie ra Kinereti baa sogetede biri ra, ¹² a sa mini Yuruden xure ma, a fa sa a rapɔn Fɔxɔe Baa ma. Wo xa bɔxi naaninyie nan na ki.»

¹³ Munsa naxa na yaamari radangi Isirayilakae ma, a falafe ra, «Bɔxi nan yi ki, naxan itaxunma Isirayila bɔnsɔe solomanaani nun a tagi ma, alɔ Alatala a ragirixi kankan ma ki naxe. ¹⁴ Ruben bɔnsɔe, Gadi bɔnsɔe, nun Manasi bɔnsɔe seeti bara e gbe ke sɔto e denbaya ki ma, ¹⁵ Yuruden naakiri ma, Yeriko ya tagi sogetede biri ra.»

¹⁶ Alatala naxa a masen Munsa be, ¹⁷ «Eleyasari serexedube nun Nunu xa di xeme Yosuwe nan yi bɔxi itaxunma. ¹⁸ Wo xa yarerati keren keren sugandi bɔnsɔe birin kui, naxee lanma yi bɔxi itaxunyi.

¹⁹ E xilie nan yi ki:

Yuda bɔnsɔe, Yefune xa di xeme Kalebi.

²⁰ Simeyɔn bɔnsɔe, Amixudi xa di xeme Semuweli.

²¹ Bunyamin bɔnsɔe, Kisilon xa di xeme Elidada

²² Dana bɔnsɔe, Yogoli xa di xeme Buuki.

²³ Yusufu xa di Manasi bɔnsɔe, Efodo xa di xeme Xaniyeli.

²⁴ Efirami bɔnsɔe, Sifitan xa di xeme Kemuweli.

²⁵ Sabulon bɔnsɔe, Paranaki xa di xeme Elisafan.

²⁶ Isakari bɔnsɔe, Asana xa di xeme Palatiyeli.

²⁷ Aseri bɔnsɔe, Selomi xa di xeme Axihudi.

²⁸ Nafatali bɔnsɔe, Amixudi xa di xeme Pedaheli.»

²⁹ Alatala nee nan sugandi Kanaan bɔxi itaxunfe ra Isirayilakae ma.

35

Lewi bɔnsɔe xa taae

¹ Alatala naxa a masen Munsa be, Mowaba fiili ma, Yuruden xure fe ma, Yeriko ya tagi, ² «A fala Isirayilakae be, e xa taa ndee nun e rabilinyie sugandi e xa bɔxi kui, e naxee fima Lewi bɔnsɔe ma, e sabatima dennaxe. ³ Lewi bɔnsɔe sabatima na taae nan kui, e xa xurusee luma na rabilinyie. ⁴ Na taa rabilinyie xa gboya sigama ne han nɔngɔn wulu keren na taa seeti naani birin ma, ⁵ kelifa taa tete ra sigafe nɔngɔn wulu firin a

sogetede biri, a sogegode biri, a koola ma, nun a yirefanyi ma.»

⁶ «Na taa tongo naani nun solomasaxan ya ma, wo xa taa senni sugandi naxee findima makantadee ra mixie be naxee bara faxe ti e mu a janigexi. ⁷ Wo xa na taa tongo naani nun solomasaxan nun e rabilinyie fi Lewi bonsœ ma. ⁸ Bonsœ naxee xa taae wuya, e xa taa gbegbe fi. Bonsœ naxee xa taae mu wuya, e xa taa dondoronti fi Lewi bonsœ ma.»

⁹ Alatala naxa a masen Munsa be, ¹⁰ «A fala Isirayilakae be, e na Yuruden xure igiri sofe ra Kanaan boxi ma, ¹¹ e xa taae sugandi, naxee findima makantadee ra mixie be naxee bara faxe ti e mu a janigexi. ¹² Na taae nan findima makantadee ra na mixie be, han kiitise e makiitima temui naxe. Na kui e xa ratanga mixie ma naxee wama e gbejoxofe, naxee wama e faxafe keren na. ¹³ Wo xa taa senni sugandi na wali xa fe ra, ¹⁴ saxan Yuruden naakiri ma, saxan Kanaan boxi ma. Na taae nan findima wo makantadee ra. ¹⁵ Mixi yo mixi, a findi Isirayilaka ra, a findi xone ra, a findi dangi mixi ra, xa naxan yo sa mixi nde faxes a mu a janigexi, na kanyi noma a nii ratangade na taa sennie nde kui.»

¹⁶ «Kono xa mixi sa mixi bonbo wure ra han a faxes, nii ba nan a ra. A lan ne, a fan xa faxes. ¹⁷ Xa mixi sa mixi bonbo geme nan na han a faxes, nii ba nan a ra. A lan ne, a fan xa faxes. ¹⁸ Xa mixi sa mixi bonbo wuri nan na han a faxes, nii ba nan a ra. A lan ne, a fan xa faxes. ¹⁹ Gbejoxoe xa na faxeti faxes a a suxuxi temui naxe. ²⁰ Xa mixi nde sa a boore radin ye marapaaxui ma, xa na mu, a janigexi a xa a gono se nde ra, a faxes, faxeti nan a ra. ²¹ Xa mixi nde sa a boore din a belexe ra yaxuya ra, a faxes, faxeti nan a ra. A lan ne, a fan xa faxes. Gbejoxoe xa na faxeti faxes a a suxuxi temui naxe.»

²² «Kono xa mixi nde sa a boore radin ye janigetarepa kui, xone mu na, xa na mu a se nde woli a ma janigetarepa kui, ²³ xa na mu a a gono geme ra janigetarepa kui, a fa faxes, kono xone nun yaxuya mu na a kui, ²⁴ nama xa a makiiti yi seriye ra gbejoxoe xa fe ra. ²⁵ Nama xa a ba gbejoxoe yi ra, a a raso makantade kui. A xa lu menni han serexedube kuntigi laaxira, Alatala naxan sugandixi. ²⁶ Kono xa na kanyi sa mini makantade fari ma, a nu bara so dennaxe, ²⁷ gbejoxoe fa a to, a faxes, gbejoxoe mu findima faxeti ra. ²⁸ Mixi naxan nii bama janigetarepa kui, a xa lu makantade han serexedube kuntigi laaxirama temui naxe. Serexedube kuntigi na laaxira temui naxe, mixi naxan nii baxi janigetarepa kui, a noma gbilende a xonyi maratange kui.»

²⁹ «Seriye nan ya wo bonsœ be yire birin, temui birin. ³⁰ Faxeti mu lan a xa faxes

seede keren xui ma, fo seede wuyaxi. ³¹ Faxeti mu lan a xun xa sara, a xa faxa. ³² Mixi naxan faxe ti a janigetareɲa kui, a mu lan a xun xa sara alako a xa gbilen a xɔnyi beenun serexedube kuntigi laaxirama temui naxe. ³³ Wo mu lan wo xa bɔxi findi bɔxi seniyentare ra. Wuli raminife na nan nabama. Faxeti wuli gbansan findima bɔxi xunsare ra. ³⁴ Wo naxa wo xɔnyi findi yire seniyentare ra. N tan Alatala sabatixi wo tan Isirayilakae ya ma.»

36

Gine ke kanyi futife seriye

¹ Denbaya xunyi naxee nu na Galadi xabile ya ma, Makiri xa die, Manasi xa mamadie, Yusufu xabilee, nee naxa siga Munsa nun Isirayila denbaya xunye yire. ² E naxa a fala Munsa be, «Alatala bara a yamari i tan n marigi, i xa yi bɔxi itaxun Isirayila die ma Alatala xa maragiri keɲa ma, a xa findi e ke ra. Alatala man bara i yamari i xa muxu taara Selofexadi xa harige so a xa di ginee yi ra. ³ Kɔnɔ xa na di ginee sa dɔxɔ bɔnsɔe gbete xeme xɔn, e ke bama ne muxu bɔnsɔe ke ra, a sa e xa xeme bɔnsɔe ke xun ma. Na kui nde bama ne muxu ke ra, naxan fixi muxu bɔnsɔe ma maragiri kui. ⁴ Xɔreya ɲe na a li, e ke bama ne muxu benbae ke ra, a sa e xa xeme benbae ke xun ma.»

⁵ Munsa naxa Alatala xa yaamari radangi Isirayilakae ma, a falafe ra, ⁶ «Yusufu bɔnsɔe, wo nondi. Alatala xa yaamari nan ya Selofexadi xa di ginee be. E xa dɔxɔ xeme xɔn naxan na xabile nde kui e baba bɔnsɔe ya ma. ⁷ Sese mu bama Isirayila bɔnsɔe nde ke ra, a findi bɔnsɔe gbete ke ra. Birin a benba ke nan xun makantama. ⁸ Di gine ke kanyi xa dɔxɔ xeme xɔn naxan na xabile nde kui a baba bɔnsɔe ya ma. ⁹ Sese mu bama Isirayila bɔnsɔe nde ke ra, a findi bɔnsɔe gbete ke ra. Birin a benba ke nan xun makantama.»

¹⁰ Selofexadi xa di ginee naxa Alatala xa yaamari suxu alɔ Munsa a fala ki naxe. ¹¹ E xilie nan ya: Maxala, Tirisa, Xogala, Milika, nun Nowa. E birin naxa dɔxɔ e deexɔe xɔn ma. ¹² E dɔxɔ Manasi xa di xabilee nan xɔn ma. Na kui e ke naxa lu e benba Yusufu bɔnsɔe.

¹³ Alatala xa seriye nun yaamarie nan na ki a naxee fixi Munsa ma, katarabi Isirayila ma, e nu na Mowaba fiili ma temui naxe, Yuruden xure fe ma, Yeriko ya tagi.
